

PO COYENEIN JESUCRISTO PIA PEITOROBIWI TATSI PEXEINYA COYENEIN EXANA

Meje yabara xua Lucas yabara tina xua Nacom yabara tsiwuna
muxe duta xua itorobina jiwitha pia Pejumope tñaxu tatsi.

1 ¹Xam, Teófilom, tajiton cata tinatsi. Bayatha copiya matha cain cata tinatsi icha diwesi. Barapo diwesitha yabara catsipaebatsi daxita po coyenewan xua Jesús exana. Cata tinatsi bayatha daxita xua po mataqueitha Jesús tamropata pitaba po coyene xua peexanaewa, matautano xua pecuidubiwano, xua beya yacui weraweracanaya po mataqueitha poxonae athabe juinya. ²Poxonae pewunaeya tsane xua Jesús athabe icha, matha pia peitorobiwi itapeta. Jesús cuiduba barapomona xua Nacom pia Pejumope tñaxu tatsi pia peayapusuwatha tatsi. Jesús cata barapomona po coyenewan xua Jesús petaxanaenexa tsainchi. ³Poxonae Jesús equeicha asu, poxonae bequein tupa, bapoxonae Jesús tsita naituta barapomonaetha. Cuarenta po matabibetha Jesús tsita naituba ducuaenaebiya barapomona. Petsita naituba ducuaenaebiyaexae pijimona, barapoxonae pijimona yaputainchi xua xaniwaicha bara petupaein equeicha asu. Jesús barapo pia peitorobiwi yabara cuiduba po coyene Nacom waba jiwí petanaexanaenexatsi pijimona pomona itorobiya peewatsixae.

⁴Poxonae cataunxuae awiya Jesús pia peitorobiwi baru nacaetuta ducuaenaebiya, Jesús barai, jeye:

—Abu jopa paponaeinde Jerusalén tomara weya. Paeware xua Nacom Taxa bayatha yabara paca tsiwuna muxu duta. Taxa namchi: ‘Tajumope tñaxu itorobicaein’, jei. Baraxua bayatha paca tsipaebatsi. ⁵Barapon Juan bautisaba u meratha. Ichitha tsiwiyo bayiyo bexa tsane Nacom pia Pejumope tñaxutha tatsi paca bautisabina. Pacata patsina Nacom pia Pejumope tñaxu tatsi painya paca baru poponaenexa tsane, jei Jesús pijimonaetha.

Meje yabara poxonae Jesús athabe icha

⁶Poxonae Jesús pia peitorobiwi baru nacaetutatsi Jesús yainyabatsi pia peitorobiwi, jeichichi:

—Jesús, pata Necanamataxeinaem, ¿methaunxuae anoxuae exanaename xua Israel nacuapiwi equeicha xeinaena itorobiya pia pepa peewatsinchi? jeichichi Jesús pijimonae.

⁷Jesús jume nota pijimonae, jeye:

—Paxam jopa paca itac̄paeyo xua painya neyaputaewa po dapae poxonae Nacom peexanaewa tsane baxua, matautano xua po mataqueitha poxonae peexanaewa tsane. Saya meisa Taxa xeina peayapus̄ itorobi coyenewa, po peayapus̄ itorobi coyenewatha xua peexanaewa baxua.

⁸Poxonae Nacom pia Pejumope t̄nax̄ tatsi pacata patsina painya nepaca baru poponaenexa xua bapoxonae peayapus̄wa painya nexeiaenexa. Tajume diwesi painta papaebiname Jerusalén tomaratha, Judea nacuathano, Samaria nacuathano, daxita carepaya taj̄ nacuantha, jei Jesús.

⁹Poxonae Jesús baxua najume weta, Jesús athabe caichatsi Nacom. Jesús pia peitorobiwi taeumeinyatsi. Barapomonae tsaquinaebowa tane xua Jesús matawacaicha duneicatsi. Equeicha Jesús jopa taetsi. ¹⁰Poxonae awiya came barapomonae necotumeinya itaboco, barapomonae jemeicha caquita umenar̄c̄patsi pon xua nacueyatabe, ponbe xua pemainya paparuwa penama xatatsinbe. ¹¹Baraponbe Jesús pijimonae tatsi baraichi, jeye:

—Ja, pomonae Galilea nacuapiwi pam, ¿eta xua metha came awiya paitaboco necotumeinyame? Bapon Jesús, pon xuaunxuae athabe icha painya xamtha, bexa tsane equeicha patopaetsica, barapocotsi j̄ta coyeneya ichi tsane ichaunxuae aunxuae icha ichi, poxonae athabe icha.

Meje yabara poxonae Jesús pia peitorobi jiwi tatsi Matías itapetatsi Judas pecoutha petanacuichiwa tsainchi

¹²Barapoxonae Jesús pia peitorobi jiwi tatsi demxuwa weiyiya po demxuwa pew̄n Olivo demxuwa xua Jerusalén tomara be-iyiya. Poxoru Jerusalén tomara imoxoyo daxota barapomonae itac̄patsi xua peponaewa Jerusalén tomara beya demxuwa weya bequein bara judiomonae pia pentaquei seicae matababi tatsi saya poxoru Moisés pia peitorobi coyenewatha baxua peyabara copatsixae. ¹³Poxonae Jesús pia peitorobiwi tatsi pareca Jerusalén tomaratha, athabe jujuinya po tututha athawetsica jinompa. Baraxota jinompa Jesús pia peitorobiwi tatsi pew̄n Pedro, ir̄ Juan, ir̄ Santiago, ir̄ Andrés, ir̄ Felipe, ir̄ Tomás, ir̄ Bartolomé, ir̄ Mateo. Ir̄ popona ich̄n Santiago pon Alfeo pexanto tatsi. Ir̄ popona ich̄n pon pew̄n Simón. Barapon Simón celotemonae

jiwanapin. Barapo celotemonae pomonae ba ichichipa xua pexeinaewa barompaya pia pecanamataxeinaeinchi. Irũ popona ichũn pon pewũn Judas pon Santiago pexanto tatsi. ¹⁴Daxita barapomonae irũ Jesús peyapin jiwi tatsi barũ nacaetuteibatsi, xua pebarũ tsipaebeibinexatsi Nacomtha. Irũ Jesús pena tatsi, bapowa María, irũ ichowaxi yabũxi barũ nacaetuteibatsi xua pebarũ tsipaebeibinexatsi Nacomtha.

¹⁵Nexata caentacabi Pedro nontapona ichaxota ena pomonae xua Jesús pejume cowũntsiwi. Barapo bicheito be ciento veinte poyobe. Barapomonae Pedro barai, jeye: ¹⁶“Tamonae pam, pomonae irũ painya nejume cowũntsiwixae Jesús. Bewa nayabara jume cui wetsina po coyene bayatha Nacom namchi xua pejume diwesitha yabara tsiwanaya paeba. Bayatha caena David cueicueijeje exanatsi Nacom pia Pejumope tũnaxũ tatsi xua Judas cui coyene caunutatsi xua pinae Jesús waetabinchi pomonae Judas matacapona. ¹⁷Bara Judas yatsicaya pata jiton petain pana nabarũ nacuitan barapo penacuichiwa. ¹⁸Poxonae Judas Jesús caenaetatsi, sacerdotemonae pia pentacaponae wi tatsi Judas catatsi paratixi. Pirapae sacerdotemonae pia pentacaponae wi tatsi bapo paratixitha Judas petũpaein tsicomotatsi ira. Judas iratha jopeica poxonae tũpa yawa coto tsitecatsi, unũ pichatecatsino abe peexanaexae. ¹⁹Nexata pomonae Jerusalén tomaratha pejinompaewi, barapomonae jume tane pocotsiwa Judas exana. Daxota barapomonae barapo ira wũn duta po wũn jei: ‘Acéldama ira’, jei. Barapo jume, barapomonae pijumetha xua jei: ‘Pejana ira’, jei”, jei Pedro. ²⁰Equeicha Pedro barai barapomonae pomonae pejume cowũntsiwi, jeye: “Salmos penaxũnae wei diwesitha Judas petũpaexae yabara paeba, jeye:

‘Pia bo tatsi tausaya bo tauncuaeinchi.

Jopa ichũn ecae tsane baxota’, jei.

Mataũtano namchino:

‘Equeicha pecoutha tanacuitinchi ichũn’,

jei Salmos penaxũnae wei diwesitha,

xua Judas yabara”, jei Pedro.

²¹Nexata Pedro equeicha namchi, jeye: “Xote waxantha jinompa pebiwi pomonae matha cain pana nepuna jinomparũ poxonae Jesús pon Wanacanamataxeinaein pana nebarũ jinompa daxita pan. ²²Barapo pebiwi taneno xua Juan Jesús pebautisabiwatsi. Yawa barapo pebiwi taneno xua poxonae Jesús cataunxuae exana ducunaebiya pocotsiwa xua pewũnaewan. Mataũtano barapo pebiwi taneno poxonae Jesús yantacabi jopa po mataqueitha poxonae athabe juinya. Bewa wabichipatsi caein barapo pebiwi jiwana, pon pecui yaputaein po coyene Jesús equeicha asũ popona. Bapon irũ pana puna cueicueijeje tsane xua po coyene Jesús equeicha asũ pepoponaewa”, jei Pedro barapo pejume cowũntsi jiwitha.

²³Barapomonae pomonae pejume cowũntsi jiwi najiwana itapeta ayunbe. Ichũn pewũn José Barsabás, pon icha wũn Justo. Irũ ichũn

pewun Matías. ²⁴Nexata barapomonae Jesús athabeicha tsipaebatsi, jeye: “Nacom, pon jiwi Necanamataxeinaem. Daxita jiwi nejuntu coyene yaputaen. ¿Incane methara ponbe jiwana pon xua ichichipamera, pon xua cuita itapeta ichichipame? ²⁵Barapon iru penaexanaenexa jinya neitorobi jiton pon xuya Judas pecoutha petanacuichinexatsi. Judas tupa nacabeta abe peexanaexae. Judas pona ichaxota po nacuatha jopa nacoicha duntsiyo isoto”, jei barapomonae.

²⁶Nexata barapomonae wun jiyatabaxuba ibotiyobe. Nexata saya Matías wun naitataraba. Daxota bapon Matías itapeta cuita wabatsi. Matías once pomonaeyobetha napona pomonae Jesús pia peitorobi jiwi tatsi.

Meje yabara poxonae Nacom pia Pejumope tñaxu tatsi patopeica pomonaetha pomonae Nacom pejume cowuntsiwi

2 ¹Pentecostés matabi tsuxubi, po mataqueitha xua poxonae jiwi tsinacaeuteiba penabanaenexa pexaewa peyabara nanta xeinaexae xua pexaewa naweta. Barapo matabitha daxita pomonae Jesús pejume cowuntsiwi bara cae botha nacaetuta. ²Barapo mataqueitha barapomonae busi tane, pebusi po busi xua be joibo busi po busi xua busi nainya naetaba itaboco wetsica. Barapo busi daxita bo tutu canaupa ichaxota barapomonae nacaetuta. ³Barapoxonae barapomonae tsita naitapeinya xeinatsi xua be peebato jumope coichan. Barapo peebato jumope coichan daxita carepaya barompaya barapomonae jajayababa tsiniya taenatsi. ⁴Barapoxonae daxita carepaya barapomonae juntu coyene yucatsi Nacom pia Pejumope tñaxu tatsi pia peayapusu itorobi coyenewa tatsi. Matautano daxita barapomonae barompaya tsanaya icha jumeintha cueicueijeji xua be po jumetha Nacom pia Pejumope tñaxu tatsi cueicueijeji cana exana barapomonae po jumein xua jopa yaputaeyo.

⁵Barapo matabintha, iruru pinmonae judiomonae pata Jerusalén tomaratha, po judiomonae i dapocotsi nacuan werena peponaewi xua penataenexa Pentecostés wun matabi poxonae tsinacaeututa pexaewa penabanaenexa. Barapomonae bichocono pejume cowuntsiwi Nacom.

⁶Barapo ayei bicheitomonae pomonae judiomonae barapomonae busi tane xua po busi, busi duneica ichaxota nacaetuta pomonae barapon Jesús pia pejume cowuntsiwichi tatsi. Barapo judiomonae jume tane xua daxita barapomonae barompaya pia jumexitha cueicueijeji xua judiomonae pia pejume tatsi. Bapoxonae barapomonae nanacaetuta Jesús pejume cowuntsiwitha. Barapomonae pomonae judiomonae najuntu coyene cabenaeca. Yawa jopa yaputaeyo xua peyabara nanta xeinaewa baraxua tsipei daxita barapomonae pomonae Jesús pejume cowuntsiwichi barompaya judiomonae pijumexitha tatsi cueicueijeji.

⁷Daxita barapomonae pomonae judiomonae najuntu coyene cabenaeca. Nantiya caemonae natsipaeba, jeye:

—iJina, bara barapomonae Galilea nacuapiwiba, pomonae bequein barapomonae jopa icha jumeintha pecueicueijeji jiwi xua wajumeintha pecueicueijejiwa! ⁸¿Eta pocotsiwa barapomonae metha daxita barompaya tsanaya icha jumeintha cueicueijeji xua wajumeintha? ⁹Xote jinompa Partia nacuapiwi iru Media nacuapiwiba, iru Elam nacuapiwiba. Barichi xote jinompe Mesopotamia nacuapiwi, iru Judea nacuapiwiba, iru Capadocia nacuapiwiba, iru Ponto nacuapiwiba, iru Asia nacuapiwiba. ¹⁰Matautano barichi xote jinompa Frigia nacuapiwi, iru Panfilia nacuapiwiba, iru Egipto nacuapiwiba, iru Libia nacuapiwiba pomonae jinompa imoxoyo Cirene nacua. Matautano ichamonae pata pomonae Roma tomarapiwi. ¹¹Barapo Roma tomarapiwi icha judiomonae pepa judiomonae xua yacui naexana. Icha judiomonae jopa pepa judiomonaeyo. Saya judiomonae penaexanaewi, tsipei barapomonae jume cowanta Nacom icha be judiomonae ichi pomonae pepa judiomonae. Iru pata ichamonae Creta nacuapiwi, iru Arabia nacuapiwiba. Ichitha daxita waxainchi jume tainchi xua Nacom pewunaewan exana peayapusuwatha, poxoru barapo Jesús pijimonae tatsi wajumeintha paeba, jei barapo judiomonae.

¹²Daxita barapo judiomonae najuntı coyene cabenaeca. Daxota barapomonae jopa xaniwaicha yabara nanta xeinaeyo baxua. Barapomonae caemonae nayainyabiya, jeye:

—¿Eta pocotsiwa metha baxua jane? jei. ¹³Ichamonae saya jume cui capana. Barapomonae namchi, jeye:

—iApara barapomonae Jesús pijimonae tatsi cıpaetsi! jei.

Meje yabara poxonae xua Pedro tsipaeba barapomonae

¹⁴Jesús pia peitorobiwi tatsi poyobe xua once poyobe, barapoyobe pia xantha tatsi Pedro nontapona. Matautano nontapona pepa bicheito itabaratha tatsi. Pedro jume daunweya barai barapo bicheitha, jeye: “Paxam, pomonae Judea nacuapiwi pamxaem iru daxita pomonae Jerusalén tomarapiwi pamxaem, incane pana nejume taema, yabara paca tsipaebinchi xuaunxuae pajume taneme. ¹⁵Barapo pebiwe xua Jesús pijimonae tatsi apara jopa cıpaetsi xuaunxuae pacui yabara nanta xeiname. Apara awiya xometo caewa ecareca. Cataunxuae apara baya daxota jopa cıpaetsi. ¹⁶Baraxua xuaunxuae anoxuae pajume taneme, caena bayatha Nacom pia peitorobi jume pepaebin yabara tsiwınae muxu duta pon pewın Joel. Joel baraxua Nacom Pejume Diwesitha tina xua saya tatina, xua pinae Nacom paeba.

¹⁷Jeyei Nacom:

‘Poxonae barapo cae pin nacuathe po matakabi
opi weraweracaena, bapoxonae barapo
matakabitha daxita carepaya jiwitha

najumope t̄nax̄u cayataxubiya catsibin.
Painya nexanto jiwi ir̄u painya nexantixi
neyabara cueicueijeji tsane pocotsiwa
xua yaputane exanan.

Pewowi yatsicaya tsita naituteibinchi
be poxonae camaiteibina.

Pitiri jiwi camaiteibina poxonae amachinae tsane.

¹⁸ Pomonae xua amanaya neyabara diwesi
canantsipaebina, barapomonaethano
najumope catsibin barapo matabitha,
yab̄uxithano, pebiwithano. Barapoxonae inta cueicueijeji tsane.

¹⁹ Peitabocotha paca tsita it̄tsinchi po coyenein
bichocono pew̄naewan xua jiwi bichocono
naj̄unt̄u coyene cabenaeca exanatsi.
Iratha tsicano paca tsita it̄tsinchi po coyenein
xua jopa juniya be pejana tsurucuae tsane, xuano
xua jopa juniya be isoto tsurucuae tsane, xuano
xua jopa juniya be nobo ts̄x̄u tsurucuae tsane.

²⁰ Poxonae patopaetsica pon jiwi Pecanamataxeinaein
copiya baraxue panecotsiname xua xometo quiri
jei tsane, jopa pentha tsurucuae tsane.

Yawa panecotsiname xua jomocoichato be
janowa ducuaena.

Barapo matabi w̄nae tsane poxonae pon jiwi
Pecanamataxeinaein patopaetsica.

Barapo matabi Nacom pepa peitupanae
matabi exanaena.

²¹ Pomonae picoya penata w̄ucaewa Nacomtha xua
Nacom peyawenaenexa tsainchi, barapomona
capanenebiya tsainchi Nacom', jei Joel
xua saya Nacom tapaebatsi", jei Pedro.

²² Equeicha Pedro barai barapomona jeye: "Pomonae Israel nacuapiwi
pamxaem, incane pana nejume taema, xua paca tsipaebinchi. Jesús,
pon Nazaret tomarapinxae bapon Nacom itoroba painya xantha. Bapon
Jesús pew̄naewan exana pexeinya petsita it̄tsi coyenewanno Nacom
pia peayapus̄watha tatsi, painya neyaputaenexa tsane xua Nacom
yawena xua Jesús peyawenaewatsi. Paxam bayatha payaputaneme xua
bapon tsita nait̄ba ducuaenebiya. ²³ Bayatha Nacom paca cui w̄nae
tsiwanaya tane xua po coyeneya pata exanaename pexantotha tatsi.
Nacom bara paca cui copata xua abe paexaname. Jesús pawaetabame
painya caenaetsinexa tsane bapon peacuibe jiwitha. Barapomona
Jesús cobe matabobatsi naetotha yawa bexotsi. ²⁴ Ichitha equeicha

Nacom asu exana pexanto petupae cuiru nacua weya. Nacom Pexanto capanepa pia peantuyapusuwatha barapo petupae cuiru nacua weya, tsipei barapo petupae cuiru nacua jopa xeinaeyo peayapusuwa xua Jesús awiya pebotsiwatsi barapo petupae cuiru nacuatha. ²⁵Iru David, Israel nacuapiwi itorobiya pia pepa peewatsinchi, caena bayatha tina Nacom Pejume Diwesitha. David tina Jesús jume yabara tatsi. David namchi, jeye:

‘Yaputan xua Tanecanamataxeinaein nebaru
poponeiba daxita matacabi.
Bapon neyaweneiba.
Bapon nebaru poponeiba daxota
jopa junuwin tsane.

²⁶Daxota bichocono juntu coyene weiweinan.
Matautano daxota Nacom Pejume Diwesi
juntu coyene weiweinaya
cueicueijan ichamonaetha.
Bara bequein tupaen, muthutha bocuaeinno,
ichitha jume cowuntan xua Nacom equeicha asu
neexanaena pia peantuyapusuwatha.

²⁷Xam Nacom jopa punaxubim tsane tajumope
petupae cuiru cuariyatha.
Poxoru xan jinya nexanton tajuntu cui
xanepanaein daxota jopa benecopatsim
xua tatupaen tuxamnuncuaein,
yawa xua tsabanuncuaein.

²⁸Neita cui tsita itubame beta xaniwaicha
tapoponaenexa tsane poxonae equeicha asu
neexanaename petupae cuiru nacua weya.
Nejuntu coyene weiweina exaname tsipei
neyanta poponeibame’, jei David
xua saya Jesús tapaebatsi”, jei Pedro.

²⁹Equeicha Pedro barai barapomona, jeye: “Tamonae, daxota beta paca tsipaebatsi xua pinae David wamo susato nacuapin bayatha pinae tupa. Piamonae muthutha xotsi. Awiya waxantha boca barapo muthu ichaxota petupaen muthutha xotsi. ³⁰Apara, barapon David, pinae Nacom peitorobi jume pepaebin. Bayatha pinae David nacana wuna tsiwanaya muxu tsidutatsi Nacom, xua pinae David pijimonae tatsi jiwana pon jiwi Pecanamataxeinaein tatsi naexanaena. Barapon pon Pecanamataxeinaein jiwi Israel nacuapiwi canamataxeinaeinchi icha cain bayatha David ichi poxonae canamataxeina barapo Israel nacuamonae.
³¹Bayatha pinae David yabara tsiwuna muxu duta xua bexa tsane Nacom Mesias equeicha asu exanaeinchi. Nacom Pexanto tatsi pon David

yabara jume jei, apara bapon Mesías. David namchi xua Mesías jeyei xua saya pinae David tapaeba: ‘Xam Nacom jopa punaxubim tsane tajumope petupae cuiru cuariyatha. Poxoru xan jinya nexanton tajuntũ cui xanepanaein, daxota jopa benecopatsim xua tatupaein tuxamnuncuaein yawa xua tsabanuncuaein’, jei David xua Mesías jeyei. ³²Pon Mesías, pon xuaunxuae yabara paca tsipaebatsi apara bapon Jesús pon Nacom equeicha asũ exana. Baraxua paxan yatsicaewa pata cui taewi. ³³Jesús asiya icha peecaenexa Nacom pecoxatha tatsi. Jesús pon jiwi pepa Pecanamataxeinaein exanatsi Nacom. Matautano Jesús nacana jumope catatsi, Nacom. Barichi baxua xuaunxuae pataneme yawa pana nejume tanemeno xua daxita carepaya barompaya icha jumexitha pacueicueijan, baraxua Nacom pia Pejumope tũnaxũ tatsi pana cata. ³⁴Poxoru David saya tũpa, jopa athabe ichiyo, icha be jopa Jesús ichiyo poxonae athabe icha Jesús. Ichitha saya baxua David tapaeba Nacom, xua Nacom Mesías tsipaebatsi, jeye:

‘Nacom, Tanecanamataxeinaein baraichi.

Tacoxatha weya ecare.

³⁵Abũ beya poxonae matapainya necaitafaetabi jiwi pia Pecanamataxeinaein tatsi caexanaeinchi. Barapomonaе beexanaetsipa pocotsiwa xua xam nepaebiwam’, jeye pinae Nacom xua Mesías tsipaebatsi, jei David Nacom nexa”, jei Pedro.

³⁶Equeicha Pedro namchi barapomonaetha: “Paxam, pomonaе Israel nacuapiwi pamxaem. Anoxuae payaputaneme pon xua naetotha tũparucua paexaname, Nacom exana xua bapon jiwi pia Pecanamataxeinaein tatsi naexana. Yawano Nacom naca itata caewata xua pon Mesías jei, pon Nacom itorobica petsitũpaenexa jiwi, apara bapon Jesús”, jei Pedro.

³⁷Poxonaе daxita carepaya barapomonaе baxua jume taerũcupa bichocono jũntũ coyene wecoyeyi tsurũcupae. Barapomonaе Pedro baraichi irũ Jesús pia peitorobi jiwi tatsi baraichi, jeye:

—Patamonaе, ¿eta bewa pabichin tsane metha? jei.

³⁸Nexata Pedro barapomonaе barai, jeye:

—Icha jũntũ coyene paxeinare Nacomtha painya neauraxae xua abe paexaname. Matautano daxita carepaya pam ichamonaе paca bautisabina Jesucristo pewũnthaxua Nacom pia paca necayabara jũntemainaenexa xua abe painya neexanae cuiru coyenein. Barapoxonaе Nacom paca nacana jumope catsibina. ³⁹Barapo peyabara tsiwũnae muxu dutsiwa apara paxam nexa, irũ muxuna daxita painya pexui nexano. Matautano pomonaе tajũ beya jinompa irũ barapomonaе nexa. Barichi Nacom pon Wanacanamataxeinaeinxae, pomonaе waba peantobexae barapomonaе irũ nexa, jei Pedro.

⁴⁰Barapo jumeintha yawa icha jumeintha Pedro tsipaeba barapomonae. Matautano Pedro bichocono muxuweta poxonae jeye:

—Po coyenein xua daxita abe peexanae cuiru coyenein paexaneibame, barapo coyenein pana nacui barapende, po coyenein xua daxita carepaya jiwi exaneiba, jei Pedro.

⁴¹Po matabitha poxonae Pedro paeba baxua barapo matabitha pomonae jume cowunta xua Pedro paeba barapomonae bautisabatsi. Barapo matabitha tres mil po bicheito jiwimonaebe naexana xua pomonae copiya pomonae Nacom pejume cowuntsiwixaetsi barapomonae mataropeicha pinmonae naexanatsi. ⁴²Barapomonae nacuiduba nawita, xua Jesucristo pia peitorobi jiwi tatsi paeba. Barapomonae nacana cui nanta jupaya jinompa. Nacomtha nabaru tsipaebeibano. Nabaru nacaetuteibano xua penabaru epa janaqueibinexa pan xua penabaru xaibinexa. Barapomonae baxua exana dubenanaebiya xua Jesucristo peyabara nanta xeina dubenanaebiyaenexatsi po coyene xua Jesucristo bayatha icha ichi xua poxonae pan epa janaca.

**Meje yabara po coyeneya xua jinompa pomonae
copiya Jesús pejume cowuntsiwi**

⁴³Jesucristo pia peitorobiwi tatsi, barapomonae pexeinya petsita itatsi coyenewan exana nawita Nacom pia peayapusuwatha tatsi. Daxota pomonae jopa Jesucristo pejume cowuntsiwichi, daxita barapomonae junuwa, Nacom cunuwatsi poxonae cui tane baxuan. ⁴⁴Daxita barapomonae, pomonae Jesús pejume cowuntsixaetsi, barapomonae xaniwaicha caemonae peburuya nabaru jinompa. Matautano barapomonae caemonae nantiya nacatsiba dubenanaebiya pichiwixi pocotsiwan xua xeina. ⁴⁵Matautano barapomonae daxitan pocotsiwan xua xeina caenaeta dubenanaebiya. Bapoxonae barapo paratixi nata tsaba dubenanaebiya xua jopa pexeinaexae ichamonae xua icha be pocotsi coyeneya pocotsiwan canantawenona ichamonae. ⁴⁶Daxita carepaya barapomonae nabaru nacaetuta dubenanaebiya Nacom pin pia botha. Matautano pia boxitha nabaru nacaetuta dubenanaebiya pan nabaru epa nantaruba janaquiya exana dubenanaebiya. Juntema nabaru juntu coyene weiweinaeya xaerubenanaebiya. ⁴⁷Daxita barapomonae carepaya Nacom wunae jainta dubenanaebiya. Matautano barapomonae baru cui itura jinatsi ichamonae beta peexanaexae. Daxita matabi tsaibi pomonae Nacom pejume cowuntsiwixaetsi barapomonae Nacom cana exana xua mataropeicha pinmonae tsoponae tsaibi.

Meje yabara poxonae pon pejajuyajuyei jiton equeicha cui jume exanatsi

3 ¹Caentaqueitha quiripitha poxonae tres po horabe tsuxubi po horatha poxonae jiwi ba poneiba Nacom pin pia botha xua

petsipaebeibinexa Nacomtha bapoxonae Pedro iru Juan Nacom pin pia botha jonyiabe. ²Barapo bo Nacom pin pia bo tatsi icha coiboto jiwi wun duta, jeye: “Pexeinya coiboto”, jei. Barapo coibototha daxita matacabi tsaibi pebin cuareteibatsi pon pejayujayuwei jiton xua yawa naexana poxonae pexuyo. Daxota bapon baxota cuareteibatsi xua pewuquequeibinexa pomonaetha pomonae jojoneibiyi barapo coiboto iya. ³Pon pejayujayuwei jiton wuca paratixi poxonae Pedro iru Juan tainchibe xua muxu pejoniyabe barapo coiboto iya. ⁴Nexata Pedro iru Juan tanebe bapon. Pedro barai bapontha, jeye:

—Incane pana taemabe, jei Pedro.

⁵Nexata necota bapon. Nanta xeinataba xua catinchi paratixi. ⁶Ichitha Pedro barai bapontha, jeye:

—Canta jopa xeinaeinyo paratixi. Matautano jopa xeinaeinyo pocotsiwa oro nain matawun. Meisa po coyenewa xua taxainaewa baxua cacatinchi. Jesucristo, Nazaret tomarapin wuntha cabaraichi, asiya uncuatabare yawa pondeno, jei Pedro.

⁷Nexata Pedro pocotsiwa pecoxa weya cobe pita. Yawa asiya cuaranotano. Bapoxonae nainya beta taxuyawere daunweya ducuanaya. Pesitano wunae tsanayano. ⁸Nexata bapon pon pejayujayuwei jiton jirawuna. Asiya uncuatabano. Ponano. Bapoxonae Pedro iru Juan puna jonyiatsibe bapon, Nacom pin pia botha. Jirajirawiya ponano. Yawano Nacom wunae jaintatsi. ⁹Nexata daxita pomonae xua Nacom pin pia bo tututha peenaexae, tainchi pon pejayujayuwei jitonxae xua pona, yawano xua Nacom wunae jaintatsino. ¹⁰Barapomonae daxita carepaya najuntu coyene cabenaecaeya tane, tsipei barapomonae bayatha cui tane xua bapon amanaya jiwi wuquequeiba paratixi pecoibototha, po coiboto pewun “Pexeinya coiboto”, jei.

Meje yabara poxonae Pedro diwesi paeba Nacom pin pia botha po tututha pewun Salomón bo wun tututha

¹¹Poxonae pejayujayuwei jiton awiya maxu waetabatsibe Pedro Juanno bapoxonae iruru daxita jiwi najuntu coyene cabenaecaeya cuinaenouta Nacom pin pia botha xua tututha po tututha Salomón bo wun tututha ichaxota Pedro baru jinompa. ¹²Poxonae Pedro barapomonae caetaebiyi, Pedro barai: “Ja, pomonae Israel nacuamonaepiwi pamxaem, zeta xua metha daxita paxam pana najuntu coyene cabenaecaeya taneme baxua? ¿Pana neyabara nanta xeinamebe xua pata taayapuswatha paaxaibi exananbe pejayujayuwei jiton? ¿Matautano pana neyabara nanta xeinamebe poxoru Nacom pajume cowuntanbe daxota pon pejayujayuwei jiton axaibi? ¹³Ajibi, apara wamo susato jiwi pia Nacom tatsi axaibi exana bapon. Barapo Nacom Jacob pia Nacom tatsi, Abraham bapon pia Nacomno, Isaac bapon pia Nacomno. Apra bapon baxua taexana

Nacom. Bapon Nacom Pexanto bichocono ainya cui cana exana poxonaē pexanto asu exana petupaē cuiuru coyene weya. Bapon apara Jesús pon pacanaetame pomonaetha pomonaē pentacaponawēi, pon bepa bequein isanaxubei Pilato poxonaē paxam jopa pacopatsim xua bapon peisanaxubiwa. ¹⁴Bapon pon bichocono pejuntu coyene xanepanaein xua jopa xeinaeyo penatsicuentsiwa xua abe peexanaexae tsipei saya exaneiba pocotsiwa Nacom ichichipa. Ichitha jopa paichipaem xua Pilato peisanaxubiwa tsane bapon. Saya meisa pawucame xua Pilato peisanaxubiwa ichun pon jiwi pejutebeibin pon Barrabás. ¹⁵Poxonaē baxua paexaname barapara Jesús pabexubame. Bapon Jesús pon jiwi cana exanatsi xua jiwi ajuntayapusya pejinompawea. Bapon Jesús Nacom equeicha asu exana petupaē cuiuru coyene weya. Bara baxua yatsicaya pacui tan daxita. ¹⁶Po jume wun peayapusu wun, bapo wun Jesús pia wun. Daxota pejayujayuwei jiton barapo jume wuntha axaibi exanatsi. Barapon pataneme xua axaibi, tsipei bapon jume nanta pitabiya jume cowunta barapo peayapusu jume wun. Daxota barapon painya itabaratha axaibi tsuxubi poxoru jume cowunta Jesús”, jei Pedro.

¹⁷Equeicha Pedro jeye: “Tamonae yaputan xua jopa payabara yaputaem xua paexaname poxonaē Jesús pabexubame. Barichi painya pentacaponawino jopa yabara yaputaeyo xua baxua exana. ¹⁸Nacom peitorobi jume pepaebiwi bayatha Mesías yabara tsiwana paebatsi. Barapomonaē paeba, jeye: ‘Bexa tsane Mesías bexubinchi’, jei. Nacom bara nacui yabara jume weta baxua xua bayatha Nacom peitorobi jume pepaebiwi paeba. ¹⁹Daxota icha juntu coyene paxeinare Nacomtha painya neauraxae xua abe paexaname. Yawa pajume cowunde painya nepaca cayabara juntemainaenexa abe painya neexanaē cuiuru coyenein. Yawa Nacom pawucare xua paca juntu coyene xanepana exanaena. Bapoxonaē Nacom paca juntu coyene ayapusya exanaena. ²⁰Tsipei Nacom equeicha athawetsica Jesús itorobicaeinchi pon bayatha Nacom itapeta pon Mesías xua painya nepaca capanenebiyaenexa tsane abe painya neexanaē cuiuru coyenein weya. ²¹Cataunxuae abu Jesucristo equiya Nacom pia nacuatheicha tatsi. Equeicha bapon patopaetsica poxonaē Nacom wunaē exanaena daxitan, be pocotsi coyeneya bayatha Nacom peitorobi jume pepaebiwi paeba. ²²Barichi Moisés pata amo susato jiton namchi: ‘Painyamonae jiwana Nacom cana exanaena, pon Nacom pia peitorobi jume pepaebin tsecae tsane icha neichi. Pajume cowuntsiya exande daxita pocotsiwa xua bapon paca tsipaebina. ²³Daxita pomonaē jopa jume cowuntsiyo pocotsiwa bapon paeba, barapomonaē Nacom weraweraca cana exanaena xua jopa penaexanaenexa Nacom pijimonaē tatsi’, jeyei Moisés”, jei Pedro.

²⁴Equeicha Pedro jeye: “Daxita Nacom peitorobi jume pepaebiwi iru Samuel pon xua yatsicaya tabu ducua, baraxua carepaya bapo diwesin

yabara paeba barapo matacabin. ²⁵Barapo Nacom pia peyabara tsiwūnae muxu dutsiwa po peyabara tsiwūnae muxu dutsiwa Nacom tsiwūnaeya muxu duta Nacom pia peitorobi jume pepaebi jiwitha, apara bara irū paxam nexa. Baxua Nacom pena peyabara tsiwūnae muxu dutsiwa Abraham yabara tsiwūnae muxu dutatsi pon wamo susatopin xua xanepanaya painya nejinompaenexa. Nacom Abraham baraichi, jeye: ‘Caein jinya nemomoxi susato jiwi jiwānapin pepatopaexae tsane daxita i dapocotsi nacuanpiwi yawenaein’, jei Nacom Abrahamtha. ²⁶Poxonae Nacom Pexanto asū exana petūpae cuiru coyene weya, bapoxonae copiya pacata itoroba painya xantha pia painya nepaca cayawenaenexa xua daxita paxam painya nenacui barapentsinexa abe painya neexanae cuiru coyenein”, jei Pedro.

Meje yabara poxonae Pedro irū Juan cueicueijejei tsuncuaebe pomonae tomarapiwi pia pentacaponaeawi tatsi peitabaratha tatsi

4 ¹Poxonae cataunxuae Pedro irū Juan cueicueijejei barapomonaetha, bapoxonae sacerdotemonaē pia pentacaponaeawi tatsi pata. Irū patopa pon soldadomonaē pia pentacaponaein tatsi pon Nacom pin pia botha tatsi pe-eeinaein. Yawa saduceomonaeno irū pata baxota. ²Barapomonaē bichocono anaepana, yaitama Pedro Juanno paebabe xua po coyene Jesús petūpaein equeicha asū, xua pināe barichi jiwino poxonae tūpa equeicha asū. ³Bara nexata Pedro Juanno waetabatsibe barapomonaē. Jiwi pecūbi botha capoinhibe. Barapo botha etatsibe tsipei quirei tsanaya xua beya poxonae yaitapenacaena. ⁴Pinmonae jume tane po diwesi Juan irū Pedro paebabe, yawa jume cowūntano barapo diwesi. Barapomonaē irūrū pomonaē copiya jume cowūnta caena bayatha, daxita barapomonaē nexata daxita cinco mil bicheito tsuxubi xua saya pebiwi ununatsi.

⁵Icha mataqueitha judiomonaē pia pentacaponaeawi tatsi, irūrū pitiri jiwi, irūno pomonaē jiwi pecuidubiwi Moisés pia peitorobi coyenewa tatsi, daxita barapomonaē nacaetuta Jerusalén tomaratha. ⁶Baxota irū nanacaetuta Anás pon sacerdotemonaē pia pepa pentacaponaein tatsi. Irū nanacaetuta Caifás, Anás perobi. Irū nanacaetuta Juan irū Alejandro, ponbe Anás piamonaē tatsi. Barichirū nanacaetuta ichamonaē pomonaē sacerdotemonaē pia pentacaponaeawi tatsi barapomonaē piamonaē tatsi. ⁷Bapoxonae ichamonaē itoroba xua Pedro irū Juan pecuaranotatsinexatsibe barapo penacaetutsiwi itabaratha. Yainyabatsibe, jeichibe:

—¿Jintam pia peyapusū itorobi coyenewatha tatsi mataūtano jintam pewūnthā tatsi axaibi paexanamebe? jeichichibe.

⁸Pedro bichocono jūntū coyene yūcatsi Nacom pia Pejumope tūnaxū tatsi pia peyapusū itorobi coyenewa tatsi. Pedro barapomonaē jume nota, jeye:

—Pomonae tomarapiwi pia pentacaponae jiwi pamxaem, iruru pomonae pitiri jiwi pamxaem, pomonae Israel pijimonaе tatsi pamxaem, daxita barapomonaе pam paca tsipaebatsi. ⁹Maisa yabara pana yainyabamebe xua po coyene pejayujayujei jiton axaibi xua painya neyaputaenexa xua eta po coyeneya xua paexananbe poxonaе bapon axaibi exanatsi po coyene xua bichocono wunaе. ¹⁰Daxota paxanbe paca jume notatsi xua iru israelmonaеpiwi peyaputaenexa po coyene xua pon pejayujayujei jiton axaibi exanatsi poxonaе pawun paeban Jesús pewun pon Nazaret tomarapin. Bapon Jesús, pon apara naetotha tupaeruca paexaname matautano pon equeicha Nacom petupaеin asu exana petupaе cuiru coyene weya. ¹¹Bayatha Nacom Pejume Diwesitha tsiwanaya yabara paeba xua po coyeneya pacana exanaename Jesustha. Paxam be barapocotsimonaе pam, be pocotsimonaе xua ibo bo peacabiwi. Barapomonaе xuba iboto po iboto bequein ainya cui naexana beyacaincha icha iboto. Paxam bara paichim Jesucristo paxubame pon peainya cuiн xua Nacom ainya cui cana exana beyacaincha ichamonaе. ¹²Barapo cae pin nacuathe dapocotsin aibi pon capanepeiba jiwi. Saya meisa bapon Jesús capanepeiba jiwi. Ichun Nacom jopa nacata itorobiyo.

¹³Daxita tomarapiwi pia pentacaponaewi tatsi yabara najuntu coyene cabenaeca xua Pedro Juanno jopa auriyobe xua atsaquiya paebabe. Tsipei barapomonaе pomonaе pentacaitorobi bicheito yaputane xua Pedro Juanno jopa nacuidubiyobe petinae botha matautano xua baponbe saya pecui pawi jitonbe. Barichi barapo pentacaitorobi bicheito yaputaneno xua xaniwaicha apara baponbe ponbe napuna poponeibabe Jesustha. ¹⁴Barapomonaе moya ena tsipei pon pejayujayujei jiton Pedro Juanno axaibiya caquita uncuatsibe. Daxota barapomonaе Pedro Juanno jopa abe yabara paebichibe. ¹⁵Pedro Juanno matha pesato beitorobiyatsibe. Barapomonaе natsipaeba. ¹⁶Nabaraи, jeye:

—¿Eta bichainchi metha baraponbetha Pedro Juanno? Bayatha daxita carepaya Jerusalén tomarapiwi yaputane xua Juan Pedrono exanabe pexeinya petsita itutsi coyenewa Nacom pia peayapusuwatha tatsi. Daxota jopa naca itacupaeyo xua wapaebiwa po coyene xua baponbe jopa apara exanaeyobe pexeinya petsita itutsi coyenewa Nacom pia peayapusuwatha tatsi. ¹⁷Maisa aichaxaibichi xua daxita carepaya jiwi jume taetaepona baxua. Metha daxota baponbe jume daunweya itorobinchi xua equeicha jopa paebi tsanebe xua Jesús peyabara paebiwatsi, jei barapomonaе.

¹⁸Barapo pentacaitorobi bicheito equeicha Pedro iru Juan wabatsibe. Jume daunweya tsipaebatsibe:

—Equeicha jopa Jesús payabara paebindebe. Equeicha jopa yabara pacuidubindebe barapo cui, jei barapomonaе.

¹⁹Bara nexata Pedro Juanno jume notabe barapomonaе, jeibe:

—Incane payabara nanta xeinare icha metha bara Nacom tsita xanepanatsi xua paxanbe pata paca cajume cowuntsiwatsi xua pata exanaewabe pocotsiwa pana itorobame xua daxota jopa pata exanaewa pocotsiwa Nacom pana itoroba. ²⁰Bewa paexanaeinbe daxita pocotsiwa Nacom pana neitorobabe. Bewa papaebinde daxita pocotsiwa patanbe xua Jesús exana yawa xua pajume tanbeno xua Jesús paeba, jeibe Pedro Juanno.

²¹Barapomonaē pomonaē tomarapiwi pia pentacaponae wi tatsi, Pedro iru Juan jume itawetatsibe. Daichitha saya pu copatatsibe. Barapomonaē jopa itacupaetsi xua pecuainchiwatsibe Pedro iru Juan jiwi pecunuwixaetsi, tsipei pinmonae jiwi Nacom wunaē jaintatsi, petaxae pocotsiwa Pedro iru Juan exanabe. ²²Pon pejayujayuwei jiton pontha pon Nacom pexeinya petsita itutsi coyenewa taexana, bapon axaibi exanatsi poxonaē cuarenta po weiyobe xeina.

**Meje poxonaē pomonaē Jesús pejume cowuntsiwichi
tatsi wuca Nacom xua jopa pejunuwina xua tsane poxonaē
Nacom Pejume Diwesi cueicueijei tsane jiwitha**

²³Pedro Juanno nainya pontababe ichaxota Jesús pejume cowuntsiwichi tatsi jinompa. Baxota nanabarū nacaetutatsibe. Barapomonaētha paebabe, xua baraunchichibe sacerdotemonaē pia pentacaponae wi, pitiri jiwino. ²⁴Poxonaē Pedro iru Juan baxua jume taerucupatsibe, barapomonaē Nacomtha tsipaeba, jeye: “Nacom, pon pata Necanamataxeinaem, xam daxita peitabocotha exaname, irathano, menthano, daxita icha coyeneinno. ²⁵David pon neitorobi jume pepaebin, nejumope tunaxū cueicueijei cana exanatsi xua cata paeba, poxonaē jeye:

‘¿Eta xua metha, pomonaē jopa judiomonaē
naexanaeyo cayabara anaepana?
Bara bequein ichipa abe cata exana
ichitha jopa itacupaetsi.

²⁶Daxita carepaya nacuanpiwi pomonaē
jiwi itorobiya pia pepa peewatsiwichi
iru ichamonaē pomonaē jiwi peyanacua
ewatsiwichi barapomonaē nacaetuta xua abe
necayabara paebinexa yawa xua
Nexanto pia abe yabara paebichi pon
Mesías, pon jinya Neitapetsin’, jeyei David,
xua pinaē Nacom tapaebatsi”, jei
barapomonaē xua wuca Nacomtha.

²⁷Equeicha bapomonaē jeye: “Bara yatsicaya baxua exana poxonaē Herodes iru Poncio Pilato, iru icha nacuamonaepiwino, iru Israel nacuamonaepiwino xote nacaetuta Jerusalén tomaratha. Barapomonaē nacaetuta xua Jesús abe

peyabara paebinxatsi nexanto pon pejuntũ coyene xanepanaein pon Mesías pon itapetame. ²⁸Barapomonaē, pomonaē xote nacaetuta, exana daxita xua caena bayatha cui wũnaē tsiwanaya yabara paebame po coyene xua barapomonaē exanaena. ²⁹Pata Necanamataxeinaem, matha jume taema xua pana yabara abe jume baraunchi xua abe pana exanapaeba. Pana care xua neajuntũyapusuwa xua jopa junuwiya pata paebinxata tsane jinya jume diwesi, tsipei paxan jinya neitorobi jiwi pan. ³⁰Peatenewi axaibi exande neayapusuwatha. Matautano barabũ copatame xua pexeinya petsita itũtsi coyenewan paexanaein poxonaē pacueicueijan tsane jinya jume diwesi, Jesús nexanto pia peayapusuwatha tatsi pon pejuntũ coyene xanepanaein”, jei barapomonaē poxonaē wũca Nacomtha.

³¹Barapomonaē najume wetarũcũpa xua Nacomtha petsipaebiwa. Bapoxonaē ichaxota nacaetuta barapomonaē ira jijiyataxuba. Daxita barapomonaē jũntũ coyene yũca cana exanatsi Nacom pia Pejumope tũnaxũ tatsi pia peayapusũ itorobi coyenewa tatsitha. Matautano barapomonaē Nacom Pejume Diwesi jopa junuwiya paebinoutsio.

**Meje yabara poxonaē pomonaē Jesús pejume cowũntsiwi
pocotsiwan xua xeina daxita baxuan bara barapomonaē nexa**

³²Pomonaē pejume cowũntsiwi Jesucristo pinmonaē tsoponaē. Barapomonaē pebũrũya nanta xeina be caenthuto coyeneya. Ichũn jopa jeiyo: “Apara pocotsiwa xeinan meisa tawa”, jopa jeiyo. Ichitha daxita xua barapomonaē xeina baxua saya daxita bara barapomonaē nexa. ³³Jesús pia peitorobi jiwi tatsi ajumeyapusũya yabara paeba pocotsiwa bayatha tane poxonaē Jesucristo pon jiwi Pecanamataxeinaeinchi xua equeicha petũpaēin asũ popona exanatsi. Matautano yabara cueicueije po coyene Nacom bichocono wũnaē exana daxita barapomonaētha peantobexaetsi. ³⁴⁻³⁵Jopa ichũn acopeibiyo pomonaē Jesús pejume cowũntsiwi. Daxita barapomonaē xeina xua pocotsiwa penantawenonaewa poxoru ichamonaē pomonaē nawita pexeinaewi caenaeta dubenanaebiya pabin, bomũxũnno. Barapo paratixi poxonaē xeineiba, catsibeibatsi Jesucristo pia peitorobi jiwi tatsitha. Nexata xuya barapo paratixi Jesucristo pia peitorobi jiwi tatsi catsibeiba pomonaētha pomonaē peacopeibi jiwi xua daxota jopa petaseicaenexatsi pocotsiwa nantawenona. ³⁶Barichi exana bapon José pon Leví pia pemomo susato jiwanaēpin. Jesucristo pia peitorobi jiwi tatsi icha wũn duta bapontha, po wũn Bernabé. (Barapo wũn, xua hebreo jume jei: “Pon jiwi pentateiqueibin”, jei.) Barapon José, Chipre tunaetotha naexana. ³⁷Bapon pia pabi caenaeta. Bapoxonaē barapo paratixi Jesucristo pia peitorobi jiwi tatsi catatsi peacopeibiwi nexa.

Meje yabara poxonaē Ananías irũ piowa Safira abe exanabe

5 ¹Bapoxonaē irũ ichũn pon pewũn Ananías irũ piowa pewũn Safira, pabi xeinabe. Bapon piowabe pia ira caenaetabe. ²Bapon

piowabe najþpa nanta xeinabe. Baponbe icha paratixi nata botabe. Icha paratixi Jesucristo pia peitorobi jiwí tatsi catabe bequein Ananías paeba xua daxita catabe Jesús pia peitorobi jiwíthatsi. ³Bara nexata Pedro Ananías baraichi, jeye:

—Ananías, ¿eta xua metha Satanás jume jejam xua cajume tsiduta xua Nacom pia Pejumope tñaxu tatsi muxuitorobame? ¿Eta xua metha paratixi nata botame xua ira matoma cacata? ⁴Po ira caenaetame apara bara jinya ira. Yawa barapo matomano apara bara jinyawa. Barapo paratixi icha canantawenoname bara ba moya tainchi. ¿Eta xua metha baxua najñntu coyene xeiname? Jopa apara muxuitorobim pebiwi. Jame yatsicaya apara Nacom pia Pejumope tñaxu tatsi muxuitorobame, jei Pedro.

⁵Poxonae baraxua Ananías jume taeba, petþpaein Ananías iratha jopa. Daxita pomonae xua jume tane xua bapon tþpa, bichocono junuwa.

⁶Pewowi pata. Ananías petþpaein mata yarabatsi pesato becayatsi, xua pemuthþtha xubinexatsi.

⁷Pirapaeyo poxonae tres po horabe weta, Ananías piowa tatsi patopa ichaxota Pedrobaru ena. Barapowa jopa yaputaeyo xua pia pebin tatsi tatþpatsi. ⁸Nexata Pedro barai barapowa, jeye:

—¿Bara daxita pana catame xoxi pacaenaetame pentoma pabi? jei Pedro.

Barapowa jume nota, jeye:

—Aja, bara daxita, jei barapowa.

⁹Nexata Pedro barai barapowa, jeye:

—¿Eta xua metha pana muxu wetamebe xua Nacom pia Pejumope tñaxu tatsi pamuxuitorobinamebe? Taema, pewowi pomonae aunxuae jinya pebin muthþtha xotsi, pecoibototha pata, necamuthþtha xubinexa tsaneru.

¹⁰Barapoxonae caena nainya Safira Pedro petaxutha petþpaein tanabotabatsi. Poxonae pewowi taeba xua barapowa bayatha tþpa, bapoxonae bapowa jontaxorenatsi. Pia pebin cacuita muthþtha xorecatsi. ¹¹Daxita Jesús pejume cowñntsi jiwí, ichamonaeno unthþthu nayotarucþpa pejunuwixae poxonae baraxua jume tane.

Meje yabara poxonae Jesús pia peitorobi jiwí tatsi ainya pexeinya petsita itñtsi coyenewan exana, Nacom pia peayapuswatha tatsi

¹²Jesús pia peitorobi jiwí tatsi pexeinya petsita itñtsi coyenein exana jiwíthatsi Nacom pia peayapuswatha tatsi. Pinmonae Jerusalén tomarapiwi pomonae jume cowñnta Jesús, Nacom pin pia botha nacaetuta. Po tutu pewun Pórtico de Salomón tutu, bapo tututha nacaetuta. ¹³Ichamona, pomonae xua jopa jume cowñntsiyo Jesús, junuwa xua penanacaetutsiwa Jesús pejume cowñntsi jiwíthatsi. Ichitha barapo Jerusalén tomarapiwi

tsita cui wūnaetsi Jesús pejume cowūntsi jiwi tatsi. ¹⁴Pin bicheito nayoyotapona, pebiwino, yabūxino pomonae xua jume cowūntapona Jesús ponxae jiwi Pecanamataxeinaeinchi. ¹⁵Jesús pia peitorobi jiwi tatsi wūnae peexanaexae, Nacom pia peayapusuwatha tatsi, daxota pomonae atene namtotha capoinchi. Ichamonae camatha bobena namtotha. Ichamonae weintha bobena. Barapomonae ichipa jayababatsi xua Pedro pejumope tatsi, xua barapomonae peaxaibi exanaenexa tsainchi. ¹⁶Jiwi nacaetuta Jerusalén tomaratha pomonae xua pia tomaran jeba Jerusalén tomara pepuya weya. Barapomonae capata peatenewi irū pomonae xua matajemabatsi exanatsi cauri. Daxita barapomonae peburūya axaibi exanatsi. Daxita barapomonae carepaya equeicha axaibi.

Meje yabara poxonae Jesús pia peitorobi jiwi tatsi peraxa exanatsi

¹⁷Nexata sacerdotemonae pia pepa pentacaponaein tatsi, irū pomonae xua napuna pona, pomonae saduceomonae, daxita barapomonae Jesús pia peitorobi jiwi tatsi anaepanaya jume uwatsi. ¹⁸Daxota pomonae xua anaepana Jesús pia peitorobi jiwi tatsi teicatsi. Jiwi pecūbi bothano capoinchi. ¹⁹Ichitha Jesús itoroba matatsunpin. Bapon merawi patopa. Jiwi pecūbi coiboto yausaranaxuba. Matatsunpin aisowa bemaxū cayiya Jesús pia peitorobi jiwi tatsi. ²⁰Matatsunpin Jesús pia peitorobi jiwi tatsi tsipaebatsi, jeye: “Paponde Nacom pin pia botha. Baxota paumende. Payabara paebare daxita jiwitha barapo pena jūntū coyene po coyene xua Nacom cata jiwitha xua beta pejinompaenexa”, jei matatsunpin. ²¹Poxonae baya caemūbotha Jesús pia peitorobi jiwi tatsi bara exana xua matatsunpin paeba. Bara Nacom pin pia botha yacuinaya jojoniya pecuidubinexa jiwi.

Barapoxonae sacerdotemonae pia pepa pentacaponaein tatsi, irū saduceomonaeno waba daxita carepaya Israel nacua pia penapatae jiwi xua penacaetutsinexa pentacaitorobi bicheitha. Barapoxonae barapomonae itoroba ichamonae xua Jesús pia peitorobi jiwi tatsi pecuaranobinexatsi pin bicheitha peitabaratha tatsi. ²²Ichitha poxonae policiamonae jiwi pecūbi botha pata, Jesús pia peitorobi jiwi tatsi jopa taetsi. Daxota policiamonae diwesiyo caibeya capona pin bicheito peitabaratha. ²³Policiamonae namchi, jeye:

—Poxonae papatan jiwi pecūbi botha, soldadomonae pomonae peewatsiwi barapo pecūbi botha barapo soldadomonae pecoiboto yabara umena, daunwei tsuncuae. Poxonae pasaranaxoyan jopa paitaraerowinyo Jesús pia peitorobi jiwi tatsi. Jiwaibi. Aichurubena, jei.

²⁴Poxonae sacerdotemonae pia pepa pentacaponaein tatsi, irū Nacom pin pia bo peyabara umenaewi pia pentacaponaein tatsi, irū sacerdotemonae pia pentacaponaei tatsi jume tane baxua, bapoxonae najūntū coyene benaecaeya nayainyaba, jeye: “¿Exota metha jane Jesús

pia peitorobi jiwi tatsi? ¿Exua jane?” jei. ²⁵Iruru barapoxonae pebin patopa. Barapomonae baraichi, jeye:

—Ja, pomonae jiwi pecubi botha pacaponame, barapomonae Nacom pin pia botha umena. Matautano cuiduba jiwi, jei bapon.

²⁶Nacom pin pia bo peyabara umenaewi barapomonae pia pentacaponaein tatsi bapon baru pona policiamonaeno Nacom pin pia botha. Equeicha caewa baru dendenatsi Jesús pia peitorobi jiwi tatsi ichaxota nacaetuta pentacaitorobi bicheito. Saya jopa abe exanaetsi poxonae teicatsi. Saya baru cui wunaeya carendenatsi poxoru barapo policiamonae jiwi cui cunuwatsi. Daxota policiamonae saya be xainyatha teica barapomonae xua jiwi pecuiyainwaxae tatsi xua policiamonae pecuinbabiwa tsipaetsi ibotixitha. ²⁷Nacom pin pia bo peyabara umenaewi pia pentacaponaein tatsino, barapomonae Jesús pia peitorobi jiwi tatsi capoinchi pentacaitorobi bicheito peitabaratha. Sacerdotemonae pia pepa pentacaponaein tatsi bapon, Jesús pia peitorobi jiwi tatsi baraichi, jeye:

²⁸—Bayatha jume daunweya paca tsipaebatsiba: ‘Equeicha jopa Jesús payabara paebinde’, pajan. ¿Ichitha eta xua paexaname? Daxita carepaya Jerusalén tomarapiwi yaputane pocotsiwa paxam pacuidubame Jesús yabara. Yawa painya metha paebichi xua paxan panatsiaena cuentan Nacomtha tupa pata exanaexae Jesús, jei barapo pentacaitorobi bicheito.

²⁹Nexata Pedro iru ichamonae pomonae Jesús pia peitorobi jiwi tatsi daxita barapo matabuxuyobe jume nota barapomonaetha, jeye:

—Apara jame bewa paexanaein pocotsiwa Nacom pana itoroba. Nacom pia peitorobi coyenewa ainya cui beyacaincha jiwi pia peitorobi coyene tatsi. ³⁰Pata amo susato jiwi pia Nacom tatsi, barapo Nacom Jesús equeicha petupaein asu exanatsi pon xua pabexubame, poxonae naetotha tupa ruca paexanadutame. ³¹Nacom Pexanto pia peayapusuwatha exana yatsicaya jiwi pia pepa Pecanamataxeinaein tatsi. Yawa exana pexanto pon jiwi Pecapanenebiyaein. Baxua exana poxonae pecoxatha taecatsi pexanto. Nacom baxua exana tsipei ichichipa xua Israel nacuapiwi icha juntu cui coyene xeinaena bapontha, xua bapoxonae barapomonae Nacom pecui yabara junte mainaenexa po coyene xua barapomonae Nacom tsita natsicuentatsi xua abe pe-eexanaexae. ³²Bara yatsicaya pata cui taewi daxita baxuan, Nacom pia Pejumo pe tunaxu tatsi iru taneru. Daxota paca tsipaebatsi baxua, pocotsiwa xua Jesús exana. Nacom najumo pe cata pomonaetha pomonae xua peichichipaewa xua peexanaewa pocotsiwa Nacom itoroba, jei Jesús pia peitorobi jiwi tatsi.

³³Pentacaitorobi bicheito jume taerucupa xua pocotsiwa paeba barapomonae pomonae Jesús pia peitorobiwatsi. Bapoxonae barapomonae bichocono casebarucupatsi. Barapo pentacaitorobi bicheito ichichipa xua barapo Jesús pia peitorobiwatsi tatsi pejutebiwatsi. ³⁴Barapo

pentacaitorobi bicheitho eca fariseomonaepin pewun Gamaliel, pon jiwi pecuidubin Moisés pia peitorobi coyene tatsi. Jiwi bapon baru cui itura jineibatsi. Bapon asiya uncua yawa itoroba xua bara caeto pesato becayiya tsainchi barapomona pomona Jesús pia peitorobi jiwi tatsi. ³⁵Bapoxona bapon Gamaliel barai barapomona pomona pentacaitorobi bicheitho, jeye:

—Paxam pomona Israel nacuamonaepiwi pamxaem, dota pam xua pocotsi coyeneya pacana exanaename barapomona. ³⁶Metha bara pajuntemainame poxona matha bapon Teudas poxona pia coya pentacaponaein naexana, nayabara pæba xua pinae bichocono peainya cui jiton. Cuatrocientos pebiwimona matabaxube puna jinompatsi bapon. Ichitha poxona Teudas bexotsi ichamona, bapoxona pijimona tatsi dncupa, poxona daxita yotabatsi. Saya xua Teudas exana baxua pecui paw. ³⁷Barichi Teudas pepuya weya ichun patopa pon pewun Judas. Bapon pentacaponaein najainta poxona jiwi pewun tinae matakabi tsuxubi. Bapon Galilea nacupin. Piamona pin bicheito puna jinompatsiru, ichitha barichi bapon Judas bexotsi ichamona. Barichiru pijimona tatsi tarucupatsi poxona yotabatsi. ³⁸Daxota paca jeichi: ‘Jesús pia peitorobi jiwi tatsi bara pacui copabare’, jan. Icha barapomona saya exanaetsipa xua jiwi itoroba, nexata barapomona jopa amanayabichipae pocotsiwa xua ichichipa peexanaewa. ³⁹Ichitha icha barapomona exanaetsipa pocotsiwa Nacom itoroba, nexata paxam jopa pacui amanayabichipaem barapomona. Dota pam. Daxota jopa paexanaponaeinde po coyene xua Nacom pia peaitafaetabi jiwichi pana naexanaponame, jei Gamaliel.

Barapomona pomona pentacaitorobi bicheito bara jopa pecuiyo Gamaliel pepaebixae. ⁴⁰Barapoxona barapomona pomona pentacaitorobi bicheito equeicha wabatsi Jesús pia peitorobi jiwi tatsi. Bapoxona matha copiya ichamona itorobatsi xua Jesús pia peitorobi jiwi tatsi pecuainchinexatsi. Equeicha jume daunweya tsipaebatsi: “Equeicha jopa Jesús payabara papaebim tsane”, jei. Bapoxona pu copababatsi nama Jesús pia peitorobi jiwi tatsi. ⁴¹Jesús pia peitorobi jiwi tatsi pentacaitorobi bicheito weya pona. Barapomona juntu coyene weiweina tsipei peraxa exanatsi ichamona, Jesús pijimonaexae xua baxua saya Nacom pecopatsixae. ⁴²Awia barapomona amsiya yabara cuiduba, Nacom pin pia botha Jesús pia pexeinya jume diwesi yawa xua boxithano. Matautano cuidubano xua Jesús apara Mesías pon Nacom itorobica.

**Meje yabara poxona Jesús pia peitorobi jiwi tatsi itapeta
siete poyobe peyawenaenexa tsane ichamonaetha**

6 ¹Barapoxona barapo mataqueitha pinmona jume cowunta Jesús. Pomona xua griego jume pecueicueijeijiwi anaya tsipaeba,

pomonae xua hebreo jume pecueicueijeiji baraichi, jeye: “Patamonae, powaxi pecuenta werapaewaxichi piseurixi powaxi griego jume pecueicueijeiwaxi poxonae judiomonae apata pexaewa, barapowaxi saya peyaxi apatatsi pexaewa. Ichitha meisa judiomonaewaxi powaxi pecuenta werapaewaxichi barapowaxi jopa juniya nabaneibiyo”, jei. ²Jesús pia peitorobi jiwi tatsi, pomonae doce poyobe, barapomonae baru nacaetuta ichamonae pomonae iru Nacom pejume cowuntsiwi. Barapomonae pomonae Jesús pia peitorobi jiwi tatsi jeye barapomonaetha:

—Painta jopa yapu xanepanaeyo xua pata nacui barapentsiwa xua pata cueicueijeiwa Nacom Pejume Diwesi xua saya pexaewa pata apatsinexa jiwi. ³Daxota wajiwimonae paitapere siete poyobe pebinbe paxam jiwana. Paitapere pomonae xua daxita jiwi ita cui juntu coyene xanepaneibatsi, pomonae xua juntu coyene yucatsi Nacom pia Pejumope tñaxu tatsi pia peayapusuwatha tatsi, pomonae xua peyaputaewi. Barapo siete poyobe pacui itorobin xua pexaewa apateibina. ⁴Bapoxonae paxan Jesús pia peitorobiwi tatsi pan, jopa paapatsin tsane pexaewa. Saya meisa Nacom pata tsipaebeibichi nawita yawa pata cueicueije tsaibichi Jesús pejume diwesi, jei barapomonae.

⁵Jesús pejume cowuntsi jiwi tatsi nanta jupaya nanta xeinaruçupa. Bapoxonae Esteban itapetatsi. Bapon Esteban pon bichocono jume cowunta Jesús yawa bichocono juntu yucatsi Nacom pia Pejumope tñaxu tatsi pia peayapusuwa tatsi. Itapetatsi Felipeño, iru Prócoro, iru Nicanor, iru Timón, iru Parmenas, iru Nicolás. Bapon Nicolás Antioquía tomarapin. Bapon copiya jopa naexanaeyo judiomonaepin. Poxonae jume cowunta Nacom, bapoxonae judiomonaepin naexana. ⁶Barapoxonae barapo siete poyobe Jesús pejume cowuntsi jiwi tatsi capona Jesús pia peitorobi jiwi tatsitha. Jesús pia peitorobi jiwi tatsi mata jayabiya tawuca Nacomtha xua Nacom yawenaena barapomonae.

⁷Pinmonae jume tane Nacom Pejume Diwesi. Pinmonaeno iru jume cowunta Cristo Jesús, pomonae Jerusalén tomaratha jinompa. Iru judiomonae pia sacerdotemonae tatsi, barapocotsimonae pin bicheito jume cowunta.

Meje yabara poxonae Esteban waetabatsi

⁸Esteban pexeinya petsita itutsi coyenewan exaneiba jiwitha Nacom pia peayapusu itorobi coyenewatha tatsi. Tsipei Nacom yanta popona bapon daxota Esteban Nacom yaweneibatsi pecatsixaetsi peayapusuwa. ⁹Nexata nacaetuta pinmonae judiomonae pia penacaetutsi botha tatsi. Ichamonae wun dutatsi xua jeichichi: “Pomonae pepu sorobabebiwichi poxonae busi cui tatayebebatsi”, yabara wun jeichichi. Iru nanacaetutapona Cirene tomarapiwi, iru Alejandría tomarapiwi, iru Cilicia nacuariwi iru

Asia nacuapiwi. Daxita barapomonaē Esteban jume matsontsonobatsi. ¹⁰Ichitha Esteban xaniwaicha cueicueijejei exanatsi Nacom pia Pejumope tñaxu tatsi. Daxota poxonaē Esteban paeba barapomonaē jopa itacupaetsi xua beta pejume notsiwa. ¹¹Nexata barapomonaē po pin bicheito penacaetutsimonaē ichamonaē nantsiyatsiya catatsi paratixi petacamuxuitorobinexa tsainchi xua Esteban paeba. Barapomonaē pomonaē pemuxuitorobi jiwi namchi xua Esteban Moisés baraunchichi abe jei, yawa xua Nacom baraunchichi abe jei. ¹²Barapo jumetha pemuxuitorobi jiwi daxita jiwi anaepana exanatsi xua Esteban jume canaerabatsi. Pitiri jiwino anaepana. Irũ pomonaē jiwi pecuidubiwi Moisés pia peitorobi coyene tatsi barapomonaeno irũ anaepana. Daxota barapo penapatae jiwi irũ pomonaē jiwi pecuidubiwi Moisés pia peitorobi coyene tatsi barapomonaē Esteban yorobateicatsi. Pentacaitorobi bicheito peitabaratha capoinchi. ¹³Barapo pentacaitorobi bicheito equeicha waba pomonaē Esteban jume cui canaerabatsi wabatsi. Barapomonaē pomonaē penaerabiwi Esteban yabara jeichichi:

—Bapon Esteban Nacom pin pia bo tatsi baraunchichi abe jei. Barichi bapon Esteban Moisés pia peitorobi coyenewa tatsi baraunchichi abe jei. ¹⁴Pajume tan, xua Esteban paeba xua pinae Jesús Nazaret tomarapin paeba. Jesús pinae namchi, pinae jeye: ‘Barapo bo Nacom pin pia bo tantanaca exanaein’, pinae jei Jesús. Equeicha Esteban namchi xua pinae Jesús paeba pinae jeye: ‘Tamropata pitaban po peitorobi coyenewa xua bayatha Moisés paca itoroba’, jei pinae bapon Jesús, jei barapomonaē pomonaē penaerabiwi.

¹⁵Pomonaē baxota ena pomonaē pentacaitorobi bicheito, barapomonaē Esteban necotenatsi. Barapomonaē itabara tayena xua Esteban peitabara be matatsunpin itabara, xua bichocono wũnae.

Meja yabara poxonaē Esteban pentacaitorobi bicheito itabaratha pia coya paeba

7 ¹Nexata sacerdotemonaē pia pepa pentacaponaein tatsi bapon Esteban baraichi, jeichi: “¿Bara xainyei xua barapomonaē cabarai?” jei sacerdotemonaē pia pepa pentacaponaein tatsi. ²Esteban jume nota, jeye: “Tamonaē pam pana nejume taema. Wanacom wũnae nawita. Barapon Abraham tsita naitutatsi poxonaē caena bayatha awiya Mesopotamia nacuatha popona. Bapon Abraham wamo susatopin matha copiya tsiwanaeya popona Mesopotamia nacuatha poxonaē Harán tomara bewarapiya. ³Nacom pinae Abraham baraichi: ‘Barapo ira jinya ira cuenta warapare. Jinyamonaeno cuenta warapare. Icha ira bewarapiyama ichaxota po ira beya cacaponaeinchi’, jei pinae Nacom. ⁴Nexata pinae Abraham Caldea nacua wewarapiya. Harán tomara pinae bewarapiya. Poxonaē pinae Abraham Harán tomaratha popona

pinae Abraham paxa tatupatsi pon pewun Taré. Bapoxonae Nacom, Abraham pinae itorobatsi barapo irathe po irathe pajinompage anoxuae. ⁵Barapoxonae pinae Abraham cataunxuae jopa catichi ira. Saya pinae tacayabara wunae tsimumu dutatsi. Nacom pinae Abraham baraichi: 'Jinya ira tsane, iru jinya jiwi penaitapataya naexana dubenaponeibiwi tsane pomonae jinya nemomo susato jiwi pia ira nexa tsaneru', jei pinae Nacom. Ichitha pinae barapoxonae jopa xeinaeyo pexui. ⁶Baraxua Nacom pinae Abraham baraichi: 'Jinya nemomo susato jiwi icha nacuatha jinompaena. Be pomonae penanapaincha jinompaewi tsicotaeinchi xua be pocotsi jiwimonae icha nacia werena peponaewi. Tanacuitinchi ichamonae xua amanaya tanacuichina. Busi cui tatayebeibinchino. Caitacueintinchino yawa. Cuatrocientos po weiyobe tsane xua jinyamonae naitapataya atene exaneibinchi', jei Nacom Abrahamtha. ⁷Equeicha Nacom tsipaeba Abraham, jeye: 'Barapomonae xua abe pacata exanaena poxonae paca busi cui tataibina barapomonae jopa cui junteinaein tsane. Barapomonae itawetsiya peraxa jubin. Bapoxonae jinya nemomoxi susato jiwi warapaena po nacuathe ichaxota uncuame yawa wunae nejainchina xote', jei pinae Nacom Abrahamtha. ⁸Nacom pinae Abraham itorobatsi xua peexanaenexa po coyene xua pexui pebin wutixi pewi thabiwatsi xua ichaxota nareixacaena. Barapo coyene exana Abraham penanta xeinaenexa iru piamonae tatsi xua po coyene bayatha Nacom pinae yabara tsiwunae muxu duta, xua bepa pinae yaweneibina xua barapomonae pinae bepa yaweneibinchi. Daxota pinae poxonae Abraham pexanto tanaexanatsi pexanto wi thaba, pinae pewun Isaac. Isaac iru pinae barichi pexanto wi thaba, pinae pewun Jacob. Jacob iru pinae barichi wi thaba pexanto jiwi, pomonae bayatha Israel nacuamonaepiwi pia pentacaponae tanaexanatsi barapo doce poyobe. ⁹'Jacob pia pexanto jiwi tatsi, barapo doce poyobe, wamo susatomonae. Barapo doce poyobe jiwana caein pewun José. José pentapin jiwi uwatsi. Daxota José pentapin jiwi caenaetatsi. Pomonae bapon José comotatsi barapomonae José Egipto nacia becayiyatsi. Pon be jiwi pebusi cui tataibinchi be bapocotsin petsicotaenexa tsainchi. Ichitha Nacom José yawenatsi pebaru poponaexaetsi. ¹⁰Poxonae José abe jume baranchaibichi ichamonae, yawa poxonae muxu atene peexaneibichi awiya José capanepeibatsi Nacom. Poxonae faraón peitabaratha taponatsi José, Nacom exana xua José faraón tsita juntu coyene xanapanatsi. Matautano Nacom peyaputaen exanano. Bapon faraón Egipto nacuamonae pia pepa peewatsinchi tatsi. Faraón cana exana xua José Egipto nacuapiwi yanacia ewatatsi faraón nexa. Matautano faraón cana exana xua José canamataxeina daxita xua xuan faraón xeina. ¹¹'Barapoxonae Egipto nacuatha jainbo nacia tsurucuaeno, Canaan nacuathano iru. Pata amo susato jiwi jopa pexaewa taeyo. Yawa piyain

pewerapae nacua tsurucuae poxoru pexaewa ajibi. ¹²Poxonae Jacob jume tane xua trigo xu xeina Egipto nacuatha, pia pexui bara beitorobiya. Barapon Jacob pia pexui tatsi, pata amo susato jiwi. Baraxua poxonae xua copiya aena pona Egipto nacuatha. ¹³Poxonae equeicha pona José pentapin jiwi tsita naitapeinya xeina xua bapon bara peweicho jiwi tatsi. Bapoxonae faraón yaputane xua barapomonae apara bara José piamonae tatsi. ¹⁴Pirapae José pentapin jiwi itoroba xua petabarũ dendenaenexatsi paxa tatsi, pon pewũ Jacob, mataũtano piamonae tatsi petabarũ dendenaenexatsi po jiwimonaexae xua setenta y cinco poyobe. ¹⁵Daxota Jacob irũ pijimonaeno Egipto nacua beya warapa. Baxota pirapae bapon tũpa. Irũ pirapae pata amo susato jiwino weraparũ baxota. ¹⁶Pirapaeno Jacob piwan capoinchi Siquem tomara beya. Baxota piwan mũthũtha xotsi, po ira bayatha Abraham comota, po ira Hamor pexantixi tatsi caenaeta.

¹⁷“Ainya wei tsuxubi. Poxonae barapomonae Egipto nacua wewarapiyaenaba, be pocotsi coyeneya bayatha Nacom yabara tsiwũnae muxu duta, bapoxonae Israel nacuapiwi pinmonae naexana. ¹⁸Nexata Egipto nacuatha ichũn nacua peewatsin naexana, pon José jopa yaputaetsi. ¹⁹Barapo Egipto nacuapiwi itorobiya pia pepa peewatsinchi tatsi pata amo susato jiwi muxuitorobeibatsi. Yawa cuainteibatsino. Yawa cobe itorobeibatsino xua pexui saya pebebainexa tsalibi tsane aisowatha xua pewerapeibinexa. ²⁰Barapoxonae irũ Moisés naexanarũ. Moisés paxa pia botha wihatatsi acoibi po xometiyobe. Barapon Moisés pexeinyan nawita Nacom tsita jũntũ coyene xanepanecatsi barapo pexuyo. ²¹Poxonae Moisés pena xotsi yawa paxa xotsi namicha jeriyotha yana botetatsi mentha xua musuripawa cuba, barapoxonae faraón pexantiyo tatsi Moisés pitatsi. Be pexanto tsicotane, pia botha wichata. ²²Bapon Moisés nacuiduba nawita pocotsiwa Egipto nacuamonae yaputane. Daxota peyaputaein tsecaeno, wũnae peexanaein tsecaeno.

²³“Pirapae poxonae Moisés yacurenta po weibe jopa, bapon nanta xeina xua piamonae pesiwa ponaewa pomonae Israel nacuamonaexae. ²⁴Poxonae Moisés piamonae siwa pona, bapon tane xua piamonae jiwana tatsi tabũtsi, Egipto nacuapin. Daxota Moisés yawena pon piamonae jiwanaexae tatsi yawa bexuba Egipto nacuapin. ²⁵Moisés nanta xeina, pia coutha nabarai: ‘Tamonae, Israel nacuamonaepiwi neyaputaena xua Nacom neitoroba. Mata cawarapaein barapomonae Egipto nacua weya, penacapanenebiyaenexa tsane’, najei. Ichitha daũmetha barapomonae jopa tsaqueinaeyo. ²⁶Ichã matacabitha Moisés tane xua caepinbe irũ nababerũ Israel nacuamonaepinbe. Moisés barai baponbe: ‘Ja, ¿eta xua metha caepinbe pana nabamebe?’ jei. ²⁷Pon piamonae ba, Moisés napuna torobabapoinchi. Moisés baraichi: ‘¿Jintam caitoroba pata xantha xua pon be jiwi neyabara paebin penatsicuentisiwa xua abe peexanaexae,

xuano xua jiwi Necanamataxeinaem naexaname? ²⁸¿Jinya nebexuichi icha mexuae ichim Egipto nacuapin?’ jeichichi Moisés. ²⁹Poxonae Moisés jume taebiriwa baxua, Moisés naetsiricua Madián nacua benaetsiricuiya. Baxota Moisés tanaexanatsi pexuyobe, pebin wutobe”, jei Esteban.

³⁰Equeicha came Esteban barapomonae baru cueicueije. Namchi, jeye: “Caentacabi pirapae poxonae cuarenta po weibe pu caewa, xua poxonae equeicha icha cuarenta po weibe xeina, Moisés popona ichaxota ira xuepana susato tsurucuae nacuatha. Imoxoyo demxuwana, po demxuwana pewun Sinaí baraxota Moisés tsita naitutatsi matatsunpin xua poxonae isototha uncua xua taxuncua tsica naeyo. ³¹Moisés yabara najuntü coyene cabenaeca. Bapon itatapoinya tsipei ichipa yaitane. Bapoxonae baxota Moisés jume tane xua Nacom namchi: ³²‘Apara jinya amo susato jiwi pia Nacom tatsin. Irü apara, Abraham pia Nacom tatsin. Irürü apara Isaac pia Nacom tatsin. Apara irü Jacob pia Nacom tatsin’, jei Nacom. Moisés pijunuwi bichocono jiyijiyei daxota aichaxaibi xua tane. ³³Nacom pinae Moisés baraichi: ‘Xua nataxu xatatame nataxu wejonde, poxoru po iratha poname apara tairiyo. ³⁴Tamonae, pomonae Egipto nacuatha jinompa bichocono atene exaneibatsi yawa jume tanno xua nanenaba. Daxota barapomonae capanepan. Antha, caitorobatsi equeicha necoyo beya, Egipto nacua beya’, jei pinae Nacom”, jei Esteban.

³⁵Equeicha Esteban namchi, jeye: “Pomonae Egipto nacuatha jinompa, barapomonae Moisés aichaxaibichi. Barapomonae Moisés baraichi: ‘¿Jintam caitoroba pata xantha xua naexaname pon be jiwi neyabara paebin xua penatsicuentisiwa xua abe peexanaexae xuano xua naexaname pon be necanamataxeinaein?’ jei barapomonae. Bequein barapomonae baxua paeba ichitha Nacom cana exana xua bapon Moisés naexana be pon jiwi peyabara paebin xua penatsicuentisiwa xua abe peexanaexae. Matautano Moisés cana exanatsi pon pecapanepaein piamonae. Baxua Moisés naexana poxonae matatsunpin itoroba po matatsunpin Moisés tsita naitutatsi poxonae isototha uncua xua taxuncua tsica naeyo. ³⁶Bapon Moisés pon wamo susato jiwi capanepatsi Egipto nacua weya. Moisés petsita itutsi coyenewana exana Nacom pia peayapusuwatha. Baxua exana Egipto nacuatha, Mar Rojo menthano. Matautano exanano ichaxota ira xuepana susato tsurucuae nacuatha cuarenta po weibetha. ³⁷Moisés Israel nacuamonae jiwitha namchi: ‘Nacom paca jiwana cana exanaena pon pia peitorobi jume petapaebinchi icha neichi barichi tsane. Bapon xua pon Nacom itorobina, apara pon painyamonae jiwana tsane’, jei Moisés. ³⁸Matautano apara bapon Moisés pon nanacaetuta poxonae Israel nacuamonae nacaetuta ichaxota ira xuepana susato tsurucuae nacuatha. Matautano bapon Moisés diwesi tsipaeba jiwitha xua petsipaebixaetsi matatsunpin poxonae tsipaebatsi demxuwatha po demxuwana pewun Sinaí. Barapo diwesi po diwesi Moisés wamo susato jiwi tsipaebatsi barapo

diwesi jiwi cana exanatsi xua peajuntuyapusuwa pexeinaewa. Barapo diwesi iru waxainchi nexaru.

³⁹“Ichitha barapomonae wamo susato jiwi jopa bejume jejeyo xua peexanaewa pocotsiwa Moisés itorobatsi Nacom. Moisés jume matawentatsi. Saya barapomonae ichipa xua equeicha caibeya penawibiwa Egipto nacua beya. ⁴⁰Poxonae cataunxuae Moisés demxuwatha pona, barapoxonae barapomonae Moisés peweicho tatsi pon pewun Aarón, bapon baraichi: ‘Painta exande ainya ibo nain nacomun. Barapo ibo nain nacomun naca tsiwana copiya cajjincaena namtotha. Jopa payaputaeyino xua Moisés aichawiya pon pana matacapona Egipto nacua weya’, jeichichi Aarón. ⁴¹Barapoxonae barapomonae penain nacom exana be vacayo pebtiyo canaxobeta. Bapoxonae barapomonae tabexuba oveja, penain nacom vacayo nexa. Tsipei barapomonae nanta xeina xua metha penain nacom ichichipa baxua. Barapomonae bichocono juntu coyene weiweina penain nacom pia coya peexanaexae, xua pin penabanaewa xua pebaru itura jinaenexatsi barapo ibo nacom. ⁴²Barapomonae Nacom wepu tsatajopa tsipei barapomonae pia penain nacom exana. Nacom bara copata barapomonae xua bara barapomonae bara exanaena be pocotsi coyeneya xua ichichipa peexanaewa. Daxota barapomonae opitei be nacom cana exana, po opitei barapomonae wuna jainta. Barapomonae pomonae wamo susatomonae, exana pocotsiwa caena bayatha Nacom pia peitorobi jume pepaebin yabara cui tsiwuna muxu dutsiya tina. Bapon diwesi tina xua Nacom jume yabara tinatsi xua Nacom namchi barapo diwesitha, jeye:

‘Israel nacuamonae, paxam oveja pabexubame painya penain nacomun nexa, ichitha xan nexa jopa paraichim.

Baraxua paexaname poxonae pajinompame ichaxota ira xuepana susato tsurucuae nacuatha xua cuarenta po weibetha.

⁴³Yawa pacaponame penain boutiyo nacom po penein boutiyo nacom pewun Moloc. Yawa pacaponame icha penain opitei nacom po opitei penain nacom pewun Refán. Barapo penain nacombe paexaname painya wuna jaintichi. Daxota xan itorobin ichun xua paca mata cawarapaena Babilonia nacua beya. Bequein jopa bepawarapaem ichitha awiya paca itorobinchi’, jei Nacom.

⁴⁴“Wamo susato jiwi exana xua be bo xua anseraboco, xua ichaxota tututha jeba ibo xua po iboton Moisés mata tina xua Nacom pejume

caitorobiwan. Barapomonaē cuita acaba be pocotsi boyo Moisés tsita itutatsi Nacom. ⁴⁵Wamo susato jiwi poxonae tawerapatsi paxa tatsi, itorein pita barapo boyo xua anseraboco boyo. Pata tamo jiwi Nacom pia boyo capona poxonae Josué naponā. Poxonae pata tamo jiwi ainya nacuan nonota tsiniya barapoxonae equeicha barapo anseraboco boyo capona beya yacobe cui matakabi othopa poxonae David popona pon Israel nacuapiwi itorobiya pia pepa peewatsinchi. ⁴⁶Bapon David pon Israel nacuapiwi itorobiya pia pepa peewatsinchi tatsi, Nacom tsita pejuntũ coyene xanepanaeinchi. Bapon David ichichipa xua acaba pin bo Nacom nexa po Nacom Jacob pia Nacom tatsi. ⁴⁷Ichitha Salomón bapon apara pon Nacom pin pia bo exana. ⁴⁸Bequein Nacom pon pepa Nacom jopa poponaeyo botha pocotsi bo jiwi acaba Nacom nexa. Nacom peitorobi jume pepaebin baxua yabara paeba xua Nacom tapaebatsi, jeye:

⁴⁹ ‘Peitaboco apara ichaxota taequeibithopeibiwa.

Ira apara ichaxota nataxu yutabotan.

¿Eta pocotsi bo netsiexanaename?’

jei pon Wanacanamataxeinaein.

Matautano jeino: ‘Ichacuiſtha ſeta po irara xua ichaxota nafinacaecaein?’

⁵⁰ Apara xan tacoutha exanan daxita ira yawa peitaboco daxota jopa nantawenonaeyo xua ichawa tana netsiexanaewam’, jei Nacom”, jei Esteban.

⁵¹ Equeicha Esteban barai, jeye: “Maisa bichocono pajuntũ coyene daunwam xua jopa bepayaſputaem. Matautano pamuxu tutu daunwam, yawano pajuntũ coyene daunwam icha be pocotsimonaē ichi pomonaē jopa peyaſputaewi Nacom. Barichi paaichaxaibim Nacom pia Pejumope tũnaxũ tatsi. Paxam bara paichim icha painya amo susato jiwi ichi.

⁵² Apara painya amo susato jiwi bayatha Nacom pia peitorobi jume pepaebiwi catsa jume barũ paebatsi, yawa cueintatsino. Matautano bayatha jutebatsi barapomonaē pomonaē Nacom pia peitorobi jume pepaebiwi, pomonaē namchi: ‘Bexa patopaena pon pepa pejuntũ xanepanaein pon Meſías baraichi’, jei. Cain paxam, barapon poxonae patopa, pacaenaetame, pabexubameno. ⁵³ Nacom pia peitorobi diwesi pajume taneme xua matatsunpiwi paca tsipaeba Nacom nexa. Ichitha jopa paexanaem pocotsiwa Nacom paca itoroba barapo pia peitorobi diwesitha”, jei Esteban pentacaitorobi bicheithoſa.

Meje yabara poxonae Esteban tũpa

⁵⁴ Poxonae pentacaitorobi bicheito jume tane pocotsiwa Esteban paeba, bapoxonae bichocono Esteban yabara cui anaepanarũcupatsi. ⁵⁵ Ichitha Esteban bichocono jũntũ coyene yũca cana exainchi Nacom pia Pejumope

tunaxu tatsi pia peayapusuwatha. Esteban athabeicha necoicha. Bapon necota Nacom pia peitupanae coicha tatsi iru Jesucristo xua uncua Nacom pecoxatha tatsi. ⁵⁶Nexata Esteban namchi, jeye:

—Incane pataema. Necotan xua peitaboco naitaboco coibo yausaranaxuba. Tan Jesús xua uncua Nacom pecoxa weya tatsi ponxae Nacom pia Peitapetsin tatsi, jei Esteban.

⁵⁷Barapomonaе jume itapataya namuxu acaba pocotsiwa Esteban paeba. Yawa anaepanaya wawai. Barapomonaе be cae bicheito naexana pomonaе Esteban betacuinaeyiyatsi. ⁵⁸Barapomonaе Esteban aisowa bexoyatsi tomara weya. Yawa baraxota ibotontha cuinbabatsi. Pomonaе abe peexanaewichi Esteban, barapomonaе Saulo juma camisa jeba xua pocotsiwan nainya werubiya. Bapon Saulo pon pewowin xua bayatha pinyo.

⁵⁹Poxonaе barapomonaе Esteban cuinbabompatsi ibotontha bapoxonaе Esteban tsipaeba Nacomtha, jeye: “Jesús, pon Tanecanamataxeinaem, nejumope tunaxu pire”, jei Esteban. ⁶⁰Bapoxonaе pentabocototha uncua. Namtsebiya wawaino, jeye: “¡Jesús, Tanecanamataxeinaem! ¡Necana cui jüntemainare, yawa jopa neyantomatsinde xua barapomonaе inta abe exana!” jei Esteban.

Poxonaе najume wetaba, tupanaicha Esteban.

8 ¹Saulo iru baru ita cui wunaetsi poxonaе ichamonaе Esteban bexotsi.

Meje yabara poxonaе Saulo abe exana pomonaetha pomonaе Jesús pejume cowantsiwi

Po matabitha Esteban bexotsi, barapo matabitha judiomonaе tamropata notarucupa xua Jesús pejume cowantsi jiwi tatsi bichocono abe exanatsi Jerusalén tomaratha. Daxita Jesús pejume cowantsi jiwi tatsi yotabatsi. Ichamonaе Judea nacia berucupiya, ichamonaе Samaria nacia berucupiya. Meisa Jesús pia peitorobi jiwi tatsi pomonaе xua doce poyobe ena Jerusalén tomaratha. Jopa ducupaeyo. ²Ichamonaе, pomonaе Nacom pejume cowantsiwichi, Esteban muthutha xotsi. Barapomonaе Esteban bichocono siwa wecyeichi. ³Saulo jeita ducuaeta Jesucristo pia pejume cowantsi jiwi tatsi. Daxita bomuxun jupaya Saulo jiwi teteica tsiniya yabuxino pebiwino. Jiwi pecubi bo beya capona.

Meje yabara poxonaе Jesús pejume cowantsi jiwi tatsi paeba dubenaеbiya Jesús pia pexeinya jume diwesi tatsi Samaria nacuatha

⁴Pomonaе bewa Jerusalén tomara werucupiyaena barapomonaе Jesucristo pia pecapanepae jume diwesi paeba dubenaеbiya daxita po tomarantha xua pateiba. ⁵Barapomonaе jiwana tatsi pon Felipe baraichi bapon pona pepa tomaratha Samaria nacuatha. Barapo tomaratha tamropata pitaba

xua pecueicueijeixa Cristo yabara. ⁶Jiwi nacaetuta dubenanaebiya. Matautano jume naitomatsiya jume taerubenanaebiya pocotsiwa Felipe cueicueijeixa Cristo yabara. Matautano barapomona taerubenanaebiya pexeinya petsita itutsi coyenewan xua Felipe exana Nacom pia peayapusu itorobi coyenewatha. ⁷Pomona xua cauri pexeinaewi, barapomona equeicha axaibi exanatsi poxona Felipe taitaweta cauri. Matautano caurimona barapomona wawaya wepu ducpeibatsi. Ichamona pomona pecuenobichi jiwi, pejayujajujeimonaeno, daxita barapomona axaibi exanatsi. ⁸Felipe baxua peexanaexae daxota barapo tomarapiwi bichocono juntu coyene weiweinaya jinompa.

⁹Barapo Samaria tomaratha popona pon pentawun Simón. Bapon Simón mara pexeinaein. Matautano bapon barapo Samaria tomarapiwi muxujainyabeibatsi poxona bapon pia coya pentacaponaein naexana. ¹⁰Daxita tomarapiwi pomona peacopeibiwi iru pomona nawita pexeinaewino, barapomona beta jume naitaewata pocotsiwa Simón paeba. Barapomona namchi, jeye: “Barapon Simón apara pon yabara jeichichi: ‘Pon bichocono Nacom pia peayapusuwa tatsi xeina’, yabara jeichi”, jei barapomona.

¹¹Daxita barapo tomarapiwi itapeta jume naitaewata pocotsiwa Simón paeba, tsipei saya caena bayatha barapomona muxujainyabatsi mara peexanaewi pia coyenyatha tatsi. ¹²Barapomona jume cowunta po pexeinya jume diwesi Felipe cueicueijeixa xua Nacom yawa Jesucristo yabara, po diwesi xua Nacom waba jiwi petanaexanaenexatsi pijimona tatsi jiwana pomona Nacom itorobiya ewata. Bapoxona barapomona bautisabatsi pebiwi yawa yabuxino. ¹³Bapoxona bapon Simón iru jume cowunta. Irano bapon bautisabatsi. Matautano bapon tamropata pitaba xua Felipe peyantsiwatsi. Bapon Simón yabara najuntu coyene cabenaeca bichocono poxona Felipe pexeinya petsita itutsi coyenewan exana Nacom pia peayapusuwatha.

¹⁴Jesucristo pia peitorobi jiwi tatsi, pomona peenaexae Jerusalén tomaratha, jume tane xua Samaria nacuamona jume cowunta Nacom Pejume Diwesi. Daxota barapomona Pedro itorobatsi iru Juan itorobatsi, Samaria nacuamona beya. ¹⁵Poxona Juan Pedrobe patopabe barapomonaetha, bapoxona Nacomtha tawucabe Samaria nacuapiwi nexa, pomona pejume cowuntsixae Nacom. Baponbe ichichipabe xua barapomona peyanaba jinompaenexatsi Nacom pia Pejumope tunaxu tatsi. ¹⁶Pedro iru Juan tawucabe barapomona Nacomtha. Tsipei barapomona awiya cataunxuae jopa tapatichi pia juntu coyeneintha Nacom pia Pejumope tunaxu tatsi. Saya meisa poxoru bautisabatsi Jesús pon Pecanamataxeinaein jiwi bapon pewuntha tatsi. ¹⁷Pedro iru Juan, pecobetha mata jayababe barapomona. Barapoxona barapomona tapatatsi pia juntu coyeneintha tatsi Nacom pia Pejumope tunaxu tatsi.

¹⁸Poxonae Simón cui tane xua Pedro Juanno pecobetha mata jayababe xua daxota Nacom pia Pejumope t̄nax̄ t̄atsi tapatatsi barapomonaē, Simón ichichipa xua pecatsiwa paratixi baponbetha. ¹⁹Simón namchi, jeye:

—Dapo peayapus̄wa necare. Tha ir̄u poxonae mata jayabeiban ichamonaē tapateibinchi Nacom pia Pejumope t̄nax̄ t̄atsi, jei Simón.

²⁰Nexata Pedro Simón baraichi, jeye:

—Barab̄u xam yawa jinya paratixino cayawa muxuna weraweraca exanaena, tsipei saya nanta xeiname xua necaitac̄paewa xua Nacom pia peayapus̄wa t̄atsi necomotsiwa paratixitha, po peayapus̄wa bequein Nacom amanaya pecatsiwa jiwitha. ²¹Jopa caitac̄paeyo xua nexainaewa Nacom pia peayapus̄wa t̄atsi, tsipei apara Nacom caj̄nt̄u coyene yaputane xua neaj̄nt̄ucoyenebewa. ²²Nacui baraxore jinya abe neexanaē cuiru coyenein. Nacom w̄care, xain Nacom cayabara j̄nt̄emaina xua nanta xeiname baxua. ²³Catainchi xua pejume uwiwa nenth̄totha xeiname. Xam neabewa canth̄th̄u yancababa daxota beta jopa xapain poponaem, abe nanta xeiname jincoutha, jei Pedro.

²⁴Nexata Simón jume nota. Pedro ir̄u Juan jume notatsibe, jeye:

—Painta yabara w̄carebe Nacomtha baxua xuaunxuae pana netsipaebamebe, xain bapoxonae xeinaein barapo coyene xua jopa abe tana necana exanaenexa, jei Simón.

²⁵Bapoxonae Pedro Juanno ichamonaetha nacui yopitabe po coyene xua bayatha jume cow̄nt̄abe Nacom. Yawa xua penth̄totha taecatsibe Nacom pia Pejumope t̄nax̄ t̄atsi. Baponbe Nacom pia pexeinya jume diwesi tsipaebabe barapomonaetha. Jerusalén tomara bewarapiyabe. Poxonae warapabe, Jesús pia pexeinya jume diwesi papaeba tsiniyabe Samaria nacuatha. Ainya tomarantha cueicueijeibe.

Meje yabara xua poxonae Felipe ir̄u Etiopía nacuapin nantenta ponabe namtotha

²⁶Barapoxonae pirapae, Jesucristo pon Pecanamataxeinaein jiji, bapon pia matatsunpin t̄atsi, Felipe tsita naitutsiya tsipaebatsi, jeichichi: “Nontaponde, yawa ponde pocotsiwa parowa bereca. Jerusalén namto iyande xua po namto Gaza tomara betaerucuiya”, jei matatsunpin. Barapo namto ducuiya ichaxoyo ira xuepana susato tsurucuae nacua iya. ²⁷Felipe nantacotaxuba, bapoxonae bara ponataba. Poxonae Felipe namtotha ecapona, bapoxonae caxina pebin Etiopía nacuapin. Barapon pon pentacaponaein pon peainya cui jiton. Matautano bapon paratixi tayapu eena xua yab̄yo nexa powa Etiopía nacua pepa peewatsiwayo. Bapon Etiopía nacuapin bayatha pona Jerusalén tomara beya xua w̄naē pejainchinexa Nacom. ²⁸Bapon caewa pia nacua siwa ecapona Etiopía nacua. Cawayu pecaponae naeyotha ecapona yawa yorobecapona po diwesi bayatha Isaf̄as tina, pon Nacom peitorobi jume pepaebin.

²⁹Nacom pia Pejumoſe tũnaxũ tatsi Felipe baraichi, jeye: “Imoxoyo ponde cawayu pecaponae naeyo beya yawa imoxoyo caquita naecaponde”, jeichichi Felipe. ³⁰Felipe cuinaepona cawayu pecaponae naeyo beya, ichaxota jume tane xua yoroba Etiopía nacuapin. Bapon yoroba Nacom Pejume Diwesi, xua po diwesi bayatha Isaías tina. Felipe barai bapontha jeye:

—¿Bara yaputaneme xuaunxuae yorobame? jei.

³¹Bapon Felipe jume notatsi, jeye:

—¿Eta bichin xua tayaputaewa icha dapon aibi pon yabara neyaputane exana barapo diwesi? jeichi Felipe.

Felipe wabatsi xua penontabinaenexa xuano xua peecaenexa ichaxota bapon eca. ³²Po diwesi ichaxota bapon yoroba xua baxue meje:

“Be poxonae jiwi oveja yamũ capona
pebexubinexa tsane, barichi tsane jiwi
caponaena jiton pebexubinexa tsane.
Be cordero moya, jopa papayo poxonae na thabatsi
barichi tsane jiton moya tsane, jopa papai
tsane poxonae caitacueintinchi poxonae
yawa aperutane tsaneno.

³³Jiton ura exanaeinchi.

Jiwi ura exanaena.

Jopa beta yabara exanae tsainchi
poxonae jiton atene tsane poxonae
jopa bequein abe exanaeyo.

Jiwi jopa yabara paebi tsane xua pia
pexui tatsi, poxoru jopa nantausti
tsane pexui, pemomoxino.

Jiwi barapo jiton bexubinchi”, jei Nacom
Pejume Diwesi, po diwesi Isaías tina xua
ichaxota yoroba Etiopía nacuapin.

³⁴Nexata Felipe yainyabatsi Etiopía nacuapin, jeichichi:

—Incane netsipaebare, ¿jintam Isaías yabara jei? ¿Pia coutha nayabara jei jampa? ¿Bara metha ichũn yabara jeichi? jeichichi Felipe Etiopía nacuapin.

³⁵Felipe yaputane exana Etiopía nacuapin po diwesi xua Isaías tina Jesús jume yabara. Bapoxonae nama paeba po coyene Jesús pia pexeinya jume diwesi tatsi. ³⁶Poxonae Felipe Etiopía nacuapinno namtotha ecaponabe, bapoxonae Etiopía nacuapin namchi, jeye:

—Taema meniyo eque jeba. ¿Jopa nebautisabim tsane? jeichichi Felipe.

³⁷Felipe barai, jeye:

—Icha daxita carepaya jume cowũntame nejũntũ coyenetha,
methaunxuae bara cabautisabinchi, jei Felipe.

Etiopía nacuapin Felipe jume notatsi, jeye:

—Bara yabara jume cowuntan xua Jesucristo, bara Nacom pexanto tatsi, jei bapon.

³⁸Nexata Etiopía nacuapin cobe itoroba xua duntabina pon xua cawayu pecomaecaein. Nexata dunicabe Felipe Etiopía nacuapinno. Meniyo bejonecabe. Nexata Felipe meniyotha bautisaba Etiopía nacuapin.

³⁹Poxonae meniyo wejuinabe, Nacom pia Pejumope tunaxu tatsi Felipe puxanatsi. Felipe equeicha jopa taetsi Etiopía nacuapin. Saya equeicha Etiopía nacuapin juntea pona pia nacua beya. ⁴⁰Felipe taerucapatsi ichamonae Azoto tomaratha. Felipe daxita tomaran tamropatecapona xua pecueicueijeiva Jesucristo pia pexeinya jume diwesi tatsi, beya yacui jopa Cesarea tomaratha.

Meje yabara poxonae Saulo jume cowunta Jesús

(Hechos 22.6-16; 26.12-18)

9 ¹Awiya came Saulo ichipa daxita pejutebiwa pomonae Jesucristo pejume cowuntsi jiwi tatsi, pon Jesús Pecanamataxeinaein jiwi. Daxota Saulo siwa pona sacerdotemonae pia pepa pentacaponaein tatsi.

²Saulo waca: “Necare cartan judiomonae pia penacatutsi bon pia pentacaponae wi nexa. Tha tacaponaetsi Damasco tomara beya. Icha caxinaein pomonae Jesús pejume cowuntsiwi tha jiwi pecubi botha caponaetsi Jerusalén tomaratha, pebiwino, yabuxino”, jei Saulo. ³Saulo Damasco tomara beya pona. Poxonae bara muxu pepatopae, bapoxonae pin coicha yacaincha matawacaicha matatsun uncuatabicatsi. Barapo coicha peitaboco wejopeica. ⁴Nexata iratha jopa Saulo. Yawa jume taneno xua pejume xua baraichichi, jeichichi: “Saulo, Saulo, zeta xua metha tamonae inta abe exaname?” jei pejume.

⁵Saulo jume nota, jeye: “Pon jiwi Pecanamataxeinaem, zjintamumda?” jei Saulo. Saulo u pejume jume notatsi, jeye: “Apara bara xan Jesús, ponxaein inta abe cana exaname tamonae. ⁶Nontaponde, tomara beiyande. Baraxotiya catsipaebina pocotsiwa bewa exanaename”, jeichichi Saulo.

⁷Pebiwi, pomonae Saulo puna poinchi bichocono pijunuwi moya umena tsipei saya u pejume jume tane ichitha pepon jopa xapain taeyo. ⁸Saulo nantacotaxuba asiya uncua. Poxonae necotaxuba jopa xapain taeyo. Daxota pomonae Saulo puna poinchi cobe capoinchi Damasco tomara beya. ⁹Baraxota Damasco tomaratha Saulo eca acoibi po matabibibe. Jopa xapain necotsiyo. Barapo acoibi po matabibibetha jopa nabanaeyo, jopa apaeyono.

¹⁰Baxota Damasco tomaratha popona pon pejume cowuntsin Jesucristo. Bapon pewun Ananías. Ananías tsita naitapeinya xeinatsi Jesús poxonae camaita. Ananías tsipaebatsi Jesús jeichichi: “iAnanías!” jeichi. Ananías

jume nota, jeye: “Jai, apara xote ecanje, pon jiwi Pecanamataxeinaem”, jei.

¹¹Nexata Jesús Ananías baraichi: “Nontaponde. Namto beya ponde, po namto pewun Bopiya perucuiyae namto. Poxonae Judas pia botha patopame, yainyabare barapo botha. ‘¿Incane Saulo, Tarso tomaramonaepin?’ jande. Iraunxuaeru Saulo Nacom tsipaebauya. ¹²Saulo amachinae xua cacamaita, xua Ananíam xua itacuere wunaetsiname Saulo necobetha”, jei Jesús.

¹³Nexata Ananías jume nota, jeye: “Pon jiwi Pecanamataxeinaem, pinmonae netsipaeba xua pinae bapon cata abe exanatsi jinya jiwimonae, pomonae Jerusalén tomaratha jinompa. ¹⁴Bapon carta capatopa xote, po carta bayatha sacerdotemonae pia pentacaponae caitoroba. Saulo carta capatopa poxoru sacerdotemonae jume jejei xua Saulo pinae bara caponaena jiwi pecubi bo beya pomonae cawun ununeiba poxonae Nacom tsipaebibatsi”, jei Ananías.

¹⁵Jesús Ananías baraichi, jeichichi: “Ponde tsipei yaitama bapon bayatha Saulo itapetan. Bapon Saulo tsipaebina tajume diwesi icha nacuantha, po nacuantha jinompa pomonae jopa judiomonae naexanaeyo. Matautano tsipaebina pomonaetha pomonae jiwi itorobiya pia pepa peewatsiwichi. Matautano tsipaebina barapo tajume diwesi israelmonaetha. ¹⁶Tha bexa Saulo tsita itutichi po coyene xua bewa atene tsane tajume diwesi penatsipei cueicueijeixae tsane”, jei Jesús.

¹⁷Nexata Ananías pona ichaxota Saulo eca. Poxonae joniya botha, Saulo pecobetha ainya cobethabe mata jayabatsi. Ananías namchi, jeye:

—Saulom, pon be tayapin catsicotainchi, nejume cowuntsixae Jesús. Bapon Jesús pon jiwi Pecanamataxeinaein neitoroba, pon namtotha catsita naituta xuano xua catsipaebano. Jesús neitoroba nenecotsinexa tsane yawa Nacom necajuntu coyene yuca exanaenexa pia Pejumope tñaxutha, jei Ananías xua Saulo tsipaebatsi.

¹⁸Barapoxonae caena nainya peitacueretotha be petsebocoton taothopeinatsi. Bapoxonae equeicha caewa wunaeya daxita carepaya tane. Saulo asiya uncua bapoxonae caena bautisabatsi. ¹⁹Poxonae nabane bapoxonae cui thunei tsanaya. Be caentacabiyobe Saulo eca Damasco tomaratha ichaxota ena pomonae pejume cowuntsiwi Jesucristo.

Meje yabara poxonae Saulo Jesús pejume diwesi paeba Damasco tomaratha

²⁰Caena nainya Saulo pona judiomonae pia penacaetutsi bontha tatsi. Tsipaeba barapomonaetha, jeye: “Barapon Jesús, apara Nacom Pexanto tatsi”, jei. ²¹Daxita pomonae jume tayena barapomonae yabara najuntu coyene cabenaeca, nabarai, najei:

—Bara baraponda, pon cain matha Jerusalén tomaratha patopa xua abe peexanaponaenexatsi pomonae Jesucristo pewun ununaewichi

poxonae Nacom wuqueibatsi. Apara bapon pon bayatha xote patope xua peteicaenexatsi pomonae pejume cowuntsiwi xuano xua pecaponaenexatsi pomonaetha pomonae sacerdotemonae pia pentacaponaewi xua Jerusalén tomara beya, najei.

²²Ichitha bapon Saulo awiya jume tsacatsacapiya cueicueijei. Bapon tsita itapeinya xeina xua Jesús apara Mesías. Daxota barapomonae judiomonae moya umenarucupa tsipei yabara najuntu coyene cabenaeca pocotsiwa xua Saulo paeba.

Meje yabara poxonae Saulo panepa judiomonae pecuiyainwa

²³Poxonae ainya matabin yapucaewa judiomonae caemonae pebruya nanta xeina xua bepa bexubichei Saulo. ²⁴Saulo ichun muxu baraichi: “Bepa cabexubei ichamonae”, jei. Saulo ewatumeinchi tomara coibotontha po coiboton xua tomara peyacaincha toxoroto dutsiwa coiboton. Barapo coibotontha Saulo ewatumeinchi daxita matabi, yawa merawino. ²⁵Ichitha Saulo merawi panepa poxonae pijimonae pitatsi yawa yacote yorecatsi pepa tomara juma deca xua tomara peyacaincha toxoroto dutsiwa juma deca.

Meje yabara poxonae Saulo Jerusalén tomaratha popona

²⁶Poxonae Saulo Jerusalén tomaratha patopa bepa bequein baru nacaetutei Jesús pejume cowuntsiwichi tatsi, ichitha barapomonae Saulo cunuwatsi tsipei nanta xeina xua Saulo jopa xapain Jesús pejume cowuntsiwichi jiwana tatsi. ²⁷Ichitha Bernabé Saulo cuaranotatsi Jesús pia peitorobi jiwi tatsi peitabaratha tatsi. Bernabé barapomonaetha namchi, jeye: “Pinae bayatha Saulo namtotha tsita naitutatsi Jesús pon jiwi Pecanamataxeinaein. Matautano pinae Saulo muxu tsipaebatsi. Matautano pinae tsipaeba Jesús pejume diwesi Damasco tomaratha xua pinae cui tsacatsacapiya cueicueijei”, jei Bernabé. ²⁸Daxota Saulo napopona ducuaeta Jerusalén tomaratha ichaxota Jesús pia peitorobi jiwi tatsi. Saulo Jerusalén tomaratha jume tsacatsacapiya cueicueijei ducuaeta Jesús pejume diwesi tatsi pon jiwi Pecanamataxeinaein. ²⁹Saulo yabara baru natsipaeba Jesús pejume diwesi, yawa baru najume matsontsonobatsi judiomonae, pomonae xua griego jume penatsipaebiwi. Barapomonae judiomonae, ichichipa xua Saulo pebexubiwatsi. ³⁰Pomonae iru Jesús pejume cowuntsiwi tatsi jume tane, xua bepa Saulo imoxoyo bexubichei judiomonae. Daxota Saulo Cesarea tomara becayiyatsi. Baxota punaxubathopatsi. Equeicha Saulo dabe pu itorobiyatsi Tarso tomara beya.

³¹Daxita Jesús pejume cowuntsi jiwi tatsi junte ma jinompa Judea nacuatha, Galilea nacuatharu, Samaria nacuatharu, tsipei jopa ichamonae abe exanaeyo barapomonaetha. Matautano barapomonae

mataropeichiya nacuidubapona xua pejume cowuntaponaewa Nacom. Matautano exanapona pocotsiwa Nacom ichichipa. Nacom pia Pejumope tunaxu tatsi barapomonae yaweinchi pejuntu coyoneintha tatsi. Pinmonae Jesús jume cocowuntapona.

Meje yabara poxonae Eneas axaibi exanatsi

³²Poxonae Pedro siwa pona ducuaetaeiba daxita tomaran Jesús pejume cowuntsi jiwi tatsi, bapoxonae yawa siwa ponano pomonae Jesús pejume cowuntsi jiwi pomonae ena Lida tomaratha. ³³Baxota Pedro caxina pon pecuenobinchi xua saya camatha boca. Bayatha caena xeina baxua ocho po weibe. Bapon pewun Eneas. ³⁴Pedro, Eneas baraichi: —Eneas, Jesucristo caaxaibi exana. Asiya uncuatabare. Jinya cama xaxainta xore, jei Pedro.

Barapoxonae caena yacuinaya nantacotaxuba Eneas. ³⁵Nexata Lida tomarapiwi, iru Sarón tomarapiwino, barapomonae Eneas tainchi xua equeicha beta pona. Bapoxonae barapomonae nacui barapenta xua copiya jume cowunta pejume cowuntsinexa Jesucristo, pon jiwi Pecanamataxeinaein.

Meje yabara poxonae Dorcas equeicha caewa asu exanatsi poxonae tupa

³⁶Iruru jame caena bayatha Joje tomaratha popona powa pejume cowuntsiwayo Jesús. Bapowa pewun Tabita. Barapo wun seicaya griego jume wun “Dorcas” baraichi. Barapowa pocotsiwa wunae itapeta exaneiba nawita. Matautano barapowa yaweneiba pomonaetha pomonae peacopeibiwi. ³⁷Barapowa caena nainya atene tsanaya. Caena nainya tupanaya. Daxita petupaein matapaeta peru isticatsi. Bapoxonae po tutu athabeicha baxota boichatsi. ³⁸Joje tomara Lida tomara imoxoyo nacaquita ecabe. Baxota Pedro popona Lida tomaratha. Baxota Joje tomaratha pomonae Jesús pejume cowuntsiwichi tatsi jume tane xua juinya Pedro Lida tomaratha popona. Bapoxonae itoroba pebinbe nacueyatabe xua bepa pinae tawabathopiyaetsi xua Pedro pewabathopiyaenexatsi Lida tomara beya. Baponbe namchibe. Pedro baraichi: “Cawaba pomonae Jesús pejume cowuntsiwichi tatsi. Bepa pinae anetha iyaem”, jeibe baponbe.

³⁹Bara Pedro puna pona baponbetha. Poxonae Pedro patopa Joje tomaratha, baru jojoniyatsi Pedro, ichaxota po tututha boca petupaewa Dorcas. Daxita pecuenta werapaewaxichi piseurixi caquita wecoyei tsumenaetsi Pedro. Yawa barapowaxi Pedro tsita itubatsi doroburu, camisanno xua bayatha Dorcas taxuxuca poxonae cataunxuae abu popona. ⁴⁰Pedro pesato beitaweya daxita barapomonae. Pedro imoxoyo caquita eca pentabocototha. Nacomtha tsipaeba. Bapoxonae powa tupauncua Pedro pexainya benecoya, Pedro barai bapowa, jeye:

—Tabita, asiya uncuatabare, jei Pedro.

Bapoxonae powa tɔpuncua necotaxuba. Poxonae Pedro tainchi, bapoxonae nantacotecataba. ⁴¹Pedro Dorcas cobe pitatsi. Asiya cuaranotatsi. Bapoxonae Pedro waba pomonae Jesús pia pejume cowuntsi jiwi tatsi, iruru powaxi pecuenta werapaewaxichi piseurixi. Barapomonae Pedro tsita ituta xua equeicha Dorcas asu. ⁴²Jope tomarapiwi jume taerucupa xua equeicha Dorcas petupaewa nacosata. Bapowa equeicha asu popona. Daxota pinmonae jume cowanta Jesús pon jiwi Pecanamataxeinaeinchi. ⁴³Jope tomaratha Pedro baxota popona ainya matacabin. Pedro popona Simón pia botha tatsi pon xua duwei peboco wunaeteibin.

Meje yabara Pedro iru Cornelio

10 ¹Iruru jame Cesarea tomaratha pebin warapaeya popona. Bapon pewan Cornelio. Cornelio, jame yatsicaya pia nacua tatsi Italia nacua. Bapon soldadomonae pia pentacaponaein tatsi. Iruru soldadomonae pia nacua tatsi Italia nacua. ²Cornelio piamonae baru jume cowanta Nacomtha. Matautano Nacom wunae jaintatsi. Barapon Cornelio matowa yaweneiba judiomonae, pomonae peacopeibiwi. Bapon paratixi catsibeiba barapomonaetha. Bapon Cornelio tsipaebeiba Nacomtha. ³Icha mataqueitha, Cornelio mataqueitha quiripitha amachinae.

Cornelio tane Nacom pia matatsunpin tatsi be poxonae camaita. Matatsunpin patopaeya namchi, jeye: “iCornelio!” jei. ⁴Cornelio junuwiya camaitiya tane matatsunpin. Cornelio jume epa pita, jeye: “Pon jiwi Pecanamataxeinaem, zeta xua jinyatsi?” jei Cornelio. Cornelio jume notatsi matatsunpin jeye: “Bayatha Nacom cajume tane poxonae tsipaebame pexainya beya. Cacui taneno xua yaweneibame peacopeibiwi. Nacom cayabara nanta xeina. ⁵Cornelio, ichamonae Jope tomara beitorobiyama pewabinexa tsainchi pon ainya wunbe pexeinaein. Bapon Simón baraichi yawa Pedro baraichi. ⁶Barapon Simón Pedro eca icha Simón pia botha tatsi pon Simón seicaya pon duwein peboco wunaeteibin. Barapon Simón mar mene itapatha yabo uncua”, jeichichi Cornelio matatsunpin.

⁷Poxonae matatsunpin napitaba, barapoxonae Cornelio ichamonae waba, pomonae xua pia botha petanacuichiwichi. Iru soldadomonaepin waba, pon xua pia botha tanacuitatsi. Barapon soldadomonaepin pejuntu coyene xanepanaein Nacomtha. ⁸Barapomonaetha tsipaebatsi pocotsiwa bayatha Cornelio tsipaebatsi matatsunpin. Cotacaya Cornelio itoroba barapomonae Jope tomara beya.

⁹Icha mataqueitha barapomonae warapa Jope tomara beya. Poxonae cataunxuae itiya pona poxonae mateinyaxae, poxonae bara imoxoyo patichaba, bapoxonae iruru Pedro bo matatupa beecoinyaru, po bo

matatupa pereca. Nacom tsipaebawiya poxonae bayatha mataeinyaxae tsuxubi. ¹⁰Pedro bichocono jainpeca, bepa bequein xaei. Ichitha poxonae awiya cataunxuae tasetatsi, Pedro tsita naitutatsi be poxonae camaita. ¹¹Pedro athabe necoicha xua peitaboco nayausanaxuba. Yawa taneno xua pin paparuwa pexainya betaruneicatsi, be xua jiton nantiya caruneicabe. ¹²Bapoxonae barapo paparuwatha Pedro tane daxita xua xuan saya pecobetha pona be cawayun. Yawa tane daxita xua xuan saya petaxutha bobenapona be maquibun. Yawa tane daxita xua xuan saya petompacuetontha bobenapona be jomon. Matautano tane daxita xua xuan saya yapupuna be peyapupunaewi. ¹³Nexata Pedro peitabocotha jume tane xua namchi, jeye: “Pedro asiya uncuatabare. Pon xua ichichipame, pire. Moya bexore. Yawa xaema”, jei barapo jume.

¹⁴Nexata Pedro jume nota, jeye: “Bara, bayatha apara jopa bapana camatsawan xaeinyo, xua tamonae jopa copatsiyo xua pexaewa”, jei Pedro. ¹⁵Equeicha Pedro jume tane pejume xua tsipaebatsi, xua jeichichi: “Xua Nacom catsijainya exana, baraxua jopa camatsawa jaintocuaetsi”, jeichichi.

¹⁶Pedro matha acoibi po jumeyobe tsipaebatsi baxua. Bapoxonae paparuwa caibe juinya peitaboco beicha. ¹⁷Xua Pedro baraichi Nacom, baxua Pedro yabara nanta xeina nawita: “¿Eta xua metha Nacom yabara nejumichira?” najei. Pomonae Cornelio itoroba, barapomonae i dapo bon yainyainyaba tsiniya: “¿Incane Simón pia bo?” jei. Bapoxonae bapomonae pata Simón pia curara coibototha tatsi. Poxonae barapomonae pata, Pedro cataunxuae yabara nanta xeina xua tsipaebatsi xua Nacom tsipaeba. ¹⁸Poxonae Cornelio pijimonae tatsi pata baxota, pin jumetha namchi, jeye: “¿Incane Simón pon icha wun ‘Pedro’ baraichi? ¿Baxota bara ecara?” jei.

¹⁹Awiya came Pedro baxua yabara nanta xeinequiya xua pocotsiwa bapon tane. Nexata bapoxonae Nacom pia Pejumope tunaxu tatsi Pedro baraichi, jeye: “Pedro, nejume taema. Acoibi poyobe pebiwi cawenawenei tsompae. ²⁰Nontaponde nainya ira bedunatabareinca. Barapomonae naponde, beitatema napontabare, yaitama barapomonae itoroban”, jeichichi Pedro.

²¹Bara nexata Pedro ira bedunatabareca. Pedro barai barapomonae, jeye:

—Apara bara xan, po jiton xua pana newenawenei tsompaem. ¿Eta xua metha papatame? jei.

²²Barapomonae Pedro jume notatsi, jeye:

—Papatan yaitama Cornelio, pon soldadomonae pia pentacaponaein tatsi, bapon pana itoroba. Barapon pejuntu coyene xanepanaein. Barapon Nacom jume cowuntatsi. Iruru daxita judiomonae barapon baru cui itura jineibatsi yawa antobetsi. Pinae Nacom pia matatsunpin tatsi Cornelio

itorobatsi Simón Pedro wabare nejume taenexa tsane jei pinae, jei barapomonae, xua Pedro tsipaebatsi.

²³Nexata Pedro waba barapomonae xua petamaitenaewa tsainchi barapo botha. Icha matababitha piawa xaxainta xua caponaena. Bapoxonae Pedro napona barapomonae. Irũ ichamonae naponano, pomonae irũ Jesús pejume cowũntsiwi tatsi, pomonae xua ena Jope tomaratha.

²⁴Icha matababitha pata Cesarea tomaratha. Baraxota Simón Pedro ewatatsi. Cornelio pia matabũxuyomonae pewabixae barũ ewateca, yawa pia jiwi tatsino. ²⁵Poxonae Pedro Cornelio pia botha tapatopatsi, Cornelio Pedro jacobatsi. Bapoxonae Cornelio Pedro peitabaratha pentabocototha tauncuatsi, pewũnae jainchinexa tsainchi Pedro. ²⁶Ichitha Pedro, Cornelio asiya cuaranotsiya baraichichi, jeye:

—Cornelio, nontaponde. Saya apara xan pebin naexanan icha xam ichim barichin apara, jei Pedro.

²⁷Poxonae Pedro natsipaebiya jonyabe, baxota Pedro pin bicheito tane xua nacaetuta. ²⁸Nexata Pedro barai barapomonae, jeye:

—Bara bayatha payaputaneme xua waxainchi judiomonae jiwichi wacui coyenewa xeinatsi xua jopa nacui yabara copatichi xua wabarũ nacaetuteibiwa pomonae jopa judiomonae naexanaeyo. Mataũtano jopa nacui yabara copatichi xua pia bonthano waponeibiwa. Ichitha Nacom auxxuae necuiduba xua pinae jopa bewa ichamonae catsapiwi jaintin tsane. ²⁹Daxota bichoina patopan yaitama pinae pana wabame. ‘Bara’, jopa janyo. Methauxuae paca yainyabinchi: ¿Eta xua metha pana tsiwabame? jei Pedro.

³⁰Nexata Cornelio, Pedro jume notatsi, jeye:

—Petain cuatro po matababibe tsuxubi, quiripitha xote tabothona poxonae yabara nainbotan xua Nacom tsipaeban barapoxonae matatsunpin jemeicha tabothona patopa. Barapo matatsunpin paparuwa nama xatata po paparuwa bichocono daedaena. ³¹Matatsunpin nebarai: ‘Cornelio, bayatha Nacom cajume tane poxonae tsipaebame pexainya beya. Cacui taneno xua yaweneibame peacopeibiwi daxota Nacom cayabara nanta xeina’, jei. ³²Nebaraino: ‘Ichamonae Jope tomara be itorobiyama, pewabinexa tsainchi pon ainya wũnbe pexeinaein. Bapon Simón baraichi, yawa Pedro baraichi. Pedro eca ichũn Simón pia botha tatsi, pon Simón pon seicaya duwein peboco wũnaeteibin. Barapon Simón mar mene itapatha yabo uncua’, nejei. ³³Daxota nainya itoroban ichũnbe acoibi poyobe yaitama apara cawabatsi. Barabũ patopame. Daxita paxan xote Nacom peitabaratha pajinompan. Mataũtano paca ewatatsino tsipei yaitama tha paca jume taetsi xua Nacom, pon Pecanamataxeinaein, cana cajume itoroba, jei Cornelio.

Meje yabara poxonae Pedro pin diwesi paeba Cornelio pia botha tatsi

³⁴Pedro barapomonaetha namchi, jeye:

—Anoxuae yaputan xua Nacom jopa cana exanaeyo jiwi xua ichun ainya cui xua beyacaincha ichun. Nacom daxita jiwi tsita najupatsi. ³⁵Daxita nacuantha pomonae xua Nacom wunae jaintatsi xuano xanepanaya exanano, Nacom antobe barapomonae. ³⁶Bayatha payaputaneme xua Nacom Pejume Diwesi nacariwesi itoroba paxantha pomonae Israel pia pemomoxi susato jiwi tatsi panxaein. Barapo pexeinya diwesi jume juntema jinompa pana exana poxonae Jesucristo pajume cowuntan. Nacom Jesús Pecanamataxeinaein exanatsi daxita carepaya jiwi nexa. ³⁷Paxam bara payaputaneme xua Juan Jesús yabara cueicueijeichi yawa bautisaba jiwi Galilea nacuatha. Bapoxonae iruru Jesucristo tamropata pitaba xua cueicueije Galilea nacuatha yawa daxita Judea nacuatha. ³⁸Matautano bara payaputanemeno xua Nacom cata pia peayapusu itorobi coyenewa, Jesucristo Nazaret tomarapin catatsi. Yawano Jesucristo nacana jumope tunaxu catatsi. Bapoxonae Jesús daxita carepaya tomarantha popona ducuaeta. Yawa axaibi exana ducuaetano peatene jiwi. Yawa taitaweta ducuaetano pomonae xua cauri pexeinaewi. Daxota bapon baxua beta exana Nacom pebaru poponaexae. ³⁹Bayatha pacui tan daxita carepaya xua Jesús exana Judea nacuatha, Jerusalén tomarathano ichaxota jinompa judiomonae. Bapoxonae nama Jesús naetho cobe matatabarutatsi, xua poxonae tupa exanadutatsi naetho. ⁴⁰Poxonae acobi po matababibe tsuxubi Nacom petupaein equeicha asu exana. Matautano bapon pana netsita naituta exana. ⁴¹Ichitha daxita jiwi jopa tsita naituta exanaetsi. Saya paxan pana netsita naituta exana. Nacom pana itapeta pia patayopichinexa ichamonaetha pocotsiwa Jesús exana xuano xua paebano. Paxan Jesús pabarü nabanán, matautano pabarü apanno poxonae equeicha asu popona. ⁴²Jesús pana itoroba daxita nacuantha pata paebinexa tsane Nacom Pejume Diwesi, xuano bapon pejume diwesino. Nacom cana exana, Jesucristo cana exanatsi be pon jiwi peyabara paebin penatsicuentsiwa xua abe peexanaexae. Bexa tsane Jesús daxita jiwi nanantaustiya jiwana torotsiya itawetsina, pomonae cataunxuae jinompa yawa pomonae bayatha werapano. ⁴³Bayatha pomonae Nacom pia peitorobi jume pepaebiwí Jesús pejume diwesi paeba. Barapomonae namchi: ‘Daxita pomonae Jesús pejume cowuntsiwichi barapomonae Nacom yabara juntemainaena abe pia peexanae cuiru coyenein tatsi Nacom pia peayapusuwathaxae’, jei barapomonae, jei Pedro.

Meje yabara poxonae pomonae jopa judiomonae naexanaeyo pejuntu coyeneintha tapatatsi Nacom pia Pejumope tunaxu tatsi

⁴⁴Poxonae cataunxuae Pedro cueicueije, bapoxonae Nacom pia Pejumope tunaxu tatsi tapatatsi pomonae jume tane xua Pedro paeba.

⁴⁵Judiomonae, Jope tomarapiwi, pomonae pejume cowuntsixae

Jesucristo, barapomonae Pedro puna poinchi. Barapomonae daxita yabara najuntũ coyene cabenaeca xua irũ barapomonae pomonae jopa judiomonae naexanaeyo irũ pejuntũ coyeneintha taenatsi Nacom pia Pejumope tũnaxũ tatsi. ⁴⁶Judiomonae yaputane xua bara xaniwaicha Nacom pia Pejumope tũnaxũ tatsi tapatatsi pomonae jopa judiomonae naexanaeyo. Yaputane tsipei barapomonae barompaya tsanaya icha jumeintha cueicueije. Ichitha barapomonae jopa xapain najume copi yaputaeyo. Judiomonae jume taneno xua pomonae jopa judiomonae naexanaeyo Nacom wũnae jaintatsi. ⁴⁷Pedro namchi, jeye:

—Barapomonae apara Nacom pia Pejumope tũnaxũ tatsi xeina icha waxainchi ichichi. Jiton dapon aibi pon jeye: ‘Jopa bewa bautisabi, apara pomonae jopa judiomonae naexanaeyo’, xua pon pejeiwa, jei Pedro.

⁴⁸Pedro cui itoroba judiomonae. Pedro namchi, jeye: “Pabautisabare barapomonae pomonae jopa judiomonae naexanaeyo. Jesucristo pewũn pawũn taibare poxonae pabautisabame”, jei Pedro. Bapoxonae pirapae barapomonae, pomonae xua aena taenatsi Nacom pia Pejumope tũnaxũ tatsi, Pedro apusiwatsi xua jopa warapae tsane yawa xua caeto abũ ecaenano.

Meje yabara poxonae Pedro diwesi tsipaeba pomonaetha pomonae Jesús pejume cowũntsi jiwi Jerusalén tomaratha

11 ¹Jesús pia peitorobi jiwi tatsi irũrũ pomonae pejume cowũntsiwi Jesús, pomonae ena Judea nacuatha, barapomonae daxita jume tane xua irũrũ pinae pomonae jopa judiomonae naexanaeyo bayatha jume cowũnta Nacom Pejume Diwesi. ²Poxonae Pedro Jerusalén tomara bewarapiya, judiomonae pomonae xua jume cowũnta xua ainya cui Jesús pejume cowũntsi jiwi tatsi pewi thabiwa tsainchi, barapomonae Pedro jume daunweya tsipaebatsi. ³Pedro baraichi, jeye:

—¿Eta xua metha barapomonae siwa poname pomonae jopa judiomonae naexanaeyo? ¿Eta xua metha naxaneme barapomonaetha? jei judiomonae.

⁴Nexata Pedro diwesi eetapona xua cueicueije barapomonaetha. Po diwesiin eetapona, barapo diwesiin xua poxonae siwa pona pomonae jopa judiomonae naexanaeyo. Pedro namchi:

⁵—Poxonae Jope tomaratha Nacom tsipaeban, pin paparuwa tan be poxonae camaitan. Barapo paparuwa peitaboco weruneica be pemũtontha nantiya yacaincha opi queraba. Taxainya duneica. ⁶Barapo paparuwatha tan xua bobena. Baraxuan tan xua saya pecobetha pona be cawayun. Baraxuanno tan xua saya petaxutha bobenapona be maquibũn. Baraxuanno tan xua saya petompacuetontha bobenapona be jomon. Baraxuanno tan xua saya yapupuna be peyapupunaewi. ⁷Peitabocotha jume tan xua

nebarai: ‘Pedro asiya uncuatabare. Pon xua ichichipame, pire. Moya bexore. Yawa xaema’, nejei. ⁸Jume notan nexata: ‘Bara, bayatha apara jopa bapana camatsawan xaeinyo xua tamonae jopa copatsiyo xua pexaewa’, jan. ⁹Equeicha peitaboco wenebaraichica: ‘Xua Nacom catsijainya exana, baxua jopa camatsawa jaintocuaetsi’, nejei. ¹⁰Acoibi po jumeyobe nebarai. Saya ɯ barapo jumethabe nebarai. Bapoxonae paparuwa equeicha peitaboco beicha caibe caicha. ¹¹Paparuwa caibe juinya, irurɯ pebiwi acobi poyobe patarɯ. Bapoyobe Cesarea tomarapiwi, taxantha pata. Barapo acobi poyobe, pomonae Cornelio itoroba. ¹²Nacom pia Pejumope tɯnaxɯ tatsi nebarai: ‘Napuna ponde. Beitema pontabare’, nejei. Irɯ nebarɯ pona seis poyobe Cesarea tomara beya pomonae pejume cowɯntsiwi Jesús. Pajoniyon Cornelio pia botha tatsi. ¹³Cornelio pana netsipaeba xua pinae pia botha tapatopatsi matatsunpin. Matatsunpin namchei: ‘Pebiwi Jope tomara beitorobiyama, pewabinexa tsainchi pon xua ainya wɯnbe xeina, Simón yawa Pedro. ¹⁴Barapon Simón Pedro paca tsipaebina Jesús pejume diwesi, paca necayawa capanenebiyaenexa tsane Nacom’, jei pinae matatsunpin poxonae pinae Cornelio tsipaebatsi, jei Pedro barapomonaetha. ¹⁵Pedro equeicha namchi:

—Poxonae Jesucristo pejume diwesi paebaxoyan Corneliobarɯtha, barapoxonae Nacom pia Pejumope tɯnaxɯ tatsi tapatatsi barapomonaetha. Icha cain painta ichi, barichi pomonaetha Nacom nacana jumope catsiba. ¹⁶Bapoxonae nantana pitaban Jesús pejume, poxonae pana barai: ‘Juan saya ɯ meratha bautisaba. Ichitha Nacom seicaya barompaya pia cuitha paca bautisaba. Ichitha Nacom seicaya barompaya pia cuitha paca bautisabina. Bapoxonae painya jɯntɯ coyeneintha pacata patsina Nacom pia Pejumope tɯnaxɯ tatsi’, jei Jesús. ¹⁷Xaniwaicha beta yaputan xua Nacom nacana jumope tɯnaxɯ cata barapomonaetha pomonae jopa judiomonaetha naexanaeyo, icha cain ichi poxonae Nacom nacana jumope tɯnaxɯ cata pata xantha poxonae Jesucristo pajume cowɯntan. Daxota Nacom jopa cui yancatabinyo poxonae ichichipa exana barapomonaetha, jei Pedro.

¹⁸Poxonae Jesucristo pejume cowɯntsi jiwɯ, pomonae ena Jerusalén tomaratha, poxonae baxua jume taerɯcɯpa moya umenarɯcɯpa. Matautano Nacom wɯnae jaintatsino. Barapomonaetha namchi, jeye:

—iMaise wɯnae, irɯ Nacom nacana cui cata pomonaetha pomonae jopa judiomonaetha naexanaeyo xua barapomonaetha pejume cowɯntsiwa tsanerɯ Jesús, yawa xua jɯntema pejinompaewa tsanerɯ! Baraxua Nacom ichichipa xua barapomonaetha najɯntɯ cui coyene barapenta xua abe, petaxeinaenexa tsainchi peajɯntɯyapusɯwa, po peajɯntɯyapusɯwa xua jopa weraweracaeyo, jei barapomonaetha.

**Meje yabara poxonae Jesús pejume cowuntsi jiwi
tatsi jinompa Antioquía tomaratha**

¹⁹Jesucristo pia pejume cowuntsi jiwi tatsi ducupa, tsipei peanaepanaewi yotaba, poxonae po matabitha Esteban bexotsi. Barapomonaе tsanarucupa, ichun Fenicia nacua beya, ichun Chipre nacua tunaeto beya, ichun Antioquía tomara beya. Barapomonaе saya judiomonaetha cueicueijeі Jesucristo pejume diwesi. ²⁰Ichamonaе, pomonaе pejume cowuntsiwi Jesús, Chipre nacua tunaetopiwi, Cirene tomarapiwino, barapomonaе Antioquía tomaratha pata. Daxita barapomonaе tsipaeba pomonaetha pomonaе jopa judiomonaе naexanaeyo Jesús pejume diwesi tatsi pon jiwi pia Pecanamataxeinaeinchi. ²¹Barapomonaе yawenatsi nawita Nacom pia peayapuswa tatsi. Daxota pin bicheito pomonaе jopa judiomonaе naexanaeyo, barapomonaе jume cowuntatsi Jesús, pon jiwi Pecanamataxeinaeinchi.

²²Jerusalén tomaratha, Jesucristo pejume cowuntsi jiwi tatsi, barapomonaе, jume tane xua Antioquía tomarapiwi jume cowunta Jesucristo pomonaе jopa judiomonaе naexanaeyo. Daxota Bernabé Antioquía tomara beitorobiyatsi. ²³Poxonaе Bernabé Antioquía tomaratha patopa be ita cui wunaetsi xua Nacom yawena barapomonaetha. Bapoxonaе Bernabé juntu coyene weiweina. Bernabé barapomonaе barai, jeye: “Paajuntucoyeneyapuswa jinompare Nacomtha. Matautano Nacom ajuntuyapuswa pajume cowuntaponde”, jei Bernabé. ²⁴Bernabé pejuntu coyene xanepanaein. Bapon juntu coyene yucatsi Nacom pia Pejumope tñaxu tatsi tsipei daxita i daxuan exana pocotsiwa Nacom itoroba. Matautano bichocono Nacom jume cowuntatsi. Daxota pin bicheito jume cowunta Jesús, pon jiwi Pecanamataxeinaeinchi.

²⁵Nexata Bernabé Tarso tomara bewarapiya, pewenaweneinexatsi Saulo. ²⁶Poxonaе Saulo caxinatsi baxota, Antioquía tomara bebaru warapiyatsi Saulo. Baraponbe cae wei naecabe baxota, cuidubabe pin bicheito xua Jesús pejume diwesi. Baraxota jiwi matha Jesús pijimonaе tatsi wun dutatsi xua Antioquía tomarapiwi wun duta xua jeye: “Cristobarumonaе”, jeichichi barapomonaе pomonaе Jesús pijimonaе tatsi.

²⁷Poxonaе Bernabé iru Saulo cataunxuae cuidubapoponabe Antioquía tomaratha, Nacom pia peitorobi jume pepaebiwi baxota pata, Jerusalén tomara werendena. ²⁸Bara caein jiwana pewun Agabo. Agabo asiya uncua barapomonaetha. Bapon wunaе tsiwanaya paeba. Agabo yaputane exanatsi Nacom pia Pejumope tñaxu tatsi. Agabo namchi, jeye: “Bexa tsane daxita carepaya nacuantha jainbo tsane”, jei Agabo. Baraxua xainyei poxonaе jumba matha Claudio romanomonaе itorobiya pia pepa

peewatsinchi tatsi naexana, bapoxonae pin jainbo tsurucuae. ²⁹Daxota Jesús pejume cowuntsiwi tatsi, pomonae ena Antioquía tomaratha, ichipa yawena pomonae iru pejume cowuntsiwixae Jesús pomonae peenaexae Judea nacuatha. Daxota barapomonae pomonae Jesús pejume cowuntsiwixae peburuya nanta xeina xua paratixi taitorobina. Daxita barapomonae carepaya paratixi cata be xua po coyene cobe itacupatsi xua pecatsiwa. ³⁰Barapomonae baxua exana. Barapo paratixi Bernabé iru Saulo caitorobatsibe pitiri jiwi nexa xua Judea nacua beya.

**Meje yabara poxonae Santiago bexotsi iru xua
poxonae Pedro jiwi pecubi botha capoinchi**

12 ¹Barapoxonae Herodes pon Judea nacuapiwi peyanacua ewatsinchi, bapon tamropata pitaba xua pomonae Jesús pejume cowuntsiwi tatsi peraxa exanatsi. ²Herodes itoroba pia jiwi, xua pin cusitha Santiago pebexubiwatsi, pon Juan peweicho tatsi. ³Herodes jume tane xua judiomonae tsita xanepanatsi xua Santiago bexotsi. Daxota Herodes cui itoroba piamonae xua Pedro pewaetabiwatsi xua pecaponaenexatsi jiwi pecubi botha. Baxua exana poxonae Pascua wun matababintha poxonae jiwi pan xane po pan xua jopa xeinaeyo levadura xua pocotsiwa cotowa exana. ⁴Poxonae Pedro jiwi pecubi botha eca, soldadomonae yapucaumena, Pedro yapucaumeinchi. Soldadomonae, cuatro po bicheito matabuxuyobe. Cae matabuxuyo xeina be cuatro poyobe. Be cae matabuxuyo tamroropatapona poxonae yacaincha umeneibatsi Pedro. Herodes yabara nanta xeina xua peexanaewa tsane xua Pedro pin bicheito peitabaratha cuaranotinchi pepa tomaratha poxonae Pascua wun matababin yapu caewina. ⁵Awiya came Pedro jiwi pecubi botha eca. Ichitha Jesús pejume cowuntsiwichi jume daunweya wuca Nacom, Pedro tawucatsi.

Meje yabara poxonae Nacom, Pedro capanepatsi jiwi pecubi bo weya

⁶Herodes merawi nanta xeina xua baya tsane Pedro cuaranotinchi pepa bicheitho peitabaratha. Barapo merawitha, abu cataunxuae Pedro nantiya cobe nain camaituncuatsibe soldadomonaepinbe. Iru soldadomonaepinbe yacaincha uncuabe jiwi pecubi bo boupa. ⁷Caena nainya Jesús pia matatsunpin tatsi Pedro tsita naitutatsi. Jiwi pecubi botha pin coicha pentha tsuxubi bichocono. Matatsunpin Pedro yaubaxotsi. Nexata Pedro nacosataxuba. Matatsunpin namchi, jeye: “Pedro, nanainya nonta ponde”, jei matatsunpin. Bapoxonae Pedro nantiya cobe nain jopeicabe iratha. ⁸Bapoxonae matatsunpin Pedro baraichi, jeye: “Coreinya bocoto bichocono nacoto epa catutabare. Nainya nataxu xatare jinya nenataxu xatatsiwa”, jei. Baraxua Pedro exana. Equeicha matatsunpin namchi, jeye: “Pire jinya camisa po paparuwa xua nainya weruyame. Antha nepuna ponde”, jei matatsunpin.

⁹Nexata matatsunpin Pedro pecoiboto bepuna joniya, pesato beya. Ichitha Pedro xapain jopa naita cui coyene taeyo xua jiwi pecubi bo wepuna joniya matatsunpin. Saya nanta xeina be amachinae. ¹⁰Pedro iru matatsunpin xenta jonyabe soldadomonaepin pon yacaincha uncua ichaxota Pedro etatsi. Bapoxonae equeicha icha soldadomonaepin xenta jonyabe pon ewatuncua pepa boupa xua pesatotha. Pedro iru matatsunpin peboupa penainwa xua peyacaincha dutsiwa bara wejonyabe tomara beya. Barapo boupa jemeicha nacoibo yausaranaxuba. Pedro matatsunpinno namtotha ponabe. Poxonae icha namtotha patopabe bapoxonae jemeicha matatsunpin Pedro cuenta aichurucuaetsi tomara namtotha.

¹¹Barapoxonae Pedro xaniwaicha naita cui coyene tane. Bapon nabarai, jeye: “Bara yatsicaya xainyei Jesús pia matatsunpin inta itoroba tsipei metha bepa necapanepae Herodes pia xainya weya tatsi xuano xua judiomonaepia pia xainya weya tatsi, pomonaechichipa abe inta peexanaewa”, najei.

¹²Poxonae baxua nacui cananta xeina, Pedro pona María pia bo tatsi beya. Bapowa Juan pena tatsi. Juan icha wun xeina, Marcos. María pia botha tatsi pin bicheito nacaetuta pewaqueibinexa Nacomtha. Baxota Pedro patopa. ¹³Pedro curara coiboto dadacata. Yabuyo powa pewun Rode muxu naya pia yaputaetsi pon patopa. ¹⁴Poxonae barapowa Pedro jume copi tainchi xua wawai abu jopa saranaxubiyo peboupa. Bapowa bichocono juntu coyene weiweina daxota caibe cuinaya piamonae tsiwun caya. Namchi:

—Pedro curara coibototha uncua, jei Rode.

¹⁵Barapomonae namchi, jeye:

—iApara camatayaiba! jei.

Equeicha bapowa jume nota, jeye:

—iBabara xainyan, Pedro bapon yatsicaya! jei.

Equeicha barapomonae jume nota, jeye:

—Metha apara Pedro pia matatsunpin tatsi, pon yantatsi, jei.

¹⁶Awiya came Pedro peboupa dacadacatuncua. Poxonae barapomonae peboupa saranaxoya, Pedro yabara najuntu coyene benaecaeya tainchi. ¹⁷Pedro pecobetha moya jume matawenta. Cotacaya Pedro diwesi tsipaeba barapomonae xua bayatha capanepatsi jiwi pecubi bo weya, xua Jesús capanepa pon jiwi Pecanamataxeinaeinxae tatsi. Pedro namchi, jeye:

—Barapo diwesi Santiago patsipaebare iru ichamonae patsipaebare pomonaepi Jesús pejume cowuntsiwi tatsi, jei Pedro.

Barapoxonae Pedro icha namto be-ya.

¹⁸Poxonae baya pentha tsina soldadomonae nabenaenompa tsipei jopa yabara yaputaeyo po coyene xua Pedro aichurucuae. ¹⁹Herodes

soldadomonae itorobatsi xua jeitatsi Pedro. Ichitha jopa Pedro taebichi. Daxota Herodes cana exana xua barapo soldadomonae natsiaenae cuenta pepanepaexae Pedro. Barapoxonae Herodes icha soldadomonae cui itorobatsi xua barapo soldadomonae jutebinchi. Barapoxonae Herodes Judea nacua wewarapiya, Cesarea tomaratha pepoponaenexa.

Meje yabara poxonae Herodes tupa

²⁰Herodes pon Judea nacuapiwi peyanacua ewatsinchi, bapon Tiro tomarapiwi casebatsi iru Sidón tomarapiwino casebatsi. Bequein bayatha copiya Herodes itoroba pexaewa barapo tomarabe nexa ichitha anoxuae jopa daichiyo poxoru Herodes caseba barapo tomarapiwibe. Daxota Sidón tomarapiwi iru Tiro tomarapiwino itoroba pebiwi pesiwa ponaenexa tsainchi Blasto pon peainya cui jiton xua Herodes pon tanacuitatsi. Barapomonae ichichipa xua Herodes xaniwaicha caewa be piamonae exana, daxota barapomonae Blasto tsipaebatsi xua barapomonae peyabara jume yawenaenexatsi xua poxonae petsipaebinexatsi Herodes.

²¹Daxota Herodes wun duta, barapo matabi, po matabitha xua Herodes siwa ponaeinchi barapomonae. Poxonae matabi tsuxubiba barapo matabitha Herodes pia paparuwa nama xatataba po paparuwa tsobia, pocotsi paparuwan nama xataba pentacaponae. Bapoxonae pia peecaewatha eca. Herodes piamonaetha tsipaeba. ²²Nexata barapomonae wawai Herodes baraichi, jeye: “iApara xua bapon paeba, jopa be pebinyo, apara bara nacom tsecae!” jei barapomonae. ²³Bara caena bapoxonae Nacom pia matatsunpin tatsi Herodes iratha xotsi. Iratha xotsi yaitama bapon jopa Nacom baru cui itura jinaetsi poxonae pia coya Nacom naexana. Oro unu caewita poinchi. Jana caewita poinchino. Tsapita poinchino. Herodes tupaanaicha.

²⁴Pomonae xua jume cowunta Jesús, barapomonae tajü tsipaebapona Nacom Pejume Diwesi daxita nacuantha. Daxota daxita pinmonae jume cowuntatsi Jesús.

²⁵Poxonae Bernabé Saulono nacui wetabe baxua, Jerusalén tomara wewarapiyabe. Antioquia tomara bewarapiyabe. Juan Marcos baru warapatsi.

Meje yabara poxonae Bernabé Saulono Nacom Pejume Diwesi caponabe

13 ¹Baraxota Antioquia tomaratha jiwana jinompa pomonae pejume cowuntsiwi Nacom pomonae Nacom pia peitorobi jume pepaebiwi iru pomonae jiwi pecuidubiwi Moisés pia peitorobi coyene. Barapomonae meje: Bernabé iru Simón pon icha wunno, Negro baraichi, iru Lucio Cirene tomarapin ecaru. Iru Saulo ecaru. Iru Manaén ecaru, pon Herodes bayatha caepinbe naexanabe xua nacuara wichaba ponabe. Herodes Galilea nacuapiwi peyanacua ewatsinchi naexana.

²Caentacabi, poxonaē barapomonaē Nacom pejume coyene canatsipaeba exana, yawa yabara nainbota, barapoxonaē Nacom pia Pejumope tūnaxū tatsi barapomonaē tsipaebatsi, jeye: “Paitorobare Bernabé, Saulono, petsipaebinea tsanebe Nacom pia pexeinya jume diwesi tatsi po penacuichiwa baponbe bayatha tsiwabanbe”, jei Nacom pia Pejumope tūnaxū tatsi.

³Nexata poxonaē xua Nacom wūca najume weta, xuano poxonaē weta xua yabara nainbota, barapoxonaē Bernabé Saulono pecobetha mataboco jayabatsibe. Bapoxonaē napeyabatsibe.

**Meje yabara poxonaē Nacom pia peitorobi jiwi tatsi, Nacom
pia diwesi tatsi cueicueijeji Chipre tunaetotha**

⁴Bapoxonaē Bernabé Saulonūru itorobatsibe Nacom pia Pejumope tūnaxū tatsi. Seleucia tomara bewarapiyabe. Bapoxonaē ponabe jeratha po naetha po nae pin nae, petunaeto beya. Barapo tunaeto pewūn Chipre.

⁵Poxonaē patopa Salamina tomaratha, Nacom pia pexeinya diwesi tatsi cueicueijeji judiomonaē pia penacaetutsi bontha tatsi. Juan Marcos bichi napona Bernabé Saulono peyawenaenexatsi.

⁶Barapoyobe daxita barapo tunaeto matawacaicha enapona petsipaebinea Nacom pia pexeinya jume diwesi tatsi. Bapoxonaē Pafos tomaratha pata. Barapo tomaratha bapoyobe caxinabe judiomonaepin pon pewūn Barjesús. Bapon Barjesús mara pexeinaein, pon saya naeraba paeba. Bapon Barjesús namchi, jeye: “Xan tacueicueijejin Nacom nexa”, jei. ⁷Barapon napuna poneiba pontha pon Chipre tunaetopiwi peyatunaeto ewatsinchi ponxae pewūn Sergio Paulo. Bapon Sergio Paulo peyaputaein. Bernabé Saulono wabatsibe pia jume taetsibe xua Nacom Pejume Diwesi tatsi pepaebiwa. ⁸Barapon pon mara pexeinaein icha wūn xeina, griego jume, “Elimas”, baraichi. Bapon Bernabé Saulono jume yancatabatsibe, tsipei jopa ichipaeyo xua Sergio Paulo jume cowūntsina Nacom Pejume Diwesi. ⁹Nexata Saulo, pon icha wūnxae Pablo, Nacom pia Pejumope tūnaxū tatsi jūntū coyene yūcatsi. Pablo bichocono pexainya beya tane. ¹⁰Pablo barai, jeye:

—iBarjesús, xam pon jiwi nemuxuitorobeibin, abe neexanaein, cauri pexantom, daxita xua pewūnaewan neaichaxaibim! ¿Eta xua daichim jiwi cui yancababeibame xua pejume cowūnteibiwa Jesús, pon jiwi Pecanamataxeinaeinchi? ¹¹Bara anoxuae Nacomtha natsiaenaē cuentsiname. Daxota caitacuere piontababa. Jopa caeto pesato taem tsane, beya poxonaē matapainya Nacom copatsina xua netaewa tsane, jei Pablo.

Bapoxonaē Elimas nainya itata quirei. Bapon ichawa beya ichūn nacobena jayaba, pecobe caponaenexatsi peitata nacūtsinxae. ¹²Poxonaē Sergio Paulo baxua tane bapoxonaē bapon Nacom jume cowūntatsi tsipei

tsita wūnaetsi pocotsiwa Pablo Bernabeno yabara cuidubabe Nacom pon jīwi Pecanamataxeinaeinchī.

**Meje yabara poxonae Bernabé Pablono Antioquía
tomaratha ecabe xua Pisidia nacuatha**

¹³Pablo irū pijimonaē tatsino Pafos tomara wewarapiya. Perge tomara be-iyiya jeratha, po nae pin nae. Perge tomaratha pata, Panfilia nacuatha. Barapo nacuatha daxita barapomonaē Juan Marcos wū pona. Barapoxonaē Jerusalén tomara bewarapiya. ¹⁴Nexata Pablo irū pijimonaē tatsi Antioquía tomara be-iyiya. Barapo tomara Pisidia nacua nacacuita ecabe. Barapo matabitha, po matabitha pentaquei seicaē matabitha, judiomonaē pia penacētutsi botha tatsi pata, yawa enoundeca. ¹⁵Baraxota ichūn yoroba Moisés pia peitorobi coyene diwesi tatsi. Yawa yoroba xua Nacom peitorobi jume pepaēbiwi paēba. Bapoxonaē poxonae najume weta pentacaponae, pomonaē peyabara umenaēwi penacētutsi bo, barapomonaē Pablo wabatsi irū piamonaē tatsi wabatsi. Barapomonaē jeye:

—Pata tajiwimonaem, icha paxei name diwesi, po diwesi xua barapomonaē pejūntū coyene tsacabiwatsi xua jūntema pejinompaewa nexa barapomonaē pomonaē xote ene, bara moya papaēbare barapo diwesi, jei barapomonaē.

¹⁶Nexata Pablo asiya uncua. Pecobetha jume matawenta xua moya peenaenexa. Pablo barai, jeye:

—Incane pajume taema, israelmonaē pam, irū paxamno pomonaē Nacom abe paca nēcaexanaēyainwa pam xua icha abe paexaname, pomonaē judiomonaē jopa naexanaēyo pam. ¹⁷Wamo susato jīwi, pomonaē Israel piamonaē, barapomonaē Nacom cana exana xua barapomonaē nayoyotapona beya xua pin bicheito naexanapona, poxonae cataunxuae Egipto nacuatha jinompa. Nacom itapeta waba barapomonaē, xua petanaexanaenexatsi pijimonaē jiwana tatsi. Daxota Nacom pia peayapusūwatha wamo jīwi capanepatsi Egipto nacua weya. ¹⁸Wamo jīwi ira xuepana susato tsurucuae nacua beya warapa cuarenta po weibe. Nacom yaweneiba barapomonaē bequein barapomonaē abe exaneiba cuarenta po weibe. ¹⁹Wamo susato jīwi tsimaxū dubatsi Nacom poxonae jutebatsi Canaán nacuamonaē. Nacom caewitaxuba Canaán nacuamonaē siete po bicheito matabūxūyobe. Wamo susato jīwi barapo ira xuya catatsi, Nacom cata. ²⁰Daxita baraxua Nacom exana barapomonaēta cuatrocientos cincuenta po weibetha.

“Bapoxonaē Nacom jiwana cana exana pomonaē jīwi peyabara paēbiwichi xua penatsicuentisiwa xua abe peexanaēxae pentacainompaenexa tsane barapomonaē. Nacom baxua exana beya poxonae pon pewūn Samuel popona pon Nacom pia peitorobi jume

pepaebin. ²¹Nexata israelmonae Nacomtha wūca pon be yatsicaya barapomonaē barompaya itorobiya pia pepa peewatsinchi tatsi tsane. Daxota Nacom taexana barapomonaetha pon pewun Saúl, Cis pexanto tatsi, pon Benjamín pia pemomoxi susato jiwana tatsi. Bapon Saúl, pon jiwī itorobiya pia pepa peewatsin naexana cuarenta po weiyobe. ²²Bapoxonaē Saúl cui matawentatsi Nacom abe peexanaexae. Equeicha exana ichun pon jiwī itorobiya pia pepa peewatsinchi, pon pewun David. Nacom yabara jume jei David: ‘David tan, pon Isaí pexanto. David netsita juntu coyene xanepana yawa wūnae exanano. David itapeta exanaena daxita pocotsiwa ichichipan’, jei Nacom. ²³David pia pemomo susato jiwana tatsi, bapon pewun Jesús. Jopa cain bayatha Nacom Pejume Diwesi paebi penamchixae Jesús capanepa Israel nacuamonaē. Baraxua caena bayatha Nacom yabara tsiwūnae muxu duta. ²⁴Pewūnaeya poxonaē Jesús tamropata pitabina xua pecuidubiwa Nacom nexa copiya matha Juan daxita Israel nacuapiwi tsipaeba xua pinae bewa nacui barapentsina abe peexanae cuiru coyenein xua Nacom petsita xeinaenexatsi icha juntu coyenein, xuano xua bewa pinae nabautisabina. ²⁵Poxonaē Juan bara imoxoyo tupa, jeye: ‘Jopa daponyo xan, pon xua payabara nanta xeiname, pon Mesías baraichi. Cotacaya ichun patopaena xua pon nepuna patopaena. Pocotsiwa bapon exana bichocono ainya cui beyacaincha pocotsiwa exanan. Bichocono pin ura tsita xeinan xua daxota bewa jopa tataxu m̄ isanaxubiwa tsane pia penataxu xatatsiwa tatsi’, jei Juan”, jei Pablo.

²⁶Equeicha Pablo jeye: “Tamonae pam, Abraham pia pemomoxi susato jiwī tatsi pamxaem, iruru pomonaē Nacom abe paca necaexanaeyainwa pam xua icha abe paexaname. Nacom pacata itoroba barapo pecapanenebiyae diwesi jume po diwesi Juan yabara paeba. ²⁷Barapomonaē pomonaē Jerusalén tomaratha jinompa iru pia pentacaponawewi tatsi jopa Jesús yaitaetsi po coyene xua bapon apara Mesías. Matautano barapomonaē jopa yaputaeyo xua bayatha Nacom peitorobi jume pepaebiwi yabara wūnae tsiwanaya paeba xua bexa Jesús cana exanaeinchi. Pentaquei seicae matabitha poxonaē ichamonaē yoroba po diwesi xua Nacom pia peitorobi jume pepaebiwi tina, judiomonaē pia penacuetutsi botha tatsi barapomonaē jopa yabara yaputaeyo barapo diwesi. Poxonaē Jesús naetotha tūparucua exanatsi, barapomonaē nanta jūpiya exana Jesththa icha be pocotsi coyeneya bayatha Nacom pia peitorobi jume pepaebiwi paeba. ²⁸Barapo judiomonaē jopa xeinaeyo po coyeneya xua Jesús pebexubiwa tsainchi. Bequein Jesús jopa abe exanaeyo ichitha barapomonaē Pilato wūcatsi xua Pilato itorobina soldadomonaē xua Jesús pebexubiwa tsainchi. ²⁹Barapomonaē exana daxita po coyene bayatha xua Jesús yabara wūnae tsiwanaya paebatsi Nacom Pejume Diwesitha. Barapoxonaē Jesús

pijimonae petupaein naeto wepichicatsi. Pijimonae muthutha xotsi petupaein pitapatororo muthutha. ³⁰Ichitha Nacom, Jesús equeicha caewa asu exanatsi petupae cuiru coyene weya. ³¹Matha cain Jesús puna jinompeibatsi ichamonae poxonae Galilea nacuatha popona, Jerusalén tomarathano. Barapomonaetha equeicha Jesús tsita naituta ducuaanaebiya ainya matabi dapaein. Pomonae Jesús bayatha tsita naituta, barapomonae apara pomonae xua anoxuae daxita tomaran tsipaeba dubenanaebiya Jesús yabara.

³²“Daxota paca tsipaebatsi Jesucristo pia pexeinya diwesi jume xua bayatha Nacom yabara tsiwuna nae muxu duta wamo susato jiwitha. ³³Baxua Nacom exana poxonae Jesús equeicha asu exanatsi. Nacata exana poxoru waxainchi wamo susatopiwi pijimonaetsi. Icha be pocotsi coyeneya bayatha tina Nacom Pejume Diwesitha xua salmos penaxuna weixi diwesintha, po wei xua ichaxota ‘dos’, jei xua jeye: ‘Xam, taxantom, itawan caexanatsi bara’, jei. ³⁴Nacom, Jesús asu exanatsi, xua equeicha jopa petupaenexa tsane, xua equeicha jopa tsabanuncuae tsane. Daxota jei pejume diwesitha: ‘Paca catinchi xua bayatha David tayabara tsiwuna nae muxu dutan’, jei. ³⁵Daxota pon xua tina salmos penaxuna weixi diwesintha, barapo diwesintha Nacom baraichi: ‘Jopa copatsim xua nexanto petsabanuncuaewa tsane pon bichocono pejuntu coyene xanepanaein’, jei. ³⁶Xainyei, David exana xua Nacom ichipa poxonae baru popona Israel nacuapiwi. David bayatha tupa. Muthutha xotsi ichaxota pamo jiwi tatsi yamuthu umena. Yawa bayatha tsabanuncua. ³⁷Ichitha barapo pepon po pepon Nacom asu exana, barapo pepon jopa tsabanaeyo. ³⁸Tamonae pam, maisa bepayabara yaputaename Jesús po coyene xua bapon Jesús pacata cayawa tupa abe painya neexanae cuiru coyenein xua daxota Nacom juntemaina barapo abe painya neexanae cuiru coyenein. ³⁹Tsipei Jesús tupa daxota daxita pomonae jume cowunta bapontha, Nacom juntu coyene wunaetsina. Bequein jiwi exana daxita pocotsiwa Moisés pia peitorobi coyenewatha itoroba, ichitha barapo coyenewa bapana jopa jiwi juntu coyene xanepana exanaetsi abe pia peexanae cuiru coyenein tatsi weya. ⁴⁰Dota, icha metha jopa Nacom pajume cowuntsipaem, bara paichim tsipae icha be pocotsi coyeneya bayatha pomonae Nacom peitorobi jume pepaebiwi yabara tina. Namchiya tina, jeye:

⁴¹ ‘Ja, jiwi pecui caponaemona nae pam,
 bara pana nabenaecare, pawarepare.
 Xan, Nacom, anoxuae exanaein bichocono pepa
 pewunaewa poxonae cataunxuae pajinompame.
 Baxua xua exanan, jopa pajume cowuntsim,
 bara bequein ichamonae paca tsipaeba’,
 jei Nacom”, jei Pablo.

⁴²Pablo, iru pia pepuna ponaewichi daxita barapoyobe judiomonae pia penacaetutsi bo tatsi wejojoniya. Pomonae baxota umena pomonae jopa yacuiya naexanaeyo xua judiomonae penaexanaewa, barapomonae Pablo wucatsi xua bepa pinae Pablo equeicha cuidubina po diwesi anoxuae paeba xua equeicha icha diwesi mataropeichiya cuidubina xua icha mataqueitha tsane xua pentaquei seicae matabitha. ⁴³Poxonae najume weta Pablo iru Bernabé, puna poinchibe judiomonae iru pomonae jopa judiomonae naexanaeyo. Barapomonae Nacom jume cowanta nawita icha judiomonae ichi. Pablo Bernabeno tsipaebabe barapomonae: “Nacom pajume cowanta dubenanaebiyama xua Nacom wanae pia pacata exanaenexa painya juntu coyeneintha pia paca necaantobexae”, jeibe.

⁴⁴Icha matabi, po matabitha pentaquei seicae matabitha, pin bicheito pomonae tomaratha ena, nacaetuta xua pejume taenexa Nacom pia pexeinya jume diwesi tatsi, pon Pecanamataxeinaeinchi jiwi. ⁴⁵Ichitha poxonae judiomonae pinmonae necota, jume uwa tsipei pinmonae nacaetuta pejume taenexatsi Pablo. Pablo jume matawentatsi xua paeba yawa tsumu jume baru paebatsino. ⁴⁶Nexata Pablo Bernabeno tsipaebabe barapomonae. Jopa auriya paebiyobe. Jeibe:

—Bara xanepana xua copiya Nacom Pejume Diwesi paca tsipaebatsi pomonae judiomonae pamxaem. Daichitha, jopa bepajume taem barapo diwesi tsipei jopa paichichaem xua painya nexainaewa peajuntuypusawa po peajuntuypusawa ataya tsiteca. Daxota anoxuae ichamonaetha pata tha ponaetsi pomonaetha pomonae jopa judiomonae naexanaeyo. ⁴⁷Pata Tanecanamataxeinaein Nacom pana itoroba. Pana baraino, jeye:

‘Paca exanatsi xua painya neyawenaewa
daxita pomonae jopa judiomonae naexanaeyo
xua xanepanaeya pejinompaenexa tsane.
Matautano paca exanatsi xua beta
painya netsipaebinexa Nacom Pejume
Diwesi daxita nacuantha, xua jiwi
pecapanenebiyaenexa tsainchi Nacom abe pia
peexanae cuiru coyenein weya tatsi’,
jei Nacom, jei Pablo.

⁴⁸Poxonae baxua jume taerucpa, pomonae jopa judiomonae naexanaeyo, barapomonae bichocono juntu coyene weiweinarucpa, juntea jinompano. Pablo tsipaebatsi: “Nacom Pejume Diwesi jume xeica. Bichocono jume wanae”, jei. Daxita barapomonae jume cowanta pomonae Nacom cuita itapeta petaxeinaenexa tsainchi peajuntuypusawa, po peajuntuypusawa ataya tsiteca. ⁴⁹Barapomonae pomonae Jesús pejume cowantsiwichi daxita nacuantha tsipaeba Jesús pia pexeinya jume diwesi tatsi, pon jiwi Pecanamataxeinaein. ⁵⁰Ichitha

judiomonae anaepana exana yabuxi powaxi Nacom cananta xeinatsi bichocono. Yawa pebiwi pomonae peainya cui jiwi, barapo pebiwi anaepana exanatsiru. Iru judiomonae Pablo Bernabeno abe yabara cueicueijeichibe, daxota daxita jiwi Pablo iru Bernabé casebatsibe. Barapo jiwi Pablo Bernabeno itawetaxotsibe pia nacua beya. ⁵¹Nexata Pablo Bernabeno nataxu nunutababe tsorobo. Baxua exanabe petsita itapeinya xeinaenexa po coyene bapomonae abe exana poxonae jume itaweta Nacom Pejume Diwesi. Barapoxonae warapabe Iconio tomara beya. ⁵²Ichitha pomonae Jesús jume cowunta, barapomonae bichocono juntu coyene weiweina. Matautano barapomonae juntu coyene yucatsi Nacom pia Pejumo pe tñaxu tatsi.

Meje yabara poxonae Pablo Bernabeno Iconio tomaratha poponabe

14 ¹Iconio tomaratha Pablo Bernabeno judiomonae pia penacetutsi botha tatsi jonyabe. Beta paebabe daxota pinmonae Jesús jume cowunta. Judiomonae jume cowunta, iruru pomonae jopa judiomonae naexanaeyo jume cowunta Jesús. ²Ichitha po judiomonae jopa Jesús pejume cowuntsiwichi barapomonae cui tsacaba pomonae jopa judiomonae naexanaeyo cui tsacabatsi. Daxota barapomonae pomonae jopa judiomonae naexanaeyo abe yabara nanta xeina xua pomonae Jesús pejume cowuntsiwi tatsi abe yabara nanta xeinatsi. ³Pablo Bernabeno barapo tomaratha ecabe. Ainya maticabi dapaein baraponbe ecabe baraxota. Nacom Pejume Diwesi jume daunweya cueicueijeibe Pecanamataxeinaein nexa. Baponbe Nacom cata pia peayapuswa peexanaenexabe pexeinya petsita itutsi coyenewan. Poxonae jiwi cui tane xua baponbe exanabe, barapo jiwi yaputane xua Nacom yawena baponbe, peantobexaetsibe. ⁴Daxita jiwi tomaratha be ainya jiwibe natsababe. Ichamonae judiomonae ichichipa. Ichamonae Jesús pia peitorobi jiwi tatsi ichichipa. Daxota ainya bicheitobe nacana exanabe. ⁵Nexata bapoxonae judiomonae iru pomonae jopa judiomonae naexanaeyo peburuya yabara jume baru nanta xeinarucupa xua pentacaponawewi paeba po coyene xua Pablo yawa Bernabé abe peexanaewa tsainchibe xuano xua ibotontha pecuinbabinexatsibe. ⁶Poxonae Bernabé Pablobe jume taebabe nainya naetsirucuabe Listra tomara beya, Derbe tomara beyano. Barapo tomarabe Licaonia nacuatha ecabe. Matautano icha tomaran beya ponabe Pablo Bernabeno xua po tomaran ena barapo Licaonia nacuatha. ⁷Barapo tomarantha cuiduba ducuaenabiyabe Jesús pia pexeinya jume diwesi tatsi.

Meje yabara poxonae Pablo Listra tomaratha ibotontha cuinbabatsi

⁸Listra tomaratha pebin popona pon pemubinchi, pon xua jopa peponaein. Bapon pexuyotha caena yawa naexaneca, xuano bapana

jopa ponaē. ⁹Bapon pon pemūbinchi Pablo jume tainchi xua pocotsiwa cueicueije. Pablo pemūbinchi tane. Pablo nanta xeina, xua pon pemūbinchi bara Nacom jume cowantatsi. Pablo nanta xeinataba xua axaibi peexanaewa tsainchi pon pemūbinchi. Daxota bichocono Pablo naita cui duya bapontha beya. ¹⁰Nexata Pablo jume daunweya barai, jeye: —Asiya uncuare, jei.

Pon pemūbinchi asiya uncuatabiya jirawuna yawa nainya ponano. ¹¹Poxonae Pablo cui tainchi barapomonaē, jume daunweya wawai pin jumetha, Licaonia pijumetha tatsi:

—iNacombe be pebin juta tsecae waxainya berena patopabe! jei.

¹²Barapomonaē namchi: “Maisa Bernabé bara mexeya nacom tsecae, po nacom pewun Zeus. Irū Pablo bara mexeya icha nacom tsecae, po nacom pewun Hermes”, jei. Barapomonaē bapo wun duta poxoru tsipei Pablo penantacapaēbin tsecae. ¹³Irū barapo nacom Zeus pia sacerdotemonaēpin xeinaru, pon Zeus wunaē jainteibatsi pia penacaeuttsi bo tatsitha. Barapo penacaeuttsi bo uncuatoma coiboto juma weya. Barapo sacerdotepin vaca pebton wiyaba pentonon pecaponaenexa Zeus pia penacaeuttsi botha tatsi. Barapo tomarapiwi irū Zeus pia sacerdotepin ichichipa juteba vaca pebton petautsinexa xua petuxusi exanaenexa Pablo irū Bernabé nexabe pia Pablo irū Bernabé yabara nanta xeinaēbe barapomonaē xua barapomonaē bara pejuntū coyene xanepanaewi. ¹⁴Bernabé Pablobe jume tanebe xua taexanaēinchibe baxua barapomonaē. Bapoxonae anaya nama paparuwa tsitsinaxubabe. Cuinaēponaya wawaibe poxoru aichaxaibibe xua baxua barapomonaē exanaena. Jeibe:

¹⁵—¿Eta xua daxua pana canautame? Apra saya jiji panbe. Be paxam paichim bara paichinbe. Papatopanbe tsipei apra pata paca catsipaēbinexa tsainchi xua painya nenacui barapentsiwa tsane barapo coyenexi xua jopa pecui xanepanaewiyo. Maisa Nacomtha panantana pende. Barapo Nacom pon peantūcuiyapusun, exana peitaboco, iranno, pin mēeinno. Daxita xua xuanno yawa muxuna dubena tsiniya Nacom bayatha exana. ¹⁶Wawunaeya Nacom cui copata daxita nacuapiwi xua bara pejinompaenexa icha be pocotsi coyeneya ichichipa xua pejinompaewa. Daxita jiji pia cui nata exana saya. ¹⁷Nacom xua pewunaewan nacopiniwa tsita ituba daxota jiji naita cui coyene tane xua Nacom exana. Barapon Nacom apra pon ema pacata itorobica, pexuwiwanno paca tsijain exaneica catsicano. Pexaewa paca cata. Paca juntū coyene weiweina exana, jei.

¹⁸Bequein Bernabé Pablobe jume daunweya yabara paebabe baraxua, awiya barapomonaē ichichipa jutebina vaca pebton xuano xua wunaē pejainchinexatsibe Pablo irū Bernabé. Barapomonaē muxu pejutebi vaca daichitha jopa jutebiyo.

¹⁹Bapoxonae judiomonaē pomonaē jopa pejume cowantsiwi, Antioquía tomara weparena, irurū Iconio tomara weparena. Daxita

barapo judiomonae Lистра tomarapiwi baru cueicueijeichi pebaru anaepanaenexatsibe Pablo iru Bernabeno. Nexata barapomonae Lистра tomarapiwi ibotontha cuinbabatsi Pablo. Barapomonae najuntu coyene xeina xua bayatha tupa Pablo. Pablo tomara coiboto juma bejojontapoinyatsi. ²⁰Jesús pejume cowuntsiwichi Pablo cacuita mata wacaicha umenarucupatsi. Bapoxonae Pablo asiya uncuataba. Equeicha tomara bepoinya. Icha mataqueitha Bernabé Pablobe Derbe tomara beya ponabe.

²¹Barapoxonae Bernabé Pablobe muxu tsipaebabe Jesús pia pexeinya jume diwesi tatsi. Pinmonae jume cowanta Jesús. Equeicha bapoxonae Lистра tomara beya, caibeya ponabe. Iconio tomarano, Antioquía tomara beyano bara bewarapiyabe. ²²Bernabé iru Pablo barapo tomarantha juntu coyene tsacababe pomonaetha pomonae pejume cowuntsiwi xua xanepanaya pejinompaewa tsane. Matautano cui itorobabe barapomonaetha xua bewa barapomonae beta xanepanaya jume cowanta dubenanaebiyaena. Barichino matautano tsipaebabe xua pinae poxonae ichamonae pepatsiwa tsane Nacom pia peitorobi nacua beicha bewa matha ajuntucoyenetane exaneibinchi xua ichamonae taexanaena. ²³Bernabé Pablobe tamroropata itapeta tsiniyabe pitiri jiwi daxita Jesús pejume cowuntsiwi pia penacaetutsi bontha. Barapo pitiri jiwi itapetatsi peyawenaenexa xua peyawenaenexatsi pomonae Jesús pejume cowuntsiwi. Poxonae daxita najume weta xua Nacomtha petsipaebiwa, xuano xua yabara nainbota pitiri jiwi nexa, barapoxonae Pablo iru Bernabé, Nacom pon Pecanamataxeinaein jiwi, jeichichi: “Nacom, barapo pitiri jiwi beta eenare jinya necajume cowuntsixae”, jeibe.

Meje yabara poxonae Bernabé iru Pablo Antioquía tomaratha equeicha caibe patopiya xua po tomara peecaexae Siria nacuatha

²⁴Copiya matha Pisidia nacua bewarapiyabe. Bapoxonae Panfilia nacuatha patopabe. ²⁵Jesús pia pexeinya jume diwesi tsipaebabe Perge tomaratha. Barapoxonae equeicha Atalia tomara bewarapiyabe. ²⁶Baraxotiya Atalia tomaratha Antioquía bewarapiyabe jeratha, po naetha po nae pin nae. Antioquía tomara barapo tomara ichaxota bayatha matha barapomonae Bernabé iru Pablo tawucatsibe Nacomtha poxonae juntucuru warapabe. Bayatha cain barapo Antioquía tomarapiwi tawuca Nacomtha, xua Nacom beta eenaena peantobexae xua Pablo iru Bernabeno beta eenaechibe poxonae nacuitabe Nacom pia penacuichiwa. Baxota equeicha Pablo Bernabeno pecoutha patopabe tsipei barapo pia penacuichiwabe bayatha wetabe. ²⁷Bernabé iru Pablo poxonae patopabe Antioquía tomaratha caetutabe pomonae pejume cowuntsiwi Jesús. Baponbe barapomonaetha tsipaebabe po coyene bayatha Nacom Pablo iru Bernabé taexanatsibe. Matautano tsipaebabe

xua Nacom pon Pecanamataxeinaein jiwi, pomonae jopa judiomonae naexanaeyo tacopatatsi xua iru barapomonae peitacupaewatsi xua pejume cowuntsinexatsi Jesús. ²⁸Bernabé iru Pablo baraxotiya aina dapaen naecabe barapomonae pia xantha tatsi pomonae Jesús pejume cowuntsi jiwichi.

**Meje yabara poxonae nacaetuta Jerusalén tomaratha
Jesús pia peitorobi jiwi tatsi iru penapatae jiwi**

15 ¹Barapoxonae iru pebiwi, pomonae Judea nacuatha jinompa, pata Antioquía tomaratha. Barapomonae tamropata notarucupa xua pecuidubiwa pomonaetha pomonae iru pejume cowuntsiwixae Jesús. Jeye: “Icha paichichipame xua painya nepaca capanenebiwa matha pana nawi thabare pebiwi pam ichaxota pana nareixacaename icha be ichi pocotsi coyeneya bayatha Moisés paca itoroba”, jei. ²Pablo iru Bernabeno jume daunweya tsipaebabe xua baxua jopa xainyeyo. Ichitha jume matsontsonobatsibe barapomonae. Daxota Pablo iru Bernabé wun dutatsibe, iru ichamonae wun dubatsi xua daxita barapomonae peponaenexa Jerusalén tomara beya. Matautano barapomonae itorobatsi xua barapo penawi thabi coyene yabara petsipaebinexatsi Jesús pia peitorobi jiwi tatsi, iruru pitiri jiwi petsipaebinexatsi pomonae penacaetutsi jiwi jiwana xua Jerusalén tomaratha.

³Barapo Antioquía tomarapiwi pomonae Jesús pejume cowuntsiwi pu taeumena. Pablo iru Bernabé iru icha pebiwi pu taeumeinchi. Barapoxonae Pablo Bernabeno iru icha pebiwino warapa. Barapomonae siwa pona Fenicia nacua beya, Samaria nacua beyano. Barapomonae Pablo Bernabeno tsipaebabe, jeibe: “Pomonae xua jopa judiomonae naexanaeyo, barapomonae pia cui coyenein nacui barapenta po coyenein xua jume cowunta bayatha pia jume cowuntichi Nacomtha”, jeibe Pablo, Bernabeno. Daxita pomonae iru pejume cowuntsiwixae Jesús bichocono juntu coyene weiweina poxonae jume tane baxua.

⁴Bernabé iru Pablo poxonae patopabe Jerusalén tomaratha, pomonae pejume cowuntsi jiwi baponbe matenta weiweinaya wabatsibe. Iruru Jesús pia peitorobi jiwi tatsi matenta weiweinaya waba. Barichiru pitiri jiwi matenta weiweinaya waba. Bernabé iru Pablo tsipaebabe barapomonaetha po coyene bayatha Nacom taexana baponbetha. ⁵Ichitha ichamonae fariseomonae, pomonae bayatha jume cowunta Jesús, asiya umena. Barapomonae namchi, jeye:

—Pomonae jopa judiomonae naexanaeyo pomonae pejume cowuntsiwi Jesús bewa exanaetsi xua penawi thabiwa tsane xua ichaxota nareixacaena xua ichaxota pebiwixae xeina. Matautano bewa cui itorobichi xua bewa exanaponaena pocotsiwa bayatha Moisés itoroba pia peitorobi coyenewatha, jei.

⁶Bapoxonae Jesús pia peitorobi jiwi tatsi irũ pitiri jiwimonaeno nacaetuta peyabara paebinexa barapo penawi thabi coyene. ⁷Caena bayatha bapomonae najume matsontsonobompa. Bapoxonae Pedro asiya uncuataba. Barai barapomonaetha, jeye:

—Tamonaē pam, pomonaē irũ painya nejume cowũntsiwixae Jesús, paxam payaputaneme, xua caena bayatha Nacom neitapeta painya xantha. Newaba tacueicueijeinexa tsane Jesús pia pexeinya pecapanenebiyae diwesi jume pomonaetha pomonaē jopa judiomonaē naexanaeyo, xua irũrũ barapomonaē pejume cowũntsinexa barapo diwesi. ⁸Nacom pejuñtũ coyene yaputaēin jiwi daxota naca yaputane exana xua bapon tsitatsi xua barapomonaē pejuñtũ coyene xanepanaewi bequein jopa judiomonaē naexanaeyo. Nacom bara nanajumope tũnaxũ cata barapomonaetha icha matha naca cana ichi. ⁹Nacom bichocono antobe barapomonaē icha ichi xua bichocono naca antobe. Nacom juñtũ coyene puxana exana barapomonaē xua abe pia peexanaē cuiru coyenein tatsi pejume cowũntsixaetsi icha naca ichi. ¹⁰Maisa anoxuae jopa bepayabara yaputaem pocotsiwa Nacom exana. Mataũtano barapo pejume cowũntsiwi pomonaē jopa judiomonaē naexanaeyo pacui itorobame xua penawi thabiwa xua ichaxota nareixacaena xua ichaxota pebiwichi xeinatsi. Mataũtano be paca ita cui jicha xua barapomonaē bewa exanaena pocotsiwa Moisés itoroba. Apra baraxua jopa naca itacũpaeyo xua waexanaewa. Irũrũ wamo susato jiwi jopa itacũpaetsi xua peexanaewa baxua. ¹¹Nama apra waxainchi wanaca capanenebiyae jiwichi xua saya amanaya xua Jesús pon jiwi Pecanamataxeinaēin peichichipaexae baxua. Barapo pejume cowũntsiwi irũ bara cana ichichi, jei Pedro barapomonaetha.

¹²Bapoxonae barapomonaē moya umena. Barapomonaē Bernabé irũ Pablo jume taeumenatsibe. Tsipaebabe: “Paponeibanbe pomonaetha pomonaē jopa judiomonaē naexanaeyo. Paexaneibanbe barapomonaetha pexeinya petsita itutsi coyenewan Nacom pia peayapusũwiyatha tatsi”, jeibe. ¹³Poxonae Bernabé irũ Pablo najume wetabe xua paebabe, bapoxonae Santiago namchi, jeye:

—Tamonaē pam, pomonaē irũ painya nejume cowũntsiwixae Jesús, pana nejume taema: ¹⁴Simón Pedro aunxuae naca tsipaeba. Pedro namchi: ‘Poxonae Nacom copiya tamropata pitaba xua yawena pomonaē jopa judiomonaē naexanaeyo, Nacom jiwana itapeta pomonaē xua peantobenexa tsainchi bapon’, jei Pedro. ¹⁵Xuaunxuae Pedro paeba caena bayatha Nacom pia peitorobi jume pepaēbiwi yabara tsiwũnaē muxu dutsiya tina Nacom Pejume Diwesitha xua Nacom nexa, jeye:

¹⁶ ‘Poxonae daxita baraxua wetsina,
xan Nacom equeicha patoparecaēin.
Exanaēin xua caēin, pon David pia

pemomo jiwi tatsi jiwana matacapoponaena
piamonae, icha matha David ichi
poxonae piamonae matacapopona.

¹⁷ Poxonae baraxua exanaein, barapoxonae ichamonae
pomonaе jopa judiomonaе naexanaeyo newenawenei
tsane pia tanejume cowuntsinexa tsane.
Barapomonae pia Pecanamataxeinaein tatsi
naexanaein taitapetsixae barapomonae.

¹⁸ Nacom pon jiwi yaputaeya
exanatsi barapo coyenein caena bayatha
pepaebixae baxua daxota xaniwaicha
Nacom exanaena', jei Nacom pia
peitorobi jume pepaebiwi, Nacom Pejume
Diwesitha xua Nacom nexa, jei Santiago.

¹⁹ Santiago cataunxuae awiya cueicueijeji, jeye: "Daxota nanta
xeinan, equeicha waxainchi jopa bewa itorobi tsainchi pomonaе jopa
judiomonaе naexanaeyo xua peexanaewa po coyenein xua taayapubetsi.
Barapomonae naciui barapenta pia cui coyenein po coyenein xua jume
cowunta bayatha pia jume cowuntichi Nacomtha. ²⁰ Betatinaetsipatsi
carta pomonaе jopa judiomonaе naexanaeyo. Barapo cartatha
jeichipaetsi: 'Jopa equeicha pewi paxaeinde po wi jiwi tajeba ibo nacom
nexa. Painya xoba yabuxi panotame po yabuxi jopa painya seurixi.
Painya xoba duwei pawi xaneme pon saya pipato tupa xuano pon saya
bunopa. Matautano jopa paxaeinde pejanan', bejei tsipaetsi. ²¹ Baraxua
bewa exanaetsi poxoru caena cain bayatha pomonaе Nacom Pejume
Diwesi pecanatsipaebi jiwi yorobeiba barapo diwesi judiomonaе pia
penacaetutsi bontha tatsi. Daxita tomarantha xua po matacabintha
pentaquei seicae matacabintha barapomonae yorobeiba Nacom Pejume
Diwesi, po diwesi xua Moisés tina bayatha pocotsiwa yabara tsiwunaе
muxu duta Nacom", jei Santiago.

**Meje yabara poxonae barapo bicheito carta tatina
pomonaetha pomonaе jopa judiomonaе naexanaeyo**

²² Jesús pia peitorobi jiwi tatsi iruru pitiri jiwi, iru daxita pomonaе
pejume cowuntsiwi juntucuru najiwana itapeta. Bapoxonae xua Antioquia
tomara beya penajiwana itorobinexa Pablo iru Bernabé. Judas wun
dutatsi pon icha wun Barsabás. Iru Silas wun dutatsi, baponbe ponbe
bichocono peainya cui jitonbe xua pomonaе iru pejume cowuntsiwi pia
xantha tatsi. ²³ Jesús pia peitorobi jiwi tatsi iruru pitiri jiwi, iru pomonaе
Jesús pejume cowuntsiwi, barapomonae carta tina xua pecaitorobinexa
xua Pablo iru Bernabé iru Judas iru Silas barapoyobe pecaitorobinexatsi.
Barapo carta namchi, jeye:

“Paxan Nacom pia peitorobi jiwi tatsi pan, iru pitiri jiwi panno xua nacaemonae jiwichi xua wajume cowuntsiwichi Jesús. Paxan pajacoban patamonae pomonae jopa judiomonae naexanaeyo pomonae iru Jesús pejume cowuntsiwichi, pomonae pejinompaexae Antioquía tomaratha, xuano xua pejinompaexae Siria nacuatha, Cilicia nacuathano. ²⁴Payaputan ichamonae xua patamonae pata tomara weya pipato paca siwa pona painya tomara beya. Paca cajume acaura. Barapomonae namchi: ‘Pana nawi thabare. Matautano paexande pocotsiwa Moisés pia coyenewatha itoroba’, jei. Jopa paitorobinyo barapo jume. ²⁵Daxota be juntucuru pawunaein xua cuita pananta jupaya nanta xeinan. Paitoroban ichamonae pata xainya weya pia paca necataenexa tsane. Napuna ponabe Bernabé Pablono ponbe bichocono paantobein. ²⁶Baponbe Pablo iru Bernabé muxu pebocaebe xua pebexubiwatsibe pecueicueijeji tsurucuaenaebiyaexaebe Jesucristo nexa, pon Wanacanamataxeinaein. ²⁷Paitorobanbe Judas Silasno. Baraponbe saya pia coutha paca tsipaebinabe daxita xua barapo cartatha papaeban painya neyaputaenexa. ²⁸Paxan iru Nacom pia Pejumope tunaxu tatsi pananta jupaya nanta xeinan xua jopa bepaca itorobichi icha cui coyene po cui coyene bichocono pacata ayapube xua painya neexanaewa tsane. Meisa saya u baxua xua pacata tinatsi po cartathe baxua panantawenoname xua painya neexanaewa tsane. ²⁹Painya xoba paxaneme pewi po wi jiwi tajeba ibo nacom nexa poxonae tauta barapo duwei xua tuxusi exana barapo ibo nacom nexa. Barichi painya xoba duwei pawí xaneme pejanano po duwei pipato tumpumena. Matautano ichamonae painyamonae jiwana pia xoba nota yabuxi powaxi jopa piseurixi tatsi. Icha baraxua panacui barapentsiname xanepanaya pajinompaename. Baja”, jei barapo cartatha.

³⁰Bernabé iru Pablo, iru Judas Silasno barapomonaeyobe peitorobixaetsi bara Antioquía tomara be-iyiya. Barapo tomarathiya barapomonaeyobe caetuteta pomonae pejume cowuntsiwi. Matautano barapomonaeyobe barapo carta cata barapomonaetha. ³¹Pomonae iru pejume cowuntsiwixae Jesús bara yoroba barapo carta. Barapomonae bichocono juntu coyene weiweina tsipei barapo cartatha cui matateicaeya yabara paebatsi. ³²Judas iru Silas peitacupaexaetsibe xua beta petsipaebiwabe Nacom Pejume Diwesi xua Nacom yaputane exana, daxota juntu coyene tsacababe barapomonaetha pomonae iru Jesús pejume cowuntsiwi tatsi xua beta pejinompaewa tsane. Matautano baponbe cui matateicabe. ³³Barapoyobe barapo pejume cowuntsiwitha naecabe caena bayiyo. Barapoxonae barapomonae pomonae pejume cowuntsiwixae Jesús barapoyobe juntu coyene xanepanaya pu napeyabatsi xua penawibiyaexae caibeya ichaxota werena bayatha pomonae peitorobirenaexaetsi. ³⁴Ichitha Silas juntucuru narunta. ³⁵Pablo

irũ Bernabé Antioquía tomaratha ecabe. Baponbe irũ ichamonaeno pomonae pinmonae, daxita barapomonae cuiduba dubenanaebiya yawa tsipaeba dubenanaebiya Jesús pon Pecanamataxeinaein jiwi pia pexeinya jume diwesi tatsi.

Meje yabara poxonae Pablo equeicha warapa nacueyatabe po cuiyobetha xua Jesús pia pexeinya jume diwesi tatsi pecueicueijeixa nexa

³⁶Pirapaeyo icha mataqueitha, Pablo barai, Bernabé baraichi, jeye: —Antha equeicha Jesús pejume cowũntsiwi siwa ponaeinchi daxita jũpaya tomarantha ichaxota matha cain Jesús pon jiwi Pecanamataxeinaein pia jume diwesi tatsi tsipaebatsibe. Wayaputaenexabe icha metha bara beta jinompa bapomonae, jei Pablo.

³⁷Bernabé ichichipa xua puna poinchibe pon Juan, pon icha wũnno Marcos. ³⁸Ichitha Pablo jopa ichipaeyo xua pebarũ ponaewatsi Juan Marcos tsipei bayatha Panfilia tomaratha Bernabé irũ Pablo cuenta ponatsibe. Bayatha Juan Marcos juntucuru jopa benapuna nanacuichiyo Jesús pia pexeinya jume diwesi tatsi. ³⁹Najume matsontabe. Bernabé irũ Pablo nawũ tsatajopabe. Bernabé tsana barũ jopa Marcos. Weratha ponabe Chipre tunaeto beya. ⁴⁰Barapoxonae Pablo cuita waba Silas. Antioquía tomaratha pomonae pejume cowũntsiwixae Jesús, Pablo Silasno tatsipaebatsibe Nacomtha xua Nacom peenaenexa peantobexae xua Pablo irũ Silas peenaenexatsibe poxonae cueicueijeibe Nacom Pejume Diwesi. ⁴¹Pablo irũ Silas warapabe Siria nacua beya, Cilicia nacua beyano. Baponbe jũntũ coyene tsacababe pomonaetha pomonae pejume cowũntsiwi Jesús xua beta pejinompaewa nexa.

Meje yabara poxonae Timoteo cueyata, Pablo irũ Silas cueyatatsibe

16 ¹Pablo irũ Silas Derbe tomaratha patopabe. Equeicha bapoxonae Listra tomaratha patopabe. Baraxota Listra tomaratha caxinabe pebin pon pejume cowũntsin Jesús. Bapon pewũn Timoteo. Pena tatsi saya judiomonaewayo. Barapowa irũ pejume cowũntsiwayo Jesús. Timoteo paxa tatsi griegomonaepin. ²Jesús pejume cowũntsiwi, pomonae jinompa Listra tomaratha, irũ pomonae Iconio tomaratha jinompano, barapomonae Timoteo beta yabara paebatsi xua pinae pejũntũ coyene xanepanaein. ³Pablo ichichipa xua bepuna ponaichatsi Timoteo xua peyawenaenexatsi. Ichitha matha copiya cui itorobatsi Timoteo xua pewi thabinexatsi xua ichaxota nareixacaeca xua ichaxota pebinxae xeina. Pablo baxua exana tsipei jopa ichipaeyo xua judiomonae anaepana peexanaewa tsainchi xua jopa pewi thabixae tsipaetsi Timoteo. Tsipei Pablo yaputane xua judiomonae nawita ichaxota ponebinabe. Barapomonae judiomonae nawi thabeiba tsipei pia cui. Matautano barapomonae judiomonae yaputane xua Timoteo paxa tatsi griegomonaepin. Daxota Timoteo jopa caena

bayatha wi thabichi tsipei canta griegomonae jopa daxua exaneibiyo. ⁴Daxita jupaya tomarantha pateiba, Pablono, Silasno, Timoteono. Barapomonaeyobe tsipaebabe pomonaetha pomonae Jesús pejume cowuntsiwi pocotsiwa bayatha Jesús pia peitorobi jiwi tatsi iru pitiri jiwi tina cartatha poxonae nacaetuta Jerusalén tomaratha pomonae pejume cowuntsiwi Jesús. ⁵Daxota pomonae penacaetutsi jiwi bara xanepanaya beta jume cowanta. Daxotano pinmonae jume cowanta. Daxita matababi mataropeicha pinmonae tsoponae xua jume cowantapona Jesús.

Meje yabara poxonae Pablo camaita Macedonia nacuapin

⁶Nacom pia Pejumo pe tñaxu tatsi Pablo jopa copatichi xua pecueicuejiwa tsane Nacom pejume diwesi Asia nacuatha. Daxota Pablobaru Frigia nacua iya pona xuano xua Galacia nacua iya pona. ⁷Misia nacua iyiya. Baraxotiya bequein ichichipa pata Bitinia nacuatha, ichitha Jesús pia Pejumo pe tñaxu tatsi apusiwa. ⁸Daxota Misia nacua iyiya. Troas tomaratha mene itapatha pata. ⁹Baraxota merawi Pablo camaita pebin pon Macedonia nacuapin. Bapon Macedonia nacuapin nantacotuncua. Pablo jume daunweya wabatsi: “iAnetha denande! Macedonia nacua berena. iPana yawende!” jeichichi Pablo. ¹⁰Pablo camaita bapon, daxota paxainxainyan xua pata warapaenexa Macedonia nacua beya. Iru xan, Lucas tsocuaein, naponan. Paxan tsipei payaputan xua bara Nacom pana itoroba barapo nacuatha xua pata cueicuejiwa tsane Jesús pia pexeinya jume diwesi tatsi.

Meje yabara poxonae Pablo iru Silas Filipos tomaratha ecabe

¹¹Jeratha pawarapan, po naetha po nae pin nae. Paponarucupan Troas tomara mene itapa weya. Weratha bopiya payiyan petunaeto cacuitiya Samotracia tunaeto. Icha matababitha papatan Neápolis tomaratha. ¹²Equeicha baxotiya Filipos tomara bepaiyan, po tomaratha xua romanomonae cueranta ena. Barapo Filipos tomara yatsicaya pepa tomara, pepa Macedonia nacua. Baraxota ainya matababin paenan. ¹³Caentacabi, po matababi pentaquei seicae matababitha, tomara pepuya beya paponan mene itapa beya, ichaxota judiomonae Nacom wuqueiba. Paenan baraxotiya. Jesús pejume diwesino pacueicueijan yabuxitha powaxi xua cou bayatha nacaetuta. ¹⁴Barapowaxi caewayo jiwana pana jume tane. Barapowa pewun Lidia, Tiatira tomarapiwayo. Bapowa caenaeteiba papaburu, po papaburu mu tsobia po papaburu ainya matoman. Barapowa wuna jainteiba Nacom. Barapowa beta jume tane pocotsiwa Pablo paeba. Nacom pon jiwi Pecanamataxeinaein, barapowa icha juntu coyene cana exanatsi xua peexanaenexa pocotsiwa Pablo paeba. ¹⁵Barapowa bautisabatsi, yawa piamonae matabuxuyo tatsi bautisabatsi. Bapoxonae bapowa pana barai, jeye:

—Icha bara metha xaniwaicha pananta xeiname xua Jesús tajume cowuntsiwayo, pon jiwi Pecanamataxeinaein, nexata antha tabotha pamaire, pana nejei Lidia.

Pecono jumeyotha pana barai, bepa pinae xua pia botha pamaichin.

¹⁶Icha mataqueitha poxonae namtotha paenaponan xua poxonae paponan ichaxota jiwi wūqueiba Nacomtha, baxota yabūyo pacaxinan namtotha. Barapowayo cauri xeina. Barapowayo pebusi cui taetaewayotsi xua amanaya petanacuichiwa pia pentacaponaein nexa. Matautano barapowayo paratixi caetuba pia pentacaponaein tatsi nexa xua bapowa pecueicueijeji tsaibixae pocotsiwa cauri yaputane exana. ¹⁷Barapowa, Pablo, irū paxan pana pu wabapona. Bapowa wawaya namchi, jeye:

—iBarapomonaē tanacuita Nacom nexa, po Nacom itabocotha eca! iPaca muxu tsipaeba Nacom pia pecapanenebiyae diwesi! jei barapowayo.

¹⁸Bapowa baxua exaneiba ainya matacabin. Pablo amuxufaetabi. Pablo barapowa taitaweta cauri. Pablo cauritha namchi, jeye:

—Jesucristo wūnthā caitawetatsi. Naetsiriware. Xubariware bapowayo, jei Pablo.

Bara caena barapowayo copatabatsi cauri.

¹⁹Barapoxonaē yabūyo cui tainchi pia pentacaponaeiwichi tatsi xua equeicha jopa amanaya tacaetubi tsane paratixi barapomonaē nexa. Daxota Pablo Silasno waetabatsibe. Pematacaitorobi bicheito jiwi peitabaratha capoinchibe tomara panatha. ²⁰Barapomonaē Pablo irū Silas cuaranotatsibe peitabaratha tatsi pomonaē jiwi peyabara paebiwi xua penatsicuentisiwa xua abe peexanaexae. Barapomonaetha jeye:

—Baponbe judiomonaē jitonbe, watomaratha baponbe wamonaē cui tsacabatsi xua najume matsontsonoba. ²¹Baraponbe pia cui coyeneya naca cuiduba. Barapo coyene jopa becopatichi xua wajume taenexa xuano xua waexanaenexa, tsipei romanomonaetsi, jei barapomonaē.

²²Bara nexata Pablo irū Silas barū anaepanarūcupatsibe jiwi. Matautano pomonaē jiwi peyabara paebiwi xua penatsicuentisiwa xua abe peexanaexae, barapomonaē ichamonaē cui itorobatsi xua Pablo irū Silas peūma xuenaxubinexatsibe paparuwa, bapoxonaē xua pecuainchinexatsibe iwatontha. ²³Matha bichocono cuaintatsibe. Bapoxonaē caponatsibe jiwi pecūbi bo beya. Pon peyabara equeibin pomonaē cūbebatsi jiwi pecūbi botha bapon cui itorobatsi jeichichi: “Beta yapu eenare, xua jopa penaetsiriwanexabe”, jeichichi barapon. ²⁴Poxonaē bapon jume tane pocotsiwa pentacaponaeiwi cui itoroba, bapoxonaē po tutu tajū beya baxota Pablo irū Silas cuaranoyatsibe. Bichocono naepaewatha taxu cateitabetatsibe jiwi petaxu cateibabi naewatha.

²⁵Papaetha Pablo irū Silas Nacomtha tsipaebabe yawa Nacom pijume weino naxūnabe. Ichamonaē baraxota cūbebatsi jiwi pecūbi botha. Barapomonaē Pablo irū Silas jume tayenatsibe. ²⁶Barapoxonaē

jemeicha bichocono jijiyataxuba. Ibowano jijiyataxubano xua bomuxu peyutanotsiwa. Bapoxonae jemeicha nainya saya dubenanaya peboupān. Matautano pomonae jiwi pecubi botha jebatsi daxita taxu nain sarababatsi. ²⁷Pon peyabara equeibin pomonae cubebatsi, bapon nacosataxuba. Bapon tane xua barapo jiwi pecubi bo saya peboupa umenarucupa. Bapoxonae pia cusi namara jonta. Muxu penabexubi, tsipei bapon nanta xeina xua bara daxita panenebiya, Pablo, Silasno iru ichamonaeno. ²⁸Ichitha Pablo waba bapon pon peyabara equeibin pomonae cubebatsi jiwi pecubi botha, jeye:

—iJopa jinya coutha nabexubinde, tsipei apara cataunxuae xote pajinompan! jei Pablo.

²⁹Nexata pon peyabara equeibin pomonae cubebatsi jiwi pecubi botha, wawaya namchi, jeye: “Painta itanatabare”, jei. Jijiyeya cuinaepondena. Pablo iru Silas imoxoyo petaxutha pentabocototha caquita tauncuatabatsibe. ³⁰Bapoxonae bapon pon peyabara equeibin pomonae cubebatsi jiwi pecubi botha, bapon Pablo iru Silas pesato becayatsibe. Pablo iru Silas baraichichibe, jeye:

—Ja, zeta bichocuaein tsane xua tana necapanepaewa tsane Nacom beicha? jei bapon.

³¹Pablo iru Silas jume notabe, jeye:

—Jume cowande Jesús pon jiwi Pecanamataxeinaein, bapoxonae necapanepae jitom tsane iru jinyamonae matabuxuyo pecapanenebiyae jiwi tsainchi, jeibe.

³²Tsipaebabe bapontha, Jesús pon jiwi Pecanamataxeinaein, pia pexeinya jume diwesi tatsi. Matautano tsipaebabe piamonae matabuxuyo jiwitha tatsi, pomonae pia botha petaenaexaetsi. ³³Caena barapoxonae, pon peyabara equeibin pomonae cubebatsi jiwi pecubi botha, Pablo, iru Silas wan quiatatsibe. Bapoxonae bapon bautisabatsi iru piamonae matabuxuyo tatsi bautisabatsi. Pablo, iru Silas bautisababe. ³⁴Bapoxonae Pablo iru Silas bo beya caponatsibe. Pexaewa catatsibe. Bapon piamonae matabuxuyo tatsino bichocono juntu coyene weiweina pejume cowuntsixae Nacom.

³⁵Pomonae jiwi peyabara paebiwi penatsicuentiwa xua abe peexanaexae, barapomonae caemumbotha itoroba, policiamonae itorobatsi ichaxota pon peyabara equeibin pomonae cubebatsi jiwi pecubi botha. Bapon copatatsi xua bara Pablo iru Silas pepu copatsinexatsibe.

³⁶Nexata pon jiwi peyabara equeibin pomonae cubebatsi jiwi pecubi botha, bapon Pablo baraichi, jeye:

—Pomonae jiwi peyabara paebiwi penatsicuentiwa xua abe peexanaexae, barapomonae necui itoroba xua tapaca isanaxubiwa tsainchibe. Bara paca itacupabe xua bara papu seicaenamebe, jei bapon.

³⁷Ichitha Pablo barai policiamonaetha, jeye:

—Apara barapomonaē pana cuainta pepa bicheito peitabaratha. Dacotsiwa barapomonaē abe painta exana. Seicaya apara romanomonaē pan. Copiya matha jopa pana caponaeyobe ichaxota pon jiwi peyabara paebin xua penatsicuenta siwa xua abe peexanaexae. Saya barapomonaē pia coutha paeba xua abe paexananbe. Daxota jiwi pecūbi botha pana caponabe. Deta aena poxonaē juntucuru pana isanaxubapaebabe moya namicha pana itorobabe. Pentacaponaewi patsipaebare, pomonaē pana cuainta, bu jame barapomonaē pia coutha pana nepu sotababe, jei Pablo.

³⁸Baxua policiamonaē bayatha jume yopita pomonaetha pomonaē jiwi peyabara paebiwi xua penatsicuenta siwa xua abe peexanaexae. Barapomonaē bichocono junuwa poxonaē jume tane xua Pablo iru Silas apara romanomonaepinbe. ³⁹Barapomonaē ponarucpa jiwi pecūbi botha, Pablo, iru Silas siwa poinchibe peauraxae xua bayatha Pablo, iru Silas cuaintatsibe. Barapomonaē Pablo iru Silas tsipaebatsibe, jeichichibe: “Maisa paauran tsipei abe paca exanatsibe. Moya paponarebe. Jopa po tomarathe paecaeindebe. Jopa pana neyopichinde”, jei. ⁴⁰Poxonaē Pablo iru Silas jiwi pecūbi bo wenaetabiyabe, Lidia pia bo tatsi be-iyabe. Siwa ponabe pomonaē pejume cowuntsiwixae Jesús. Barapomonaetha baponbe juntu coyene tsacababe xua xanepanaya pejinompaewa tsane. Bapoxonaē bara wewarapiyabe.

Meje yabara poxonaē Tesalónica tomarapiwi namtsebiya anaepanaya wawai xua Pablo, iru Silas pecasebixaetsibe

17 ¹Pablo iru Silas Anfípolis tomara iyabe. Apolonia tomara iyabeno. Barapoxonaē Tesalónica tomaratha patopabe po tomara ichaxota judiomonaē pia penacaetutsi bo tatsi uncua. ²Pablo pia cui xeina xua judiomonaē pia penacaetutsi bontha tatsi pateiba. Daxota baxota eca acoibi po semanabe. Matautano daxita pentaquei seicaē matacabintha barapo judiomonaē pia penacaetutsi botha Pablo iru Silas cuidubabe. ³Pocotsiwa Nacom Pejume Diwesi paeba, baxua Pablo tsipaeba po coyene xua pinae pon Mesías bewa bexubinchi ichamonaē, xuano xua pinae bapoxonaē equeicha asu tsane. Pablo jeye barapomonaetha:

—Pon xua Jesús xuaunxuae yabara paca muxu tsipaebatsi, bapon apara bara Mesías, jei Pablo.

⁴Ichamonaē, judiomonaē jume cowunta. Barapomonaē Pablo, iru Silas caemonaē naexanatsibe. Barichi pin bicheiton griegomonaē jume cowuntaru, pomonaē Nacom wunaē jaintatsi. Barapomonaē jume cowunta Jesús. Iruru ainya yabuxi bicheiton jume cowunta Jesús powaxi baru cui itura jineibatsi xua jiwi baru cui itura jineiba.

⁵Ichitha icha judiomonaē pomonaē jopa pejume cowuntsiwi, baxua yabara uwa. Daxota barapomonaē pebiwi baru nacaetuba po pebiwi peajuntu coyeneyapubewi xua po pebiwi saya pejinompaewi namtontha.

Daxita barapomonae namtsebiya wawai tomaratha. Jasón pia botha tatsi anaepanaya jojoniya xua Pablo iru Silas pejeichinexatsibe xua pewaetabinexatsibe xuano xua pecaenaetsinexatsibe jiwitha. ⁶Ichitha baxota Pablo iru Silas jopa taebichibe. Daxota catsaya waetabatsi Jasón, iru ichamonae pomonae pejume cowuntsiwixae Jesús. Pablo iru Silas waetabatsibe. Daxita barapomonae pentacaponae jiwitha becayiyatsi. Daxita barapomonae yabara wawaichiya jeichibe:

—iBarapo pebinbe daxita nacuantha abe paeba ducuaenaebiyabe yawa waxainya becui joparenabe! ⁷Jasón barapomonae matenta weiweinaya waba pia botha. Jasón pia botha maitecabe. Daxita Pabloaru jopa exanaeyo po peitorobi coyenewan xua pon romanomonae itorobiya pia pepa peewatsinchi itoroba. Matautano barapomonae paeba xua pinae ichun popona pon jiwi itorobiya pia pepa peewatsinchi, bapon pinae Jesús, xua jopa yabara cananta xeinaetsi pon romanomonae itorobiya pia pepa peewatsinchi, jei barapomonae xua namtsebiya wawai.

⁸Poxonae baxua jume tane, pentacaponae iru pomonae xua baxota umena, daxita barapomonae anaepanaeya namtsebiya wawai. ⁹Barapo pentacaponae wecobe nota paratixi xua Jasón iru pomonae pejume cowuntsiwi wecobe notatsi. Barapo pentacaponae namchi xua pinae equeicha caewa catsinchi Jasón barapo paratixi poxonae Pabloaru tomara weya ponaena. Bapoxonae pentacaponae Pablo baru pu sorobabatsi pewarapaenexa tsane tomara weya.

Meje yabara poxonae Pablo iru Silas Berea tomaratha poponabe

¹⁰Barapo merawitha pomonae iru pejume cowuntsiwixae Jesús, barapomonae Pablo, iru Silas itorobatsibe xua nainya pewarapaenexabe Berea tomara beya. Poxonae barapo tomaratha patopiyabe judiomonae pia penacatutsi botha tatsi jonyabe. ¹¹Judiomonae, pomonae Berea tomarapiwi, barapomonae pejuntu coyene xanepanaewi icha be jopa Tesalónica tomaratha ichiyo. Jame barapo Berea tomarapiwi bara xanepanaya jume tane Jesús pejume diwesi. Daxita matabi barapomonae Nacom Pejume Diwesitha yorobeiba pia yaputaetsi barapo diwesi, po diwesi xua Pablo iru Silas paebabe icha metha baraxua bara xainyeibe. ¹²Daxota pinmonae jume cowunta Jesús. Judiomonae jume cowunta Jesús. Iru griegomonae jume cowuntano, yabuxi, iru pebiwi. Powaxi jume cowunta Jesús, barapowaxitha jiwi baru cui itura jineiba. ¹³Judiomonae, Tesalónica tomaramonae, jume tane xua Pablo cuiduba Nacom Pejume Diwesi Berea tomaratha. Daxota bapomonae Berea tomara be-iyiya. Baxotiya barapomonae namtsebiya wawai xua Pablo iru Silas pecasebixaetsibe. ¹⁴Ichitha pomonae pejume cowuntsiwixae Jesús, Pablo itorobatsi xua nainya peponaenexa imoxoyo mar mene beya poxonae cataunxuae Silas iru Timoteo ecabe Berea tomaratha. ¹⁵Pomonae Pablo

cueyabatsi barapomonaē Pablo punaxubathopatsi Atenas tomaratha. Barapomonaē equeicha caibe nawibiya Berea tomara beya. Barapomonaē Silas iru Timoteo tsipaebatsibe xua Pablo najume caruta xua bepa pinae Silas iru Timoteo nainya patopaenabe Atenas tomaratha.

Meje yabara poxonaē Pablo Atenas tomaratha popona

¹⁶Pablo ewata, Silas iru Timoteo ewatatsibe Atenas tomaratha. Barapoxonaē barapo tomaratha Pablo tane xua barapomonaē ainya ibo nacomun xeina. Daxota bichocono yabara najuntu coyene exaba.

¹⁷Daxota Pablo tsipaeba Nacom Pejume Diwesi judi monaetha judi monaē pia penacatutsi botha tatsi. Matautano baxotano tsipaeba pomonaē bequein jopa judi monaē naexanaeyo, barapomonaē Nacom wunaē jaintatsi. Barichi daxita matababi pomonaē Pablo caxibeiba pomonaē nacaetuteiba tomara pin panatha barapomonaethano Pablo cuidubeiba Nacom Pejume Diwesi. ¹⁸Barichi griegomonaē ichichipa xua pejume taewa pocotsiwa Pablo paeba. Ichamonaē griegomonaē itapeta jume cowanta pocotsiwa epicureomonaē cuiduba. Iru ichamonaē griegomonaē itapeta jume cowanta pocotsiwa estoicomonaē cuiduba. Barapomonaēbe Pablo tsipaeba. Bapoxonaē ichamonaē Pablo yabara jeichichi, jeye:

—¿Eta xua bapon naca barai tsipae, pon xua jopa juniya cueicueijeji tsaibiyo? jei.

Ichamonaē jeye:

—Mexeya maisa bapon cueicueijeji pia nacomun nexa, jei.

Barapomonaē baraxua paeba, tsipei Pablo Jesús pia pexeinya jume diwesi paeba ducuaaebiya, matautano poxoru paeba xua Jesús equeicha pinae asu. ¹⁹Nexata ichamonaē Pablo teicatsi pecaponaenexatsi atororotha ichaxota ba pentacaponaewi nacaetuteiba, poxonaē ichauxi muxu peexaneibi. Barapo pentacaponaewi matabuxuyo pewun Areópago, Pablo yainyabatsi, jeichichi:

—Pana netsipaebare bepayabara yaputaēin po diwesi xua cuidubiya paeba ducuaaebiyame. ²⁰Xuaunxuae pana tsipaebame, barapo diwesi jopa payaputaēinyo bayatha. Pata bequein yabara yaputaētsi xua po diwesi baxua yabara caunuta, jei barapomonaē.

²¹Atenas tomaramonaē iru pomonaē penanapaincha jinompaewi xua icha nacua werena peponaewi, pomonaē anoxuae jinompa xote, daxita barapomonaē u saya pepaēbeibi. Yawa saya u cou paebeiba poxonaē pena jume jume taiba, saya baxua paebeiba.

²²Nexata Pablo Areópago wun matabuxuyo peitabaratha tatsi asiya uncuataba. Pablo namchi, jeye:

“Paxam Atenas tomaramonaē pam. Bara paca cui yaputainchi xua painya nacomun wunaē pajaintame. ²³Poxonaē ponan ichaxota painya

nacomun wunae pajaintathopeibame tan ainya ibo nacom matabon. Matautano tan baxota, ichaxota nacom wunae pajaintame, xua cou ichaxota pocotsiwatha xua be pexaethopaewa xua ichaxota duwei patautathopame baxua cou panta tinadutame. Baxua panamchim couje: 'Barapo nacom xua pon jiwi jopa yaputaeyo', pajam. Xuaunxuae cou asiya pawun dutame pon, bapon, apara pepa Nacom. Xuaunxuae po diwesi yabara paca tsipaebatsi, barapon pejume diwesi apara.

²⁴"Barapon pon pepa Nacom, daxita barapo ira exana. Daxita carepaya jupaya exana. Barapon pon pia coya peewatsin barapo susato nacuano, yawa barapo itabocono. Po bon patsiacabeibame Nacom xua po botha jiwi wunae pejaintithopeibinexa Nacom, apara ba Nacom jopa poponaeyo barapocotsi botha. ²⁵Xua pocotsiwan jiwi taexana Nacom nexa, baraxua Nacom jopa nantawenoneibiyo. Barapo Nacom saya pia coutha daxita nacata exana. Peayapuswano, naca cata. Daxita barapo petusato tutu joibo naca cata. Baxuan daxita amanaya saya nacata exana. Daxita ichauxino muxuna exanano.

²⁶"Copiya meisa bapon Nacom compa exana pebin, bara caein. Barapo cae janatha daxita yanacua exana jiwi. Daxita wunae tsiwanaeya yaputaneno poxonae naexanaena daxita jiwi. Matautano yaputane xua eta po weiyobetha jinompaena. Matautano yaputane xua pia iranthe bexa naexanumenaponaena. ²⁷Icha pebin cuita cananta xeinaetsipa Nacom, bara Nacom cana exanaetsipa xua bapon bara Nacom pejume cowuntsiwa tsainchi. Nacom jopa tajū ecaeyo ichitha bara waxantha imoxoyo popona. ²⁸Nacom pepoponaexae daxota asu jinompatsi. Nacom naca exana, daxota beta nacuiyenabatsi, yawa daxota wacobexitha u waexanae. Ichaunxuae ichin xua paca tsipaebatsi barichi painyamona baxua paeba pomona diwesi petinaewi poxonae jei, 'Nacom apara pia jiwichi waxainchi', jei. ²⁹Waxainchi Nacom pia jiwichixaetsi, daxota jopa bewa nanta xeinaetsi xua Nacom po Nacom pepa Nacom, apara jupa po nacomun jiwi exana pecobetha. Barapo nacomun po nacomun xua jiwi cana exana xua oro nainton yawa xua plata nainton yawa xua ibowan, saya jiwi pia coyene cuirutha nanta xeina xua peexanaewa barapo nacomun. ³⁰Matha copiya bayatha Nacom saya beitatemaya tane jiwi abe pia peexanaewan tatsi, tsipei barapomona jopa yabara yaputaeyo pocotsiwa Nacom ichichipa. Ichitha matapainya anoxuae daxita jiwi Nacom cui itoroba xua petsita xeinaenexatsi icha juntu coyene, xua jopa equeicha peexanaenexa abe peexanae coyene. Saya u penanta xeinaenexa tsane pocotsiwa Nacom ichichipa. ³¹Nacom matabi wun duta xua po mataqueitha tsane Jesús caetucaetutetsina daxita jiwi pia peitabaratha. Barapo matabitha tsane Jesús xaniwaicha yabara paebina daxita jiwi xua penatsicuentiwa xua abe peexanaexae. Pomona xua abe exana itawetsinchi, pomona xua wunae exana jopa itawetsi tsainchi. Nacom itapeta, xua Jesús tsiitapetatsi

barapo penacuichiwa tsipei Jesús saya xaniwaicha pepaebin. Poxonae Nacom Jesús asu exanatsi petupaewitha, Nacom naca tsita itapeinya xeina xua apara Jesús tsiitapetatsi barapo penacuichiwa”, jei Pablo.

³²Poxonae barapomonae Pablo jume tainchi po coyene xua equeicha petupaewi pinae asu tsaibi tsane, ichamonae Pablo jume cui caponatsi nawita. Ichamonae namchi, jeye:

—Bexa paca jume tainchi equeicha xuaunxuae paebame, jeichichi Pablo.

³³Nexata Pablo cuenta ponataba barapomonae. ³⁴Ichitha ichamonae Pablo puna poinchi yawa bapomonae Jesús jume cowuntatsi. Ichun barapomonae jiwana pewun Dionisio. Bapon Dionisio Areópago wun matabuxho jiwana pin. Petsiriwa powa iru napona powa iru pejume cowuntsixae Jesús, bapowa pewun Dámaris. Ichamonae iru napona pomonae iruru Jesús pejume cowuntsiwichi.

Meje yabara poxonae Pablo Corinto tomaratha popona

18 ¹Pirapae equeicha Pablo Atenas tomara wewarapiya. Corinto tomara bewarapiya. ²Baraxota Pablo caxina judiomaepin, pon pewun Aquila. Bapon Ponto nacupin. Piowa tatsi pewun Priscila. Piseuribe mexuaetha Italia nacia wewaraparenabe, tsipei pon romanomonae itorobiya pia pepa peewatsinchi pon pewun Claudio, bapon judiomaepin daxita itorobatsi xua pewarapaewa tsane barapo Roma tomara weya. Daxota Corinto tomaratha patopabe. Pablo siwa pona, Aquila petsiriwano siwa poinchibe. ³Pablo naeca Aquila pia botha tsipei bapon pia penacuichiwiyo iru xeina icha Aquila piawabe ichi. Pia penacuichiwiyo xeina xua chivo boco bouton exana. Aquila piowabe nacuitabe, iru Pablo piawa nacuita. ⁴Daxita matabi, po matabintha pentaquei seicae matabintha Pablo poneiba judiomaepin pia penacaetutsi botha tatsi. Baxota Pablo jume daunweya cueicueijeji pomonaetha pepa judiomaetha iru pomonaetha jopa judiomaepin naexanaeyo. Pablo cueicueijeji barapomonaetha tsipei ichichipa xua barapomonae Jesús pejume cowuntsiwa tsainchi.

⁵Poxonae Silas iru Timoteo Macedonia nacia wepataparenabe, barapoxonae daxita matabintha Pablo cuidubeiba judiomaetha. Pablo paeba xua pinae pon Jesús jeichichi xua apara pinae bapon apara bara Mesías, pon xua pinae barapomonae pewunae ewatsixae. ⁶Barapomonae tamropata pitaba xua Pablo abe yabara paebatsi yawa tsumu jume baru paebatsi. Nexata Pablo pepatomeicha nama paparuwa nunutaba. Baxua exana poxoru barapomonae anthuetafiya jume tane. Pablo barai barapomonae, jeye:

—Bara apara painya coutha icha pana natsicuentame xua daxota poxonae paweraweracaename. Jopa tacouthinyo xua jopa paxeinaem

tsane peajuntucuiyapusuwa, tsipei bayatha yabara paca tsipaebatsi barapo peajumeyapusu diwesi. Tha anoxuae Nacom Pejume Diwesi caponaetsi pomonaetha pomonae jopa judiomonae naexanaeyo, jei Pablo.

⁷Barapoxonae Pablo judiomonae pia penacaetutsi bo tatsi wewarapiya. Pablo pona Justo pia bo beya tatsi. Bapon Justo, icha wun xeina, Ticio baraichi. Bapon wunae pejainteibin Nacom. Bapon yabo uncua ichaxota imoxoyo judiomonae pia penacaetutsi bo tatsi peuma werena. ⁸Iru Crispo, pon judiomonae pia penacaetutsi bo peyapucauncuaein, bapon piamonae matabuxuyo baru jume cowanta Jesús pon jiwi Pecanamataxeinaein. Barichi pinmonae pomonae Corinto tomaratha jinompa poxonae jume tane Nacom Pejume Diwesi, bapomonae iru jume cowanta Jesús. Pomonae pejume cowantsiwi barapomonae daxita bautisabatsi. ⁹Bapoxonae Pablo merawi camaituncua Nacom pon Pecanamataxeinaein jiwi. Pablo baraichichi, jeye: “Jopa junuwinde. Nacom Pejume Diwesi paeba ducuaenaebiyama. Jinxoba moyam. ¹⁰Tsipei apara, xan cabaru popoinchi, daxota ichamonae jopa itacupaetsi xua abe necaexanaewa. Barapo tomarathe tamonae, pinmonae apara inta jinompa”, jei Jesús. ¹¹Pablo baxota popona dieciocho po xometiyobe Corinto tomaratha. Baxota Pablo cuiduba ducuaenaebiya Nacom Pejume Diwesi.

¹²Iruu pebin popona pon pewun Galión. Bapon Galión Acaya nacuapiwi pia peyanacua ewatsinchi exanatsi. Barapoxonae judiomonae pomonae Acaya tomarapiwi nacaetuta Pablo yabara nacaetutatsi pecasebixaetsi xua pecaponaenexatsi Galión peitabaratha tatsi.

¹³Judiomonae namchi, Galión baraichi, jeye:

—Poxonae bapon Pablo paeba ducuaenaebeiba pinmonae baraxua jume jejei tsaibi. Pablo cuidubeiba jiwi, xua pinae jame bewa jiwi wunae jainteibi Nacom po coyene jopa jupaeyo Moisés pia peitorobi coyenewa tatsi, jei barapomonae.

¹⁴Pablo bara muxu pepaebi, iru Galión paebaxoyaru. Nexata barapon namchi judiomonae baraichi, jeye:

—U judiomonae pam. Painya xoba pana tsipaebame. Jame icha bapon caiba, icha jiton bexotsi, icha ichawiyoy exana xua abe, metha jame bapoxonae paca jume jejei tsipaetsi. Ichitha bapon jopa abe exanaeyo.

¹⁵Saya u payabara cueicueijam tsaibi barompaya painya cui xua painya amo jiwi pia cui coyeneya tatsi. Moya baxua paxam paexande pocotsiwa Pablo payabara paebame. Tsipei jopa bepacata naexanaetsi be pon jiwi peyabara paebin xua penatsicuentisiwa xua abe peexanaexae. Moya painya coutha pacui itawere, jei Galión.

¹⁶Bapoxonae Galión pesato benapuna torobabiya barapo judiomonae.

¹⁷Bara nexata daxita judiomonae Sóstenes waetabatsi pon judiomonae pia penacaetutsi bo tatsi peewatsin. Barapomonae Sóstenes butsi Galión

peitabaratha tatsi. Daichitha baxua Galión saya cui tane, jopa tsita ainya cuichi.

Meje yabara poxonae Pablo equeicha Antioquía tomara beya caibeya warapa. Baxotiya tamropata pitaba xua warapa acoibi po cuiyobetha xua pecueicueijeinexa Jesús pia pexeinya jume diwesi tatsi

¹⁸Pablo awiya came baxota popona ainya maticabin Corinto tomaratha. Bapoxonae nama copiya napeyaba pomonae pejume cowuntsiwixae Jesús. Siria nacua bewarapiya weratha, po naetha po nae pin nae. Aquilano piowabe naponabe. Barapoxonae juntucuru bara ponatabichiba copiya matha nanta catepateya sibaxuba Cencrea tomaratha xua penayabara tsita itapeinya xeinaenexa xua nayabara jume cui wetsina xua exanaena xua bayatha Nacomtha nayabara tsiwuna muxu duta. ¹⁹Bara Efeso tomaratha patarucupa. Baxota Pablo Aquila piseuribe xubetatsibe pia ponaetsi ichaxota judiomonae nacaetuta barompaya pia penacaetutsi botha. Baraxota Pablo baru cueicueije barapo judiomonae. ²⁰Efeso tomarapiwi bequein Pablo apusiwatsi xua abu peecaewa tsane. Ichitha Pablo juntucuru jopa beecaeyo baxota ainya maticabin. ²¹Nexata Pablo napeyaba barapomonae. Pablo namchi, jeye: “Tha nama Jerusalén tomara beequiyaetsi. Tha naewatequiyaetsi xua jiwi petsinacaetutsinexa pexaewa xua penabanaewa. Metha equeicha paca taeyoparenaeinchi icha Nacom metha newuna ichipaena”, jei Pablo.

—Bara warapataba Pablo. Efeso tomara wewarapiya jeratha po naetha po nae pin nae. ²²Poxonae Cesarea tomaratha patopa Jerusalén tomara be-iya, pia jacobichi pomonae Jesús pejume cowuntsiwichi. Bapoxonae equeicha Antioquía tomara bewarapiya. ²³Poxonae bara juntucuru yaainya merawin jopa baxotiya equeicha icha nacuabe bewarapiya. Galacia nacua bewarapiyano. Frigia nacua bewarapiyano. Baxota Jesús pejume diwesi cuiduba Pablo pomonaetha pomonae Jesús pejume cowuntsiwi. Pablo juntú coyene tsacaba xua barapomonae ajuntuyapusya pejume cowuntaponaewa tsane Jesús.

Meje yabara poxonae Apolos Nacom Pejume Diwesi cueicueije Efeso tomaratha

²⁴Caecin judiomonae jiwana pin Efeso tomaratha patopa. Bapon pewun Apolos. Bapon seicaya iru Alejandría tomarapin. Bapon Nacom Pejume Diwesi peyaputaein yawa beta cacueicueije barapo diwesi. ²⁵Apolos beta yabara cuidubatsi ichamonae xua Jesús, pon Pecanamataxeinaein jiwi, pia cui. Juntú coyene weiweinaya paeba. Xaniwaicha piamonae cuiduba Jesús yabara bequein saya yaputane xua po coyene pinae Juan pebautisabiwa jiwi xua icha juntú coyene pexeinaenexa Nacomtha. ²⁶Apolos judiomonae pia penacaetutsi botha tatsi bichocono juntú coyene

w̄naeya cueicueijeji Nacom Pejume Diwesi. Priscila, Aquila piowabe jume tanebe bapon. Wababe bapon, pia bo becayabe. Aquila, Priscila pia pebinbe yabara muxu tsidutabe icha diwesi xua Nacom pia pepa diwesi po diwesi xua jopa yaputaeyo. ²⁷Apolos ichichipa xua peponaewa Acaya nacua beya. Bapoxonae pomonae pejume cow̄ntsiwixae Jesús, Apolos canatsiwana tinaxotsi carta xua tatinatsi pomonae pejume cow̄ntsiwixae Jesús. Daxota barapomonae tatina xua Apolos pententa weiweinaya wabinexatsi. Poxonae Apolos patopa Acaya nacuatha, bapon yawena pomonaetha pomonae bayatha Nacom jume cow̄ntatsi pomonae Nacom peantobexae. ²⁸Apolos daxita jiwi peitabaratha jume amanayaba poxonae Jesús beta yabara paebatsi. Daxota barapomonae judiomonae jopa itac̄paetsi xua pejume notsiwatsi bapon po coyene xua poxonae bapon abe pepaebiwa. Poxonae Apolos yoroba Nacom Pejume Diwesi bapon tsita itapeinya xeina xua Jesús apara Mesías pon Nacom itorobica.

Meje yabara poxonae Pablo Efeso tomaratha popona

19 ¹Poxonae Apolos Corinto tomaratha eca, bapoxonae ir̄ Pablo seicaya ducuaenaebiya daxita tomaran j̄paya, po tomarantha ichaxota atororon. Efeso tomaratha patopa, baxota Pablo caxina ichamonae pomonae Cristo pejume cow̄ntsiwichi. ²Pablo yainyaba barapomonae, jeye:

—¿Bayatha Nacom pia Pejumope t̄nax̄ tatsi painya j̄nt̄ coyenetha pacata pata poxonae pajume cow̄ntame Jesús? jei.

Barapomonae Pablo jume notatsi, jeye:

—Jume, jopa payaputaeyino. ¿Eta pocotsiwara xua Nacom pia Pejumope t̄nax̄ tatsi? Bayatha jopa payabara jume taeinyo baxua, jei.

³Pablo yainyaba, jeye:

—¿Eta pabichim poxonae pajume cow̄ntame poxonae paca bautisaba? jei.

Pablo jume notatsi, jeye:

—Apara saya payabara jume cow̄ntan xua Juan cuiduba, po coyene xua Juan itorobatsi xua jiwi pebautisabiwatsi, jei.

⁴Pablo jume nota, jeye:

—Aja, Juan bautisaba pomonaetha pomonae abe pia peexanae cuiru coyenein nacui barapenta xua pomonae pejume cow̄ntsiwichi Nacom. Daxota metha Juan piamonaetha barai: ‘Pajume cow̄nde pon xua tsiwana patopan’, jei Juan piamonaetha. Xua Juan namchi: ‘Pon xua tsiwana patopan’, jei, bapon apara Jesús, pon ‘Mesías’ baraichi, jei Pablo.

⁵Poxonae baraxua Pablo jume taer̄cupatsi, caena barapomonae bautisabatsi Jesús pia pew̄ntha tatsi pon Pecanamataxeinaein jiwi.

⁶Poxonae Pablo barapomonae pecobetha mata jayaba, barapoxonae barapon Nacom pia Pejumope t̄nax̄ tatsi barapomonae tapatatsi

pejuntũ coyeneintha, yawa cueicueijei exanebatsi icha jumeintha xua ichamonae pia jume tatsi. Matautano barapoxonae barapomonae cueicueijei Nacom Pejume Diwesi pocotsiwa Nacom yaputane exana. ⁷Daxita bapomonae pomonae baxota ena doce pomonae matabũxũyobe pomonae xua Jesús pejume cowũtsixaetsi.

⁸Baxota Efeso tomaratha, Pablo judiomonae pia penacæututsi botha tatsi poneiba acoibi po xometiyobetha Nacom Pejume Diwesi pecueicueijeiwanexa. Bapon jopa junuwiyo poxonae cueicueijei. Matautano yabara tsipaeba po coyene Nacom waba jiji petanaexanaenexatsi piamonae tatsi pomonae itorobiya peewatsixae.

⁹Ichitha ichamonae aichaxaibi jume tane. Jopa juntucuru bejume cowũtsiyo. Saya barapomonae jiji peitũtha tatsi abe yabara paeba Jesús pia pena pecuidubiwa tatsi. Nexata barapomonae pia xainya weya tatsi Pablo napitaba. Saya meisa barũ pona pomonae Jesús pejume cowũtsiwichi po bo penacuidubi bo beya. Pebin pon pewũn Tirano barapo bo, bapon pia bo tatsi. Barapo botha Pablo daxita matakabi Nacom Pejume Diwesi cuidubeiba. ¹⁰Baraxota Pablo ainya weibe paeba ducunaebiya Nacom Pejume Diwesi. Daxita pomonae Asia nacuapiwi judiomonae irũ pomonae jopa judiomonae naexanaeyo barapomonae jume cowũnta Jesús pia pexeinya jume diwesi tatsi, pon Pecanamataxeinaein jiji. ¹¹Nacom Pablo yawenatsi xua pexeinya petsita itũtsi coyenewan exana Nacom pia peayapusũwatha tatsi.

¹²Ichamonae paparuwan yawa painyaweran capona Pablo beya xua barapo paparuwantha Pablo peperũ jayababinexatsi. Barapo paparuwan nata capona peatene jiwitha. Bapoxonae barapo paparuwantha nainya axaibi tsouniibi. Irũ pomonae cauri xeina barapo paparuwantha nacapanenebiya tsaibi. Barapomonae cauri wepu poneibatsi.

¹³Ichamonae judiomonae, pomonae saya pejinompaewi, barapomonae pia cui xeina xua jiji taitaweteibatsi cauri. Barapomonae ichichipa Jesús wũn wũn taibatsi poxonae itaweta cauri. Barapomonae caurimonae baraichi, jeye: “iBara Jesús pewũntha paca itawetatsi, pon Pecanamataxeinaein jiji, xua pon Pablo wũn yopita ducunaebiya!” jei barapomonae.

¹⁴Irũ barapoxonaerũ judiomonaepin pon pewũn Esceva, xeina siete poyobe tatsi pebiwi. Barichi barapo siete poyobe wũn wũn taibatsi Jesús, poxonae itaweta cauri. Esceva sacerdotemonae pia pentacaponaewi jiwana tatsi. ¹⁵Poxonae barapomonae paeba barapo wũntha, Jesús pewũntha tatsi, barapomonae jume notatsi cauri, jeye: “Bara tayaputaen Jesús, Pablono bara yaputanno. ¿Incane paxamda? ¿Jintam pamda?” jei bapon cauri.

¹⁶Bapoxonae barapo siete poyobe pexainya betanaxorenatsi pon cauri xeina. Barapomonae bũtsi. Matautano barapomonae jopa nacuiyenabiyo.

Barapo siete poyobe daxita tamasa jebompatsi yawa wan dubatsi. Bo bejumasa ducupiya. ¹⁷Pomonae Efeso tomaratha peenaewi, judiomonae, iru pomonae jopa judiomonae naexanaeyo, daxita bapomonae jume tane xua siete poyobe jumasa ducupa. Barapomonae junuwa bichocono. Daxota barapomonae Jesús pon Pecanamataxeinaein jiwi wunae jaintatsi.

¹⁸Pomonae Jesús jume cowuntatsi pinmonae barapomonae jiwana baxota pata. Barapomonae jiwi peitutha tatsi paeba xua bepa pinae bayatha abe exana poxonae mara coyeneya exana nawita. ¹⁹Pomonae Jesús pejume diwesi coyene nacuiduba, barapomonae carendena diboron po diboron xua mara yabara penacuidubiwan. Barapo diboron tauteba. Poxonae barapo diboron tauteba daxita nataeumena. Barapomonae yabara matoma ununa xua pinae barapo diboron matoma nawita, cincuenta mil po paratiximonaebe pinae nantomata. ²⁰Barapoxonae pin bicheito jume cowunta Jesús, pon Pecanamataxeinaein jiwi. Yawa barapomonae tsita itapeinya xeina dubenanaebiya xua bara Nacom aparta xeina peayapusu itorobi coyenewa.

²¹Poxonae baxua weta Pablo najuntu coyene weta xua pesiwa ponaewa tsane tomaran xua Macedonia nacuatha, yawa xua Acaya nacuathano xua bapoxonae Jerusalén tomara bepewarapiyaenexa. Nanta xeinano xua peponaewa tsane Roma tomara beya. ²²Ponbe Pablo yawenatsi, Timoteono Erastono, baponbe Pablo Macedonia nacua beitorobiyabe. Cataunxuae abu bapon Pablo Asia nacuatha eca.

Meje yabara poxonae jiwi namtsebiya wawai Efeso tomaratha Pablo pecasebixaetsi

²³Barapoxonae Efeso tomarapiwi anaya anaepanaeya najume cayayataxuba poxoru aichaxaibi xua pejume taewa xua Pablo yabara cueicueijeji Jesús pia pena pecuidubiwa tatsi. ²⁴Pon xua abe penajume cayayataxubin xua poxonae namtsebiya wawai bapon pewun Demetrio. Bapon pinmonae xeina pomonae petanacuichiwichi xua petaxanaewichi penainwixi. Barapomonae Demetrio taexanatsi tsiqui penain boxi xua Artemisa pia bo canaxobeba. Artemisa Efeso tomarapiwi pia nacomwa tatsi. Barapowa jopa be pepa nacomiyo. ²⁵Bapon Demetrio pia petanacuichiwichi waba. Pomonae iru Artemisa pia penain boxi peexanaewi wabatsino. Demetrio namchi daxita barapomonaetha, jeye: “Bara metha payaputaneme xua paratixi xeinatsi poxoru Artemisa pia penain boxi exanatsi wacaenaetsinexatsi, daxota xeinatsi paratixi. ²⁶Pon pataneme yawa pajume tanemeno, barapon Pablo. Bapon paeba ducuaanaebiya xua pinae pomonae icha nacom canautsiya exana aparta pinae xapain jopa daxua pepa nacomiyo. Pomonae Pablo cuidubeiba jume jejei tsaibichi ayei jiwi Efeso tomarathano, Asia nacuathanoru jume jejei pinmonae. ²⁷Baxua bichocono nacata abe, tsipei icha jiwi jopa

comocaetsipae barapo penain boxi xua waxainchi exaneibatsi bapoxonae jopa xeinaetsipaetsi paratixi. Jiwi namchi tsane: ‘Artemisa pia pin bo tatsi abe. Xapain jopa pepa Nacom pin pia boyo’, jei tsane. Cataunxuae anoxuae barapo jiwi Asia nacuapiwi iru daxita nacuanpiwi Artemisa wunae jainteibatsi. Ichitha icha jume cowuntsinchi Pablo, metha equeicha jopa bewunae jainteibichipaetsi Artemisa”, jei Demetrio.

²⁸Poxonae baxua Demetrio jume taerucupatsi, anaepanarucupa barapomonae. Yawa barapomonae namtsebiya wawai, jeye: “iMaisa Artemisa powa pata tanecanamataxeinaewa, barapowa bichocono pejuntu coyene xanepanaewa! iMaisa Efesimonae pan Artemisa wunae pajaintan!” jei barapomonae.

²⁹Barapoxonae daxita tomarapiwi jupaya anaepana. Gayo iru Aristarco, ponbe Macedonia nacupinbe, ponbe Pablo pepuna ponaexatsibe, baraponbe waetabatsibe. Po botha ichaxota jiwi nacaetuteiba pecueicueijeinexa tsaibi tsane bara bemaxu cayatsibe. ³⁰Bepa bequein Pablo najoniyaei barapo botha, petsipaebinexa tsane barapomonae, ichitha Jesús pejume cowuntsiwichi Pablo jopa pu copatichi. ³¹Barichi pomonae pentacaponaeawi jiwana Asia nacuatha, barapomonae Pablo pia jiwi tatsi cou tana cajume caitorobatsi xua bepa pinae Pablo jopa najoniyae tsane baxota. ³²Barapoxonae barapo penacaetutswatha, ichamonae icha caununaya wawai iru ichamonae icha caununaya wawai. Daxita barapomonae najume cayayataxubiya wawai. Ichamonae jopa yaputaeyo po coyene xua barapomonae yabara nacaetuta. ³³Barapo penacaetutsimonae anaepana. Pablo yabara anaepanatsi iru pijimonae tatsi tayabara anaepanatsi. Daxota judiomonae caemonae najiwana napuna totabiya pebin xua bapon peitabaratha peuncuaenexa barapo penacaetutswatha. Bapon pewun Alejandro. Bapon pecobetha jume matawenta tsipei ichichipa bequein yabara jume yawena judiomonae barompaya piamonae. ³⁴Poxonae barapomonae Alejandro yaitaerucupatsi xua Alejandro judiomonaepin, barapoxonae equeicha daxita namtsebiya wawai tsompae ainya horabe. Barapomonae namchi, jeye: “iMaisa pata tanecanamataxeinaewa Artemisa! iMaisa barapowa pejuntu coyene xanepanaewa! iMaisa efesimonae pan Artemisa wunae pajaintan!” jei barapomonae.

³⁵Nexata, pon xua tomara peewatsin, bapon uncua barapo penacaetutsi itabaratha. Bapon jume matawenta xua equeicha jopa penamtsebiya wawainexa tsane barapomonae. Bapoxonae bapon namchi, jeye: “Pomonae Efeso tomaramonae pam. Bara daxita nacumonaepiwi naca yaputane xua waxainchi notatsi Artemisa pin pia bo tatsi. Matautano yaputane xua waxainchi botatsi po iboto xua athawe jopeica. Barapo iboto apara bara Artemisa tsipei be Artemisa pia paw. ³⁶Jiton dapocotsin aibi pon xua nejume barai xua naeraban, daxota saya iru moya pande.

Painya xoba ichawa pananta xeiname poxonae jopa beta pananta xeinaem. ³⁷Ponbe, Gayo iru Aristarco, ponbe pacarendename, baponbe jopa abe paebiyobe. Baponbe jopa caibiyobe xua xoyo boca Artemisa pin pia botha tatsi. Matautano Artemisa nacomwa jopa cui aebiyobe. ³⁸Icha Demetrio iru petanacuichiwichi nanta xeina xua ichamonae Demetriobaru abe taexainchi moya jame barapomonae bewa ponaena po bo ichaxota ena pomonae jiwi peyabara paebiwi xua penatsicuentsiwa xua abe peexanaexae. Bapoxonae barapomonae itacupatsi xua petsipaebiwa pomonaetha pomonae tomara pentacaponaeawi po coyene xua ichamonae abe exana barapomonaetha. ³⁹Icha ichawa painya paebichi abu anoxuae jopa papaebinde. Po mataqueitha poxonae pentacaponaeawi ba nacaetuta pejume taenexa xua jiwi paeba bapoxonae jame papaebare. ⁴⁰Wanamtsebiya wawaijeixae anoxuae daxota romanomonae naca yabara anaepanaena tsipei nanta xeinaena xua waxainchi aichaxaibichi xua barapomonae naca itoroba. Jopa xeinaetsi po diwese xua yabara tsipaebinchi barapomonaetha pocotsiwa xua yabara namtsebiya wawaichi”, jei tomara peewatsin. ⁴¹Poxonae najume wetaba baxua, barapomonae pesato beitorobyatsi.

Meje yabara poxonae Pablo siwa pona Macedonia nacua, Grecia nacuano

20 ¹Bara najume wetarucupa daxita poxonae namtsebiya wawai tsompae. Bapoxonae Pablo waba pomonae Jesús pejume cowuntsiwichi pebaru nacaetutsinexa. Barapomonaetha Pablo yabara tsipaeba Jesús pejume diwesi xua barapomonae peajuntuyapusuya xanepanaya pejinompaenexa tsane Nacomtha. Bapoxonae Pablo barapomonae napeyaba. Macedonia nacua bewarapiya. ²Daxita barapo tomaran, Pablo siwa pona barapo Macedonia nacuatha, cuidubano pomonaetha pomonae Jesús pejume cowuntsiwichi, xua peajuntuyapusuya xanepanaya tajinompaenexa tsainchi Nacomtha. Poxonae nacui wetaba equeicha Grecia nacua bepatopiya. ³Baraxota Pablo acoibi po xometiyobe yapucaewa. Bara juntucuru Siria nacua beya warapa jeratha po nae pin naetha. Bapoxonae jume tane xua pinae judiomonae anaepana xua Pablo bexubapaebatsi. Daxota Pablo najuntu cui weta xua caibeya peponaewa tsane petaxutha Macedonia nacua beya. ⁴Pablo yanabatsi ichamonae. Iru ichun napona bapon pewun Sópater, pon Berea tomarapin, pon Pirro pexanto tatsi. Iru ichunbe naponabe baponbe pewunbe Aristarco iru Segundo, baponbe Tesalónica tomarapinbe. Iru ichun napona, bapon pewun Gayo, Derbe tomarapin. Iru ichun napona, bapon pewun Timoteo. Iru ichunbe naponabe, ponbe pewunbe Tíquico iru Trófimo, baraponbe Asia nacupinbe. ⁵Barapomonae daxita pana netsiwana nantacapona, Troas tomaratha cou baxota pana ewata. ⁶Ichitha Filipos tomara weya pawarapan jeratha, po naetha po nae pin

nae poxonae weta Pascua wɯn matacabin. Barapo Pascua matacabintha jiwi xane pan xua pocotsiwa jopa cotowiyo. Poxonae cinco po matacabibe caewa papatan Troas tomaratha, baxota barapomonaē pacaxiban. Baraxota paenan siete po matacabibe.

Meje yabara poxonaē Pablo Troas tomara siwa pona

⁷Pentaquei seicaē matacabitha, domingotha, pana nacaetutan, pata epanantarubi janacaenexa tsane pan. Pablo cuiduba pomonaē Jesús pejume cowantsiwichi, tsipei baya warapaena Pablo. Daxota poxonaē cueicueijeī beya yapapae. ⁸Po tutu athabeicha barapo tututheicha pana nacaeutan. Barapo tututha ainya coichan dubena. ⁹Pewowindu pewun Eutico, barapoyo bomuxu tututha ventanatha pemuxuburutha eca. Pablo bayiyo tsuxubi xua Nacom Pejume Diwesi cueicueijeī. Barapoxonaē Eutico nantacotiya maitecataba. Tajɯ wejopeica. Po tututha Pablo cueicueijeī tsuncuae xua ichaxota acoibi tututheicha barapo tutu wejopeica. Eutico petupaeyo pitatsi. ¹⁰Bara nexata Pablo dunatabica. Pablo Eutico caquita ecatsi pentabocototha. Pablo naisa cateita waetaba. Piamonaē barai Pablo, jeye:

—Jopa pajunuwinde, bara apara asɯ, jei.

¹¹Nexata Pablo equeicha caibe juinya. Pan epa janaxuba, yawa xane. Barapoxonaē equeicha Pablo matowa cueicueijeī Nacom Pejume Diwesi, beya yajume pentha tsina. Bapoxonaē weta. Bara cou nama matacabi wɯnaē tsuxubiba Pablo warapa. ¹²Barapo pewowin Eutico equeicha bara asɯ. Eutico piamonaē bo becayiyatsi. Daxita saya juntu coyene tsacabatsi xua jantema jinompa xua equeicha Eutico peasuxae.

Meje yabara poxonaē Pablo jeratha Troas tomara wewarapiya po naetha po nae pin nae xua Mileto tomara bewarapiya

¹³Paxan copiya jeratha paponan weratha Aso tomara beya tsipei yaitama Pablo pana itoroba xua bepa pinae weratha paponaein. Bapon yaitama bepa petaxutha ponaē. Bara xotiya, Aso tomaratha paichichipan payapitan Pablo. ¹⁴Poxonaē Pablo Aso tomaratha pacaxibarucupan, bapon equeicha pana yantaba. Mitilene tomara beya pawarapan. ¹⁵Mitilene tomara wewarapiyan. Bapoxonaē icha matacabitha imoxoyo Quó tunaetotha papatan icha muxunenetha. Baraxota caentacabitha paenan. Equeicha icha matacabitha Samos tunaetotha papatan. Barapoxonaē equeicha icha matacabitha Mileto tomaratha papatan. ¹⁶Baxua Pablo exana tsipei bapon nanta xaina xua jopa becaeyo ainya matacabin Asia nacuatha. Bapon aichaxaibi pona Efeso tomaratha. Ichichipa Jerusalén tomara beya bichoina peponaewa tsane, tsipei imoxoyo bara Pentecostés matacabi tsane, icha bara pecui jupaenexatsi.

Meje yabara poxonae Pablo tsipaeba penapatae jiwi Efeso tomaratha

¹⁷Pablo Mileto tomaratha eca. Pablo najume caitoroba ichamonae xua Efeso tomaramonae pitiri jiwi pewabinexatsi pomonae Jesús pejume cowuntsiwichi, xua Mileto tomaratha pepatsinexa. ¹⁸Poxonae Efeso tomarapiwi, penapatae jiwi pata baxota, Pablo barai, jeye: “Bara paxam payaputaneme xua wūnae poponan poxonae copiya patopan Asia nacuatha painya xantha. Awiya cataunxuae barichin wūnae poponan. ¹⁹Daxita matakabi Jesús pejume diwesi cueicueijan tsaibi. Jopa bichocono atsaca tsaibinyo. Jume wūnaeya natsipaeban saya. Poxonae Nacom pon jiwi Pecanamataxeinaein pejume diwesi cueicueijan, bichocono yaitawanaeya cueicueijan yawa nejume yancababeiba judiomonae yawa bepa nejutebeibi. ²⁰Paxam payaputaneme xua jopa nacui baraxubinyo xua tapaca tsipaebiwatsi Jesús pejume diwesi xua po coyene painya nepaca yawenaewa tsane. Paca cuidubatsi jiwi peitabaratha tatsi. Matautano painya boxithano paca cuidubatsi. ²¹Judiomonae jume daunweya cuiduban. Irurū pomonae jopa judiomonae naexanaeyo jume daunweya cuiduban xua barapomonae bewa icha jūntū coyene pexeinaenexa Nacomtha xuano pejume cowuntsinexatsi Jesús pon Wanacanamataxeinaein. ²²Nacom pia Pejumope tūnaxū tatsi neitoroba xua bewa ponaetsipanjei Jerusalén tomara beya. Ichitha jopa nayaputaeyinyo pocotsiwa xua baxotiya tsane ichamonae inta exanaena. ²³Jame anoxuae saya meisa yaputan xua Nacom pia Pejumope tūnaxū tatsi yabara netsipaeba xua daxita tomaran ichaxota pateibin. Nebarai, jeye: ‘Jiwi pecubi bontha cajebeibina, yawa caperaxa exaneibinano’, nejei Nacom pia Pejumope tūnaxū tatsi. ²⁴Juntucuru xua icha tūpan, baraxua jopa netsita ainya cuiyo. Bara jemba tsane icha saya poponaein. Icha tūpan, bara jemba tsane. Daxota neitacūpa xua jūntū coyene weiweinaya exanaein pocotsiwa Jesús neitoroba beya yacuiya tūpajopaein. Matautano daxota neitacūpa xua wetsin pocotsiwa Jesús neitoroba, pon Pecanamataxeinaeinchi jiwi, xua tapaca tsipaebiwatsi barapo pexeinya jume diwesi po coyene xua bichocono jiwi peantobewatsi Nacom. ²⁵“Bayatha paca tsipaebatsi Nacom Pejume Diwesi po diwesi yabara xua Nacom waba jiwi, petanaexanaenexa tsainchi pijimonae jiwana tatsi pomonae itorobiya peewatsixae. Anoxuae bara xaniwaicha yaputan paxam pomonae pamxaem xua paca tsipaebatsi barapo diwesi, equeicha jopa pana netaem tsane. ²⁶Daxota anoxuae paca tsipaebatsi icha jopa pajume cowuntsim, baraxua apara jopa tacoyiyo. Bara apara painya coyam tsipei bayatha bequein matowa paca tsipaebatsi pexeinya jume diwesi. ²⁷Daxita xua Nacom neitoroba barapo diwesi omeicha paca tsipaebatsi. Jopa icha diwesiyo copatsinyo. ²⁸Painya coutha xanepanaya pana najūntū coyene yabara nanta xeinare. Matautano xaniwaicha payapu eenare

pomonae Jesús pejume cowuntsiwichi. Paxam pitiri jiwi pam, baxua paexande tsipei Nacom pia Pejumoŋe tūnaxū tatsi paca itoroba painya neyapu cainompaenexa tsane Jesús pejume cowuntsiwi tatsi. Matautano baxua paexande tsipei barapomonae Nacom piamonae tatsi, tsipei pexanto tatsi tsitūpa xua barapomonae jopa peweraweracaewa tsane. ²⁹Yaputan poxonae warapaein tacoutha patsina ichamonae. Barapomonae Jesús pejume cowuntsiwichi abe exanaeinchi. Barapomonae Jesús pejume cowuntsiwichi dūcūpa exanetinchi icha neuthū ichi. ³⁰Barichi painya jiwi jiwanamonae ajumebeya cuidubina xua jopa xainyeyo. Barapomonae cuidubina penaerabi diwesi, xua pomonae Jesús pejume cowuntsiwichi pejume cowuntsinexa barapo penaerabi diwesi. ³¹Dota pam, xua peabe jume, painya nejume cowuntsiwa. Pana necui yabara nanta xeinare xua paca cuidubatsi acoibi po weiyobe. Paca cuidubatsi merawithano, mataqueithano. Matautano paca siwa wecoyeichi ichacuitha.

³²“Tamonae pam, Nacomtha pacata tsipaebatsi xua paca necayawenaewa tsane, xuano xua Nacom Pejume Diwesi painya necayawenaenexa po diwesi xua paca cuiduba xua pinae Nacom paca antobe. Barapo Nacom Pejume Diwesi peayapusūwa xeina xua ajūntūyapusūya paca cana exanapona. Matautano paca catsina daxita pocotsiwa bayatha pepa piamonaetha yabara tsiwūnae muxu duta xua catsiba paeba. ³³Jopa taichichi tsaibinyo xua ichūn pia paratixi tatsi matautano xua ichūn pia paparuwan tatsi. ³⁴Jame bara payaputaneme xua tacoutha natsiyabara nacuitan. Bara tawa comotan. Matautano xua pexaewa comotan, paparuwano. Matautano yawenan pomonae xua necueyaba. ³⁵Bayatha payaputaneme xua daunweya nacuitan. Baxua exanan tsipei ichichipan xua painya neyaputaewa tsane, xua painya neyawenaenexa pomonae peacopeibi jiwi. Jopa pajūntemainaende xua Jesús pon Pecanamataxeinaein jiwi namchi, xua jeye: ‘Ba jūntū coyene weiweina bichocono pon cata beyacaincha xua pon pecatsixaetsi’, jei Jesús”, jei Pablo.

³⁶Poxonae Pablo najume wetsiya paeba, poxonae xua pitiri jiwi tsipaebatsi, bapoxonae pentabocototha uncua. Pablo daxita baru tsipaeba Nacomtha. ³⁷Barapoxonae daxita matowa wecoyei. Yawano matowa naisa teicatsino Pablo poxonae tsutsubatsi, peantobexaetsi. ³⁸Barapomonae bichocono wecoyei tsipei Pablo bayatha namchi, jeye: “Equeicha jopa pana netaem tsane”, jei. Barapoxonae barapomonae Pablo jera bepuna tayathopiatsi po naetha po nae pin nae.

**Meje yabara poxonae Pablo weratha Jerusalén tomara
bewarapiya po naetha po nae pin nae**

21 ¹Poxonae Jesús pejume cowuntsiwichi pacuenta ponan, barapoxonae Cos tomara bepawarapiyan weratha. Barapoxonae

icha matcabitha Rodas tomara bepaiyan weratha. Barapoxonae equeicha icha matcabitha Pátara tomara bepawarapiyan weratha. ²Pátara tomaratha baxota equeicha icha nae panotarucspan. Fenicia tomara bepawarapiyan. ³Poxonae Chipre tunaeto patan pamatawacaicha toqueban. Barapo tunaeto pata tatsocona iya paxenta iyian. Siria nacua bepaiyan. Barapo nae Tiro tomaratha botouna, pejsinexa tsane xua capona. Tiro tomaratha paxubarucspan barapo nae. Baxota painompanno. ⁴Baraxota Tiro tomaratha pacaxibarucspan pomonae Jesús pejume cowantsiwichi. Barapomonae pia xantha tatsi pajinompan siete po merawiyobe. Barapomonae Pablo tsipaebatsi, jeichichi: “Jopa Jerusalén tomara beya ponaeinde”, jeichichi. Nacom pia Pejumope tñaxu tatsi barapomonae yabara tsiwanaya tsipaebatsi po coyene xua ichamonae Pablo cana exanaeinchi barapo tomaratha. ⁵Poxonae barapo siete merawiyobe payapucaewan paponarucspan. Daxita pomonae Jesús pejume cowantsiwichi, tomara weya pana neyu taeumenathopiya yabuxino pexuino. Taetabo mene itapa bepaiyan. Baraxota pentabocototha paumenan. Nacom patsipaeban. ⁶Pana napeyaban barapomonae, pana naisa teica pata taneantobexae. Bapoxonae equeicha jera panotarucspan, barapomonae equeicha pia boxi benawibiya.

⁷Bara papanenebiyan tsurucspan xua Tiro tomara weya paponan. Tolemaida tomara beya papanenebiyan. Baxota equeicha pajacoban pomonae Jesús pejume cowantsiwichi. Caentacabitha baxota pajinompan. ⁸Icha matcabitha, Pablono yawa xua pomonae pata tacueyabixae pan Cesarea tomaratha papatan. Barapo tomaratha Felipe pia bo tatsi bepaiyan. Bapon Nacom Pejume Diwesi pecueicueije ducuaebiyae jiton. Bapon jiwana pomonae siete poyobe pomonae peyawenae jiwi. Barapo siete poyobe, matha cain itapetatsi Jerusalén tomaratha xua Jesús pia peitorobi jiwi tatsi peyawenaenexatsi. Barapon pia xantha tatsi paenan. ⁹Felipe cuatro po pexantiyobe tatsi xeina. Barapowaxi cataunxuae jopa jitha enaeyo. Barapowaxi tsipaeba jiwi Nacom Pejume Diwesi xua Nacom yaputane exana. ¹⁰Baxota caentacabiyobe paenan Cesarea tomaratha. Barapoxonae Judea nacupin patopa, pon Nacom pia peitorobi pepaebin, pon pewun Agabo. ¹¹Agabo pana nesiwa pona. Pablo coreinya bocoto mara wejontatsi. Barapo coreinya bocototha petaxuno, pemaxuno Agabo pia coutha nacaecunta cubaxuba. Bapoxonae Agabo namchi, jeye:

—Bayatha Nacom pia Pejumope tñaxu tatsi netsipaeba po coyene xua judiomonae exanaena Jerusalén tomaratha. Bepa pinae barapomonae caiche tsane pon xua pia bocoto pexeinaein pocotsi bocote, ichaunxuae naichin, bara juta caichi tsane pinae. Matautano bepa pinae barapomonae cacaponae pomonaetha pomonae penanapaincha jinompaewi xua icha nacua werena peponaewi, jei Agabo.

¹²Poxonae baxua pajume tan, paxan iru pomonae Cesarea tomarapiwi Pablo pabaran, pajanje:

—Bara, jinxoba poname Jerusalén tomara beya, pajan.

¹³Ichitha Pablo pana jume nota, jeye:

—¿Eta xua metha pana siwa wecoyam? ¿Eta xua metha pana itanuwe forotame? Bara bayatha nacui yabara jume wetan tanecubinexa tsane, matautano tatupaenexa tsane Jerusalén tomaratha tajume cowuntsixae Jesús, pon jiwi Pecanamataxeinaein, jei Pablo.

¹⁴Bequein Pablo jume daunweya pabaran xua jopa ponae tsane ichitha Pablo dapo jumetha bepa ponaei. Matapainya saya jopa equeicha pata jumeyo. Matautano pajan:

—Basaya moya baxua exanaena be pocotsi coyeneya xua Nacom ichichipa, pajan.

¹⁵Bapoxonae poxonae pana jume wetan baxua, bara nama paxainxainyan. Bapoxonae Jerusalén tomara bepawarapiyan.

¹⁶Ichamonae Cesarea tomarapiwi, pomonae Jesús pejume cowuntsiwichi pana nepuna pona. Pana capona bo beya pata tajinompaenexa tsane, pebin pon pewun Mnasón, bapon pia bo beya tatsi. Bapon Mnasón Chipre tunaetopin. Bapon pinae caena bayatha jume cowunta Jesús.

Meje yabara poxonae Pablo, Santiago siwa poinchi

¹⁷Poxonae Jerusalén tomaratha papatan, baxota pomonae Jesús pejume cowuntsiwichi weiweinaya pana matenta waba bichocono.

¹⁸Icha matabitha Pablo pana nebaru pona. Pasiwa ponan Santiago. Baraxota iru daxita pitiri jiwi jinomparu. ¹⁹Barapomonae Pablo jacoba. Bapoxonae tsiwiyo bexa Pablo tsipaeba daxita po coyene xua Nacom exana pomonaetha pomonae jopa judiomonae naexanaeyo. Yawano paeba po coyene Pablo itorobatsi Nacom, xua petacaponae Nacom Pejume Diwesi tatsi. ²⁰Poxonae jume tane baxua xua Pablo paeba, barapomonae barapomonae Nacom wuna jaintatsi. Nexata Santiago Pablo baraichi, jeye:

—Taema, incane jume taema. Judiomonae pin bicheiton tsoponae, pomonae bayatha Jesús jume cowuntatsi. Daxita barapomonae namuxutainyaba xua pinae daxita jiwi nantawenona xua Moisés pia peitorobi coyene exanapona. ²¹Cayopita ichamonae xua pinae cuidubame judiomonae pomonae icha nacuantha pejinompaewi. Pinae cuidubame xua equeicha pinae barapomonae bewa jopa yabara jume cui exanae pocotsiwa bayatha Moisés itoroba. Matautano pinae cuidubame barapomonae xua pinae jopa bewa penawi thabi coyene exanae tsane xua pewi thabiwa pia pexui ichaxota nareixacaena xua ichaxota pebiwixae xeina. Matautano pinae cuidubame xua barapomonae bewa jopa exanae barapo peitorobi coyenewan xua pinae pocotsiwa

wamo jiwi bayatha exaneiba. ²²¿Eta xua waxainchi exanaeinchi? Tsipei judiomonae, pomonae pejume cowantsiwi Jesús, nacaetutsina xote barapo Jerusalén tomarathe, poxonae jume taena xua patopame. ²³Paxan xua paca itorobatsi baxua exande. Taema xote pata xantha cuatro poyobe poponabe pebiwi. Barapoyobe yabara nacui wūnae tsijume dutabe Nacomtha pocotsiwa xua exanapaeba. Anoxuae baxua barapomonae bewa exanae pocotsiwa bayatha exanapaeba. ²⁴Barapomonae matakayande paratixi nanacui baru nantomare sacerdotemonaepintha, xam nexano iru barapomonae nexano xua jopa painya nenajuntu coyene taxobinexa. Nanacui baru nantomare, barapoyobe penanta catepateya sibapentsinexa tsane. Icha baxua exanaename, daxita jiwi cacui yaputaena xua bayatha jopa exanaem xua ichamonae abe cayabara paeba. Yawa daxita jiwi cacui yaputaena xua xam xaniwaichiya exaname pocotsiwa Moisés itoroba. ²⁵Paxan pata tinan carta pomonae Jesús pejume cowantsiwichi, pomonae jopa judiomonae naexanaeyo. Pata yabara tinan baxua xua pananta xeinan xua barapomonae beexanaetsipa. Pajan barapo cartatha: ‘Painya xoba duwei pawí xaneme po duwein jiwi tsiseba ibo nacom. Matautano painya xoba paxaneme po duwein pon saya pipato tūpuncua, xuano painya xoba pajana xaneme. Painya xoba pasiwa xeiname yabuxi xua jopa painya seurixi’, pajan, jei Santiago.

Meje yabara poxonae soldadomonae Pablo maxu waetabatsi judiomonae pin pia botha tatsi, bapoxonae jiwi pecubi bo beya caponatsi

²⁶Nexata Pablo baru poinya barapo cuatro poyobe. Icha matakabi Pablo iru barapo cuatro poyobe exana po coyene xua jopa penajuntu coyene taxobiwa Nacomtha. Bapoxonae Pablo iru barapo cuatro poyobe Nacom pin pia botha tatsi jojoniya. Pablo namchi, jeye: “Equeicha papatsinan siete po matakabibe poxonae pawetsin po coyene xua daxota jopa pata najuntu coyene taxobiwa Nacomtha. Pacaponaein duwein sacerdotemonaepin pebexubinexa tsane xua pata catsinexa Nacom”, jei Pablo.

²⁷Poxonae barapo siete matakabiyobe imoxoyo yapucaewinaba, bapoxonae Pablo judiomonae Nacom pin pia botha tainchi. Pomonae Pablo tainchi, barapomonae judiomonae pomonae Asia nacia weya pona. Pomonae Pablo tainchi, barapomonae exana xua pin bicheito namtsebiya wawai xua Pablo pecasebixaetsi. Bapoxonae Pablo waetabatsi. ²⁸Jume daunweya wawai, jeye: “iPajume taema, paxam pomonae Israel nacuapiwi pamxaem! iPana yawende! Barapon cuiduba ducuaenaebiya daxita jiwi. Abeya naca yabara cui cueicueije. Matautano abeya yabara cueicueije Moisés pia peitorobi coyenewan tatsi. Matautano barapo Nacom pin pia bo abeya yabara cueicueije barapon. Matautano bapon griegomonae matakapoinchi barapo Nacom pin pia bo berena. Poxonae

Pablo matacapona griegomona, Nacom pin pia botha tatsi atutube exana”, jei barapomona.

²⁹Baxua paeba, tsipei poxoru bayatha barapomona Pablo tainchi Jerusalén tomaratha. Baxota Pablo baru pona Efeso tomarapin, pon pewun Trófimo. Daxota barapomona catsawa nanta xeina xua metha bayatha Pablo Nacom pin pia botha baru pona Trófimo. Daumetha Trófimo baxota jopa naponaeoyo.

³⁰Daxita tomarapiwi jupaya equeicha jume daunweya wawai. Daxita cuinaerendena, barapomona Pablo yoroba teicatsi. Nacom pin pia bo wemaxu capoinyatsi. Barapoxona barapomona bichocono yaboupa cateitabanota Nacom pin pia bo. ³¹Barapomona, pomona peanaepanaewi muxu Pablo pebexubichi. Bara nexata romanomona soldadomona pia pepa pentacaponaein tatsi jume tane xua daxita Jerusalén tomaramona najume cayayataxuba. ³²Nexata soldadomona pia pepa pentacaponaein tatsi, bapon pia soldadomona copiya piamona caeactuteta. Bapoxona barapo soldadomona pin bicheito becuinaeyiya ichaxota Pablo muxu pebexubichi. Poxona barapo soldadomona taerucupatsi barapo bicheito xainya umenarucupa. Barapoxona barapomona equeicha jopa Pablo butsi. ³³Nexata soldadomona pia pepa pentacaponaein tatsi Pablo imoxoyo caquita uncuatabatsi. Bapoxona Pablo maxu waetabatsi. Bapon soldadomona pia pepa pentacaponaein tatsi piamona itoroba xua ainya naintothabe pemaxu cubaxubinexatsi Pablo. Bapoxona bapon soldadomona pia pepa pentacaponaein tatsi yainyaba pin bicheitha, jeye: “¿Jintam baraponda? ¿Eta xua metha bapon exana?” jei. ³⁴Ichitha barapomona ichawan caununaya wawai. Ichamona ichawa wawai. Daxota bapon soldadomona pia pentacaponaein tatsi jopa xapain jume taeyo. Bapoxona bapon soldadomona pia pentacaponaein tatsi Pablo itorobatsi soldadomona pia bo beya tatsi. ³⁵Poxona patopa soldadomona pia bo beya, penonobabeiyawatha xua nonababeibiya soldadomona Pablo yoichiya capoinchi bara beya. Pin bicheito bichocono anaepana daxota Pablo yoichiya capoinchi. ³⁶Barapo pin bicheito soldadomona cayabara wawaya punaenapoinchi, jeye: “¡Maisa pabexore bapon!” jei barapomona.

Meje yabara poxona Pablo paeba barapomona peitabaratha

³⁷Poxona juntucuru Pablo soldadomona pia bo beya capoinchi, Pablo barai soldadomona pia pentacaponaeintha tatsi, jeye:

—¿Metha ichauyo catsipaebichipatsi? jei Pablo.

Poxona baxua jume taeba, soldadomona pia pentacaponaein tatsi yainyaba, jeye:

—¿Xam necueicueijeinda griego jumera? ³⁸¿Xam barapo jitomda egipcio nacuapimda, pon nacaetuteiba exaneiba pijimona xua ichamona

metha tamonaē inta abe exaname?’ jei. ⁸Nexata yainyaban: ‘Pon jiwi Necanamataxeinaem, ¿jintamũmda?’ jan. Nejume epa pita, jeye: ‘Apara xan Jesús, Nazaret tomarapin ponxaein tamonaē inta abe exaname’, nejei. ⁹Pomonaē nepuna pona irũ coicha taneno. Bichocono bapomonaē junuwa. Saya meisa coicha tane, saya jopa jume taeyo po jume xua nebaraichica. ¹⁰Nexata yainyaban: ‘Pon jiwi Necanamataxeinaem, ¿eta pocotsiwa metha exanocuaein?’ jan. Bapon nebarai, jeye: ‘Nontaponde Damasco tomara be-iyande barapo tomaratha, ichũn yabara catsipaebina pocotsiwa xua bewa exanaename’, nejei. ¹¹Barapo coicha bichocono neitata naquitaba exana. Pomonaē nepuna pona Damasco tomara benemaxũ cayaia.

¹²“Barapo tomaratha, Damasco tomaratha, cou pebin popona, bapon pewũn Ananías. Bapon daxita yabara jume cuiya exaneiba Moisés pia peitorobi coyene tatsi. Barapo judiomonaē, Damasco tomaratha, barapomonaē Ananías xanepanaya yabara paebeibatsi. ¹³Ananías nesiwa pona. Bapon nebarai: ‘Saulo, tamonaē jítom, equeicha caewa nepu necotsinde’, jei. Bara caena barapoxonaē equeicha caewa necotaxuban. Bapon bapoxonaē taenotan. ¹⁴Ananías nebarai, jeye: ‘Pata amo jiwi pia Nacom tatsi bayatha itapeta cawaba xua neyaputaenexa tsane xua Nacom caitoroba. Caitapeta xua netaenexa pon yatsicaewa pejũntũ coyene xanepanaein, mataũtano nejume taenexa pocotsiwa catsipaeba. ¹⁵Aunxuae Jesús yabara cueicueijam tsane daxita nacuan jũpayantha. Yabara paebiname daxita xua taneme xuano xua jume tanemeno. ¹⁶Anoxuae, ¿eta xua metha came ecame? Nontaponde. Barabũ ichũn cabautisabina Jesucristo pewũntha, pon jiwi Pecanamataxeinaein, necayabara jũtemainaenexa abe jinya neexanaē cuiru coyenein’, nejei Ananías”, jei Pablo.

Meje yabara poxonaē Pablo nayabara paeba xua peitorobiwatsi ichaxota pomonaetha pomonaē jopa judiomonaē naexanaeyo

¹⁷Pablo cataunxuae cueicueijei, jeye: “Poxonaē caibe nawiyan Jerusalén tomara beya, Nacom pin pia botha tatsi ponan. Barapo botha Nacom tsipaeban. Bapoxonaē camaitan xua netsita naitaũta. ¹⁸Jesús necotan, pon jiwi Pecanamataxeinaein. Bapon nebarai: ‘Antha yacuinaya pontabare Jerusalén tomara weya, tsipei barapomonaē jopa xapain cajume cowũntsi tsane xua tana neyabara paebiwam’, jei Jesús. ¹⁹Nexata jume epa pitan: ‘Pon jiwi Necanamataxeinaem, barapomonaē bayatha necui yaputane xua poneiban daxitan judiomonaē pia penacætutsi bontha tatsi. Bayatha jiwi pecũbi botha caponeiban, pomonaē necajume cowũntsiwi. Mataũtano bichocono beibanno. ²⁰Poxonaē Esteban bichocono jana othopeica xan saya cui necotuncuan. Bapon Esteban pon cajume cowũnta bayatha. Bapon jinya diwesi pecanantsipaebin. Poxonaē Esteban bexotsi, saya

cui matu taeuncuan. Yabara jume baru cui jejan poxonae barapomonae Esteban bexubapaebatsi. Barapomonae pipaparuwan tajeban', jan Jesustha. ²¹Ichitha bapon pon jivi Pecanamataxeinaein nebarai: 'Anthaponde. Aunxuae taju caitorobinchi barapomonae beya, pomonaetha pomonae jopa judiomonae naexanaeyo beya', nejei", jei Pablo.

Meje yabara poxonae soldadomonae pia pentacaponaein tatsi Pablo waetabatsi

²²Pablo cataunxuae paebuncua barapo penonobabeibiyathopaewatha soldadomonae pia botha. Poxonae Pablo jume taerucupatsi xua bepa pinae ponaena pomonaetha pomonae jopa judiomonae naexanaeyo beya, bapoxonae barapo bicheito namtsebiya wawai, jeye: "iMaisa bapon pabexore bara! iDapocotsin jopa bewa poponae!" jei. ²³Awiya came barapomonae wawai tsompae. Yawa pia paparuwan anaya nannababa. Yawa taetowan anaya athabe bebeicha. ²⁴Romanomonae soldadomonae pia pepa pentacaponaein tatsi, bapon pia soldadomonae itoroba xua Pablo pecaponaenexatsi soldadomonae pia bo beya tatsi xua jivi pecubi bo. Baxota Pablo capoinchi pecuainchinexa tsainchi xua daxota Pablo peyabara paebiwa tsane baxua xua Pablo peyabara namtsebiya wawaichiwatsi judiomonae. ²⁵Poxonae bara juntucuru Pablo maxu cutanotatsi xuano juntucuru muxu pebetsino, Pablo barai soldadomonae pia pentacaponaein tatsi, jeye:

—Jopa be pana necuainchipaem tsipei apara xan romanomonaepin. Matautano baxua jopa pana necanaichipaem icha jopa neyabara paebiyo pon jivi peyabara paebin penatsicuentsiwa xua abe peexanaexae, jei Pablo.

²⁶Poxonae baxua jume tane, soldadomonae pia pentacaponaein tatsi, bapon pona pia pepa pentacaponaein tatsi beya. Bapon namchi pia pepa pentacaponaeintha, jeye:

—Dota xua xam cana exanaename bapontha. Apra cou deta Pablo iru romanomonaepin, jei.

²⁷Nexata soldadomonae pia pepa pentacaponaein tatsi, bapon Pablo imoxoyo caquita uncuatabatsi. Bapon Pablo yainyabatsi, jeichichi:

—¿Bara yatsicaya xainyei bara xam romanomonaepim? jeichichi Pablo.

Pablo jume nota, jeye:

—Aa, bara xan tsocuaein, jei Pablo.

²⁸Soldadomonae pia pepa pentacaponaein tatsi Pablo jume notatsi, jeichichi:

—Xan iru barichin romanomonaepin. Nacui yabara matomatan bichocono pin paratixi matoma xua romanomonaepin tana naexanaewa tsane, jei.

Pablo namchi, jeye:

—Apara seicaya nama xan caena bayatha pexuyothan yacuiya naexanan romanomonaepin, jei.

²⁹Poxonae Pablo baxua paeba, bapoxonae pomonae Pablo muxu pecuainchichi Pablo pexeinya wetanatsixibarucupiyatsi. Iruru bara wenatsixitabiya soldadomonaepia pepa pentacaponaein tatsi tsipei bapon yaputane xua Pablo apara romanomonaepin. Daxota junuwa xua Pablo pemaxu cubixaetsi.

Meje yabara poxonae Pablo pentacaitorobi bicheitomonaepitabaratha uncua pomonae judiomonaepia

³⁰Icha matacabitha soldadomonaepia pepa pentacaponaein tatsi bepa yaputaei, bepa jeyei: “¿Eta xua metha Pablo yabara anaepanatsi judiomonaepia?” bepa jeyei. Daxota bapon, Pablo taxuenaxotsi xua maxu cutatsi. Nexata bapon itoroba xua sacerdotemonaepia pentacaponaei tatsi iru pentacaitorobi bicheito nacaetsina. Pablo bara bebaru iyatsi. Baraxota cuaranotatsi barapomonaepitabaratha tatsi.

23 ¹Pablo pentacaitorobi bicheito beya bichocono naita cui dutsiya necoya. Pablo barapomonaepia beya namchi, jeye:

—Tamonae, caena bayatha beya anoxuae juntu coyene xanepanaya poponan Nacom peitutha tatsi, jei Pablo.

²Nexata sacerdotemonaepia pepa pentacaponaein tatsi, Ananías, bapon itoroba xua Pablo pecoibo cuainchinexatsi pomonae Pablo imoxoyo caquita peumenaexaetsi. ³Ichitha Pablo jume nota, Ananías jume notatsi, jeye:

—Xam ponxaem itara mexeya xanepanaya nepaebin ichitha jiwi nemuxuitorobin, Nacom cacuainchina. Xam ecame xote jinya tana neyabara paebinexam tana natsicuentisiwa xua abe taexanaexae icha be pocotsi coyeneya Moisés pia peitorobi coyenetha baxua yabara paeba. Ichitha xam jopa xapain exanaem poxonae ichamonaepia itorobame xua tana necoibo cuainchinexa poxonae Moisés pia peitorobi coyenewatha jopa baxua itorobiyo, jei Pablo.

⁴Pomonae Pablo imoxoyo caquita umeinchi, jeichichi:

—Apara sacerdote pia pepa pentacaponaein tatsi abe tsipaebame pon Nacom tanacuitatsi, jei barapomonaepia.

⁵Pablo jume nota, jeye:

—Tamonae, jopa yaputaeinyo xua pon tsipaeban apara sacerdotemonaepia pepa pentacaponaein tatsi. Icha yaputaetsipan, jopa paebinchipae. Nacom Pejume Diwesitha namchi, jeye: ‘Jopa bewa painya pentacaponaei jiwana abe pajainchim pomonae xua painya tomaratha’, jei Nacom Pejume Diwesitha, jei Pablo.

⁶Nexata Pablo cui yabara nanta xeina barapomonaetha tsipei ainya bicheitobe, ichamonaepia saduceomonaeru, ichamonaepia fariseomonaeru. Daxota bapon Pablo jume daunweya wawai barapomonaetha, jeye:

—Tamonae, bara xan apara fariseomonaepin, yawa fariseomonaepin pexanton. Tsipei jume cowantan xua jiwi petupaewi equeicha asu tsaiibi tsane daxota pana necaponame painya tana neyabara paebinxam xua tana natsicuentsiwa xua abe taexanaexae, jei Pablo.

⁷Poxonae Pablo baxua paeba saduceomonaepin iru fariseomonaepin najume matsontsonobabe. Barapo bicheito ainya bicheitobe naexanabe, tsipei barapo bicheitobe seicaya barompaya nabaru nanta xeina.

⁸Saduceomonaepin paeba xua pinae petupaewi jopa equeicha asu tsaiibi tsane. Matautano barapomonaepin paeba xua pinae matatsunpiwi jopa jinompayo, matautano pinae dowatsi dapomonaepin pinae ajibi. Ichitha meisa fariseomonaepin jume cowanta daxita barapo diwesin, xua pinae pewerapeibiwi equeicha asu tsaiibi tsane, matautano xua pinae dowatsi jinompa, xuano xua pinae matatsunpiwi bara jinompa. Daxita barapo diwesin fariseomonaepin jume cowanta. Ichitha nama saduceomonaepin jopa daichiyo. ⁹Daxita barapo bicheitobe namtsebiya wawai. Fariseomonaepin jiwana ichamonaepin nonobapona. Barapomonaepin yaputane nawita Moisés pia peitorobi coyene tatsi. Barapomonaepin namchi, jeye:

—Bapon Pablo jopa abe exanaeyoba, metha dowatsi bapon tsipaebatsi, ichacuitha metha matatsunpin bapon tsipaebatsi, jei barapomonaepin.

¹⁰Barapomonaepin daxita najume matsontsonobiya biatane. Bapon romanomonaepin soldadomonaepin pia pepa pentacaponaein tatsi, bapon bichocono junuwa tsipei Pablo tsana peru xunaeinchi. Daxota bapon romanomonaepin soldadomonaepin pia pepa pentacaponaein tatsi itoroba pia soldadomonaepin xua Pablo equeicha caponaeinchi soldadomonaepin pia bo beya tatsi.

¹¹Ichha mataqueitha merawi pon Pecanamataxeinaepin jiwi, Pablo imoxoyo caquita uncuatsi xua tsita naitautatsi. Bapon namchi, Pablo baraichi, jeye: “Pablo, najuntu coyene tsacatabare. Ichha ichim xua Jerusalén tomaratha neyabara paebame barichinde equeicha Roma tomaratha neyabara paebare”, jei Jesús.

**Meje yabara poxonae judiomonaepin nanta xeina
xua Pablo pebexubiwa tsainchi**

¹²Ichha mataqueitha, ichamonaepin judiomonaepin peburaya nanta jupaya nanta xeina xua Pablo pebexubiwa tsainchi. Barapomonaepin nayabara tsiwunaepin muxu duta Nacomtha xua bepa pinae jopa nabanaepin tsane, xuano jopa apae tsaneno xua beya pinae yajainbonaya othopaena poxonae Pablo bexubinchi. ¹³Barapomonaepin pomonaepin Pablo bexubapaebatsi xuano xua yabara nainbotapaebatsi bichocono pinmonaepin beyacaincha xua pocotsi cuarenta po pebiwimonaeyobe. ¹⁴Barapomonaepin pona sacerdote pia pentacaponaein tatsi beya, yawa judiomonaepin pia pitiri jiwi tatsi beya. Barapo pebiwimonaeyobe barai barapomonaepin, jeye:

—Bayatha pana nayabara tsiwūnae muxu duban Nacomtha xua jopa pata nabanaewa tsane beya tsane poxonae cataunxuae jopa pabexubinyo tsane Pablo. ¹⁵Paxam iru pomonaē pentacaitorobi bicheito, romanomonae soldadomonae pia pepa pentacaponaein tatsi patsipaebare xua bapon pia soldadomonae peitorobinexa xua Pablo pecuaranotsinexa tsainchi painya itabaratha baya tsane. Romanomonae soldadomonae pia pepa pentacaponaein tatsi pamuxuitorobare. Naemata bapon pabarande: ‘Awiya peyainyabiwa paxeinan pata tha yainyabichi Pablo’, pajande. Paxan pata tha nama namtotha ewatumenae. Pata tha bexuichi, poxonaē barapomonae Pablo caponaeinchi, jei barapomonae.

¹⁶Pablo perobi tatsi jume tane xua barapo cuarenta po pebiwimonaeyobe namtotha nantsiyatsiya bobenapaeba pewaetabinexa tsainchi Pablo. Daxota Pablo perobi tatsi pona soldadomonae pia bo tatsi beya. Baxota Pablo perobi tsipaebatsi xua barapomonae Pablo bepa bexubichei. ¹⁷Nexata Pablo waba pon xua romanomonae soldadomonaepin pia pentacaponaeiwi jiwana. Pablo namchi, jeye:

—Poye pewowin wūto caponde romanomonae soldadomonae pia pepa pentacaponaein tatsi beya, tsipei bapoyo diwesiyo xeina xua petsipaebiwa tsane, jei Pablo.

¹⁸Romanomonae soldadomonae pia pentacaponaein tatsi Pablo perobi tatsi capoinchi xua romanomonae soldadomonae pia pepa pentacaponaein tatsi beya. Bapon namchi, jeye:

—Pablo soldadomonae pia botha peccaēin, bapon neitoroba xua pinae bepa caponaeinjei poye. Tsipei pinae xeina diwesiyo xua necatsipaebinexa, jei bapon soldadomonae pia pentacaponaein tatsi. ¹⁹Pablo perobi tatsi cobe pitatsi romanomonae soldadomonae pia pepa pentacaponaein tatsi. Barū natsixitabatsi aisowa beya. Bapoyo baraichichi, jeichichi:

—¿Jinya eta xua netsipaebichi? jeichichi.

²⁰Nexata pewowin wūto jume nota romanomonae soldadomonae pia pepa pentacaponaeintha, jeye:

—Judiomonaē peburūya nanta xeina xua bepa cawūcaei xua Pablo baya necaponaenexa pentacaitorobi bicheitotha. Bepa camuxuitorobei. Bepa jeyei: ‘Panantawenonan pata tha Pablo yainyabichi ichawiyo’, bepa jeyei barapomonae. ²¹Ichitha jopa jume cowūntsinde, barapomonae namtotha nantsiyatsiya bobenapaeba pewaetabinexa tsainchi taxuyo. Barapo cuarenta po pebiwimonaeyobe natsiwūnae yabara muxu duba Nacomtha xua bepa pinae jopa nabanae tsane yawa jopa apae tsane beya pinae poxonaē tsane poxonaē Pablo bexubinchi. Anoxuae barapomonae cajume cui ewata xua jam tsane: ‘Baya tsane Pablo pentacaitorobi bicheitotha itorobinan’, jam tsane, jei Pablo perobi tatsi.

²²Nexata romanomonae soldadomonae pia pepa pentacaponaein tatsi barapoyo napeyabatsi. Pewowin wūto ponataba. Pewowin wūto baraichi, jeye:

—Ichuntha jopa tsipaebinde xuaunxuae po diwesiyo netsipaebame, jei soldadomonae pia pepa pentacaponaein tatsi.

Meje yabara poxonae soldadomonae pia pepa pentacaponaein tatsi Pablo itorobatsi Félix beya pon Judea nacuamonae pia peyanacua ewatsinchi

²³Romanomonae soldadomonae pia pepa pentacaponaein tatsi waba ainya pentacaponaeinbe. Bapon baraponbetha itoroba. Barai: “Soldadomonae pacui wunaerebe doscientos po soldado matabuxube pomonae xua petaxutha ponaena, iru setenta po soldado matabuxube pomonae xua cawayutha ponaena, iru doscientos po soldado matabuxube pomonae dejonan cajjincaena. Barapo bicheito daxita peponaenexa Cesarea tomara beya merawitha poxonae a las nueve tsuxubi.

²⁴Matautano pacui wunaerebe cawayu ayunbe xua Pablo peequeicaenexa tsane. Matautano paitorobarebe xua Pablo beta pecaponaenexatsi, xua asuno Félix beya”, jei. ²⁵Bapon pia soldadomonae caitoroba carta. Barapo cartatha namchi, jeye:

²⁶“Xan Claudio Lisias. Félix, ponxaem tacabarũ cui itura jinaeinchi, cajacobatsi. ²⁷Pon anoxuae cata itorobatsi nexainya beya barapo pebin waetabatsi, judiomonae waetaba. Muxu pebexuichi. Poxonae jume tan xua bapon romanomonaepin najainta daxota nainya soldadomonae barũ ponan bapoxonae bapon capanepan. ²⁸Tsipei tha yaputaetsi xua barapomonae Pablo yabara paebatsi, daxota Pablo cuaranotan judiomonae pia pentacaitorobi bicheitho tatsi. ²⁹Jume tan xua barapomonae Pablo yabara paebatsi xua pinae bapon jopa exanaeyo icha be pocotsiwa barapomonae pia peitorobi coyenewan tatsi paeba. Ichitha barapomonae jopa xeinaeyo po coyene xua daxota Pablo pebexubinexatsi, xuano xua daxota jiwi pecubi botha peetsinexatsi. ³⁰Ichitha bapoxonae jume tan xua judiomonae namuxuweta pebexubinexa tsainchi Pablo. Daxota Pablo nexainya beya itoroban. Tsipaeban judiomonae pia pentacaitorobi bicheito tatsi. Janje: ‘Icha awiya Pablo pacui itawetsiname xua abe bapon exana — cabaraichi— bapon pia xainya beya paponare. Papaebare Félixtha baxua, pocotsiwa Pablo exana’, jan. Baja, Claudio”, jei barapo cartatha.

³¹Barapo soldadomonae exana pocotsiwa xua bayatha itoroba pon romanomonae soldadomonae pia pepa pentacaponaein tatsi itoroba pon pewun Claudio. Barapo soldadomonae barapo merawitha Pablo capoinchi Antípatris tomara beya. ³²Icha mataqueitha barapomonae soldadomonae pomonae petaxutha pona, caibe nawibiya ichaxota tauncuatsi soldadomonae pia bo beya. Pomonae cawayutha pona awiya Pablo barũ poinchi. ³³Soldadomonae Pablo capoinchi Cesarea tomara beya. Barapomonae soldadomonae Félix catatsi barapo carta. Pablono baxota punaxubothopatsi. ³⁴Félix matha yoroba carta. Bapoxonae Pablo yainyabatsi, jeichichi:

—Pablo, ¿eta po nacua jitomda? jei.

Pablo jume nota, jeye:

—Bara Cilicia nacua piyon, jei.

³⁵Félix namchi, jeye:

—Poxonae judiomonae patsina, pomonae xua abe cayabara paeba, bapoxonae cajume taechinchi xua tana netsipaebiwan tsane, jei Félix.

Bapoxonae Félix itoroba soldadomonae xua Pablo yapucaenaechinchi ichaxota po botha peitapanae bo, po bo Herodes cuenta naxuba.

Meje yabara poxonae Pablo Félix peitabaratha tatsi nayabara jume paeba

24 ¹Ichá matacabitha poxonae cinco po matacabibe tsuxubi, pebiwi pata Cesarea tomaratha. Ichun pewun Ananías. Bapon Ananías sacerdotemonae pia pepa pentacaponaein tatsi. Iru pitiri jiwimonaeno pata. Iru pon xua petapaebibin jiwi, pon pewun Tértulo bapon napatopa. Barapomonae nacua pata Cesarea tomaratha. Barapomonae Félix peitabaratha taumeinchi, xua Pablo abeya peyabara paebinxatsi. ²Poxonae Pablo carendenatsi, Tértulo Pablo abe yabara paebatsi. Félix baraichi, jeye:

—Félix, xam pon pana yanacua ewatame. Daxota juntema xanepanaya pajinompan. Maisa bara beta itorobiya canamataxeiname jiwi jinya neyaputae coyenewatha. Daxota xam beta exaname barapo nacuathe. ³Félix, xam pon pata paca baru itura jinaechinchi, xua exaname yatsicaya wuna nawita barapo nacue nexa. ⁴Jopa ichichipaeinyo xua tacayatacutsiwatsi. Daxota catsipaebatsi xua saya caeto pana nejume taema xua pata paca catsipaebiwa tsainchi. ⁵Anoxuae payaputan xua Pablo bichocono pana cui fayacota xua abe exana. Matautano bapon judiomonae cui tsacabatsi xua nacaseba exanatsi daxita nacuantha. Matautano bapon, apara pomonae nazarenomonae barapomonae pia pentacaponaein tatsi, pomonae pecuidubi jiwi icha coyeneya pocotsiwa jopa xainyeyo. ⁶Yawa Nacom pin pia bono tatsi juntucuru abe taexanatsino, poxonae juntucuru baru jonyatsi pon jopa judiomonae naexanaeyo Nacom pin pia botha. Daxota pawaetaban. Paxan paichichipan Pablo paperaxa exanan barompaya pata peitorobi coyenewa cuitha. ⁷Ichitha soldadomonae pia pepa pentacaponaein tatsi, Lisias, daunweya pana wecobe maxu pitatsi Pablo. ⁸Soldadomonae pia pepa pentacaponaein tatsi, Lisias, pana barai: ‘Pomonae Pablo abe jaintatsi moya Félix peitabaratha papaebare’, pana jei Lisias, jei Tértulo.

Tértulo equeicha namchi, jeye:

—Félix icha yainyabatsipame Pablotha metha bara yaputaetsipame xuaunxuae cabaraichichi. Xuaunxuae Pablo yabara paeban baxua xaniyan yatsicaya, jei Tértulo.

⁹Judiomonae, pomonae Tértulo puna poinchi namchi: “Tértulo bara xaniyei paeba”, jei. ¹⁰Nexata Félix Pablo moya pecobetha jume itorobatsi. Bapoxonae Pablo Félix baraichi, jeye:

—Yaputan xua caena bayatha ainya wei xam naexaname pon jiwi neyabara paebin xua penatsicuentsiwa xua abe peexanaexae xua barapo tomarathe nexa. Daxota jũntũ coyene weiweinan xua tana nayabara paebiwa neitabaratha. ¹¹Icha yainyabame barapomonaē, Jerusalén tomarapiwi, catsipaebichipa xua bayatha Jerusalén tomara beya ponan. Baxota ponan tsipei Nacom pin pia botha wunae tajainchinexa Nacom. Anoxuae petain doce matabibē yapucaewan poxonaē xua bayatha ponan bara beya. ¹²Jopa jume matsontsonobeibinyo jiwi. Yawa jiwi jopa jume cui tsacabeibinyo xua anaepanaya penajume cayayatsinexa. Baxuan jopa exanaeinyo Nacom pin pia botha. Mataũtano judiomonaē pia penacaetutsi bontha tatsi, baxuan jopa exanaeinyo. Mataũtano tomaran pecuariyathan jopa baxuan exanaeinyo. ¹³Pomonaē paeba xua pinaē abe exanan, barapomonaē jopa jume cũpaetsi xua tana necui yopichiwa xua abe exanan. ¹⁴Xaniwaicha catsipaebatsi xua xan Nacom tanacuitan pon tamo susato jiwi pia Nacom tatsi. Baraxua exanan xua jiwi cuiduban be pocotsi coyeneya xua paeba Jesús pia pena pecuidubiwa tatsi po pecuidubiwa judiomonaē yabara nanta xeina xua pinaē barapo pecuidubiwa jopa xainyeyo. Xan jume cowũntan daxita Moisés pia peitorobi coyenewan. Mataũtano po diwesin Nacom pia peitorobi jume pepaebiwi tina, barapo diwesinno jume cowũntan. ¹⁵Xan barichindũ, Nacom yabara barũ jume cowũntsiya ewatan icha barapomonaē ichi xua po coyene pomonaē pewerapaewi equeicha asũ tsane, pomonaē peajũntũcoyenebe jiwi irũ xua asũ tsane pomonaē pejũntũ coyene xanepanaē jiwino. ¹⁶Daxota jopa najũntũ coyene acaurinyo tsipei nayaputan xua Nacom beta taexanan. Jiwithano jopa najũntũ coyene acaurinyo.

¹⁷“Ainya wei dapaein saya icha nacuantha poponan. Bapoxonaē equeicha tatomara beya poponan, Jerusalén tomara beya. Patopan baxota Nacom pin pia botha poxoru yaitama paratixi caponan xua tamonaē nexa po paratixi ichamonaē taitoroba. Mataũtano bara beyan xua baxotiya Nacom tatsita exanaenexa xua pocotsiwa be tacatsiwa Nacomtha, xua duwein tatautsiwa tsane. ¹⁸Barapo coyenein awiya exanawiyān, bequein bayatha nenacui yabara jume weta exana po coyene xua daxota Nacom jopa tsitanyo xua taajũntũcoyenebewan be pocotsi coyeneya xua judiomonaē itoroba. Bapoxonaē judiomonaē pomonaē Asia nacia weparena netaeba Nacom pin pia botha. Barapomonaē baxota necaxiba bequein poxonaē jopa jiwi namtsebiya wawaya exanaeinyo. ¹⁹Pomonaē netane Nacom pin pia botha pomonaē Asia nacia werena pepatsiwi bewa dapomonaē xote patsi xua necatsipaebinexa tsane xua tana neyabara paebinexa tsane xua abe taexanaewa. ²⁰Icha barapomonaē jopa patsiyo pomonaē xote ena bũ paeba. Barapomonaē netane poxonaē cain matha judiomonaē pia pentacaitorobi bicheito peitabaratha uncuan. Barapomonaē bũ catsipaeba, icha metha

bara abe exanan poxonae barapo pentacaitorobi bicheito peitabaratha tatsi uncuan. ²¹Saya u baxua exanan poxonae peitabaratha uncuan, bapoxonae bichocono wawan. Janje: ‘Anoxuae poxonae paxam pana neyabara paebame xua tanatsicuentisiwa xua abe taexanaewa paxam pananta xeiname xua abe exanan yaitama jume cowuntan xua pewerapaewi equeicha asu tsaibi tsane’, jan jei”, Pablo.

²²Félix caena bayatha yabara yaputane Jesús pia pena pecuidubiwa tatsi. Daxota Félix cataunxuae abu jopa baxua yabara paebiyi pocotsiwa barapomonaе paeba. Daxota Félix namchi, bapomonaetha, jeye:

—Abu bexa pacatsipaebinchi, poxonae soldadomonaе pia pepa pentacaponaein tatsi patopaena pon Lisias, bapoxonae yabara paebin pocotsiwa Pablo exana, jei Félix.

²³Nexata Félix itoroba soldadomonaе pia pentacaponaein tatsi xua soldadomonaе Pablo cataunxuae yapu eeniya pebaru jinompaenexatsi Herodes pia botha tatsi, bequein bara copata xua Pablo bara exanaena be pocotsiwa xua bapon ichichipa exana barapo botha. Matautano copatano xua Pablo bara pesiwa ponaenexatsi piamonaе xua piamonaе peyawenaenexatsi xua pocotsiwa nantawenona bapon.

²⁴Icha matabitha pirapaeyo Félix piowabe patopabe. Petsiriwa pewun Drusila. Barapowa judiomonaewayo. Félix najume caitoroba ichuntha xua Pablo pewabinexatsi Félix berena, matautano xua Pablo Félix yabara petsipaebinexatsi xua po coyene jiwi jume cowunta Jesucristo. ²⁵Pablo Félix tsipaebatsi xua pinae ainya cui xua jiwi beta yanthuthiya jinompa icha be Nacom ichi xua beta yanthuthiya popona. Matautano paebano xua pinae jiwi pia xoba abe exaneiba. Matautano namchino xua pinae caentacabitha tsane Nacom wabina daxita jiwi xua peyabara paebinxua xua penatsicuentisiwa xua abe peexanaexae barapo cae pin nacuathe. Félix najuntu coyene cabenaeca poxonae jume tane baxua. Pablo tsipaebatsi, jeichichi:

—Jinya tutu beya bara ponde. Bexa equeicha cawabinchi icha ichawiyi jopa neenaeyo, jei Félix.

²⁶Félix nanta xeina xua paratixi pecatsiwa tsainchi xua Pablo pecatsiwa tsane xua daxota Pablo pepu copatsinexatsi. Daxota memecabiya wabatsi Pablo. ²⁷Baraxua exana beya yaainya weibe jopa. Barapoxonae Félix weta xua pon peyanacua ewatsin jiwi naexana barapo Judea nacuatha, xua icha nacua beya pewarapaexae. Ichun Félix pecoutha tatsi tapatopatsi pon pewun Porcio Festo pon xuya pon peyanacua ewatsin jiwi naexana Judea nacuatha. Félix ichichipa xua peweyataewatsi xua judiomonaе peweyataewa daxota Pablo jopa copatichi xua bara yatsicaewa pepu copatsiwatsi xua pepanepaewa tsane.

Meje yabara poxonae Pablo Festo peitabaratha tatsi tauncuatsi

25 ¹Festo bara patopa xua penaexanaenexa pon peyanacua ewatsin jiwi. Poxonae acoibi po matabibе weta Cesarea tomara

weya pona, Jerusalén tomara beya pona. ²Barapo tomaratha Jerusalén tomaratha sacerdotemonae pia pentacaponae wi tatsi iru judiomonae pomonae pentacaponae wi, barapomonae Pablo abeya cui yabara canantsipaebatsi. ³Barapomonae Festo baraichi: “Bũ painta ichamonae Pablo Jerusalén tomara beya capoinchi”, jei. Barapomonae baxua Festo jeichichi, tsipei Pablo namtotha ewatabobenapaebatsi pebexubinexatsi. ⁴Festo jume nota, jeye:

—Canta Pablo Cesarea tomaratha eca xua soldadomonae baru jinompatsi. Tha nama imoxoyo bara beya equeicha caibeya ponaetsi. ⁵Painyamonae jiwana pomonae pentacaponae wi moya bũ barapomonae nepuna pona Cesarea tomara beya. Icha Pablo abe exana, metha moya baraxota Pablo jame be cui yabara paebichipatsi barapomonae, jei Festo.

⁶Festo cataunxuae Jerusalén tomaratha ocho po merawiyobe yapucaewa xua equeicha ainya dapaeyobe. Barapoxonae Cesarea tomara bewarapiya caibeya. Icha matacabitha Festo eca peequeibithopeibiwitha po tututha ichaxota yabara paebequeiba jiji xua penatsicuentisiwa xua abe peexanaexae. Festo barai soldadomonae: “Painta caponde Pablo taxainya berena”, jei. ⁷Poxonae Pablo patopa, judiomonae imoxoyo umenarucupa pomonae Jerusalén tomara weparena. Barapomonae judiomonae Pablo yacaincha matawaqueicha umenatsi. Barapomonae Pablo cui yabara paebatsi xua abe exana nawita. Ichitha xua barapomonae paeba jopa tsita itapeinya xeinaeyo xua apara bara xainyei pocotsiwa barapomonae paeba. ⁸Nexata Pablo pia coya nayabara paeba, jeye:

—Xan jopa abe exanaeyo. Jopa abe yabara paebinyo Moisés pia peitorobi coyene tatsi. Matautano Nacom pin pia bo jopa abe yabara paebinyo. Matautano jopa abe yabara paebinyo romanomonae itorobiya pia pepa peewatsinchi tatsi, jei Pablo.

⁹Festo bepara antobetsei judiomonae. Daxota Festo Pablo yainyabatsi, jeichichi:

—¿Jinya ponaetsi Jerusalén tomara beya xua baxotiya cayabara paebinchi nenatsicuentisiwa xua abe neexanaexae? jei Festo.

¹⁰Pablo jume nota, Festo jume notatsi, jeye:

—Xan uncuan peitabaratha tatsi pomonae pentacaponae wi, pomonae romanomonae itorobiya pia pepa peewatsinchi tatsi itoroba. Barapomonae pentacaponae wi bara itacupatsi xua barapo tomarathe tana neyabara paebinexa xua tana natsicuentisiwa xua abe taexanaexae. Jopa nantawenonaeinyo xua taponae xua tsane Jerusalén tomaratha. Xam bayatha beta yaputaneme xua jopa abe exanaeyo judiomonae. ¹¹Icha xaniwaicha abe exanan barapomonaetha, metha moya benebexubina. Jopa junuwinyo xua tatupaewa tsane. Ichitha icha jopa xainyeyo xua barapomonae neyabara paeba, metha nexata barapomonae jopa

nebexubichipae. Tha nama warapaetsi romanomonae itorobiya pia pepa peewatsinchi beya, tacoya nayabara paebichi, jei Pablo.

¹²Copiya matha Festo tsipaeba pejume yaweneibiwichi. Barapoxonae Festo, Pablo baraichi, jeye:

—Yaitama aunxuae siwa ponapaebame romanomonae itorobiya pia pepa peewatsinchi tatsi, xua necayabara paebinexa xua nenatsicuentisiwa xua abe neexanaexae daxota moya ponaename bapon beya, jei Festo.

**Meje yabara poxonae Pablo uncua Agripa
peitabaratha tatsi pon peyanacua ewatsin jiwi**

¹³Ichha matabitha Agripa, pon peyanacua ewatsin jiwi, bapon pona Cesarea tomara beya. Petsiriwa puna poinchi, bapowa pewun Berenice. Festo siwa poinchi Cesarea tomaratha iya. ¹⁴Baraxotiya Agripa petsiriwano ainya matabin ecabe. Festo namchi Agripa, jeye:

—Xote eque pon cain Félix xubeta Cesarea tomaratha xua bapon pebaru jinompaenexatsi soldadomonae. ¹⁵Poxonae Jerusalén tomaratha ecan, sacerdotemonae pia pentacaponae jiwi tatsi, pitiri jiwino, barapomonae netsipaeba xua bepa pinae Pablo itorobin xua petupaewa tsane. ¹⁶Barapomonae baran: ‘Barapocotsi coyene romanomonae pan pata cui coyene. Paxan jopa pacopatsinyo xua ichun amanaya bexotsi. Jame copiya pomonae xua abe yabara paeba ichuntha, barapomonae bewa paebina bapon peitabaratha tatsi icha bara metha bapon xaniwaicha abe exana. Bapoxonae bapon pia coutha beya nayabara paebichipa xua barapomonae paeba’, jan. ¹⁷Daxota poxonae barapomonae pata xote, jopa be bayathinyo yaitama. Daxota baya caena nainya ecoundecan, po tututha yabara paebequeiban jiwi xua penatsicuentisiwa xua abe peexanaexae. Itoroban soldadomonae xua Pablo pecaponaenexatsi taxainya berena. ¹⁸Xan nanta xeinan xua Pablo bichocono abe exana. Ichitha poxonae barapomonae asiya umena peyabara cueicueijeinexa tsainchi, Pablo jopa paebiyo po diwesi xua daxota tananta xeinaenexa xua Pablo bara abe exana cou. ¹⁹Pocotsiwa xua Pablo yabara cueicueijeichi, saya xua apara pia pejume cowuntsiwa tatsi yabara, matautano xua Pablo peyabara cueicueijeixae pebin pon Jesús baraichi, xua pinae equeicha asu poxonae tupa. Seicaya nama barapomonae paeba xua pinae bapon apara tupa, xua equeicha jopa asuyo. ²⁰Jopa yaputaeninyo xua baxua exanan xua Pablo abe yabara paebatsi. Daxota copiya matha Pablo yainyaban, janje: ‘¿Xam, jinya ponaetsi Jerusalén tomara beya xua baraxotiya cayabara paebinchi xua nenatsicuentisiwa xua abe neexanaexae?’ jan. ²¹Ichitha Pablo dapo jumetha netsipaeba xua bepa ponaei Augusto beya, romanomonae itorobiya pia pepa peewatsinchi beya, pon xua bepa pinae yabara paebinchi xua penatsicuentisiwa xua abe peexanaexae. Daxota itoroban soldadomonae

xua Pablo abũ pebaru jinompaenexatsi soldadomona, beya abũ poxonaecui jũpa xua itorobin pontha pon romanomona itorobiya pia pepa peewatsinchi, jei Festo xua Agripa tsipaebatsi.

²²Nexata Agripa Festo baraichi, jeye:

—Tha bequein irũ jume taetsirũ Pablo, jei Agripa.

Agripa jume notatsi, Festo jume nota, jeye:

—Metha moya baya tsane jume taename, jei Festo.

²³Bara icha matabitha Agripa irũ Berenice patopabe. Paparuwa peitũpanaewa nama xatatabe. Agripa pinmona baru pata, soldadomona pia pepa pentacaponawino. Barapo bicheito Agripa baru pona. Festo itoroba soldadomona xua Pablo pecarendenaenexa tsainchi. ²⁴Festo barai, jeye:

—Agripa, xam pon neyanacua ewatsin jiwi, irũ pomona pecanamataxeinae jiwi pamda. Bapon xote uncue Pablo. Daxita judiomona irũ Jerusalén tomarapiwi, irũ Cesarea tomarapiwi, daxita barapomona Pablo jume yabara paebatsi xua pinae abe exana.

Mataũtano barapomona neitoroba nawita xua bepa pinae Pablo itorobin xua petũpaewa tsane. ²⁵Ichitha xan saya tacoya nanta xeinan be jopa neichichi abe exanaeyo, poxona ne jume nota, poxona tsipaeban.

Daxota jopa becaenaetaxubinyo xua pebexubiwa tsainchi. Ichitha Pablo netsipaeba xua bepa ponaei romanomona itorobiya pia pepa peewatsinchi tatsi beya, pon pewũn Augusto, tsipei bepa pinae yabara paebichi xua penatsicuentisiwa xua abe peexanaexae. Daxota yabara najũntũ coyene wetan xua bapon Pablo taitorobiwa tsane bara beya.

²⁶Yaitama bapon jopa abe exanaeyo, jopa yaputaeyo xua eta be tajumichiwa tsane barapo cartatha poxona Pablo itorobin xuano xua cartano cayabara cui pu catsin bara beya. Daxota anoxuae Pablo painya itabaratha cuaranotan. Xam Agripa, pon neyanacua ewatsin jiwi, moya matha copiya yainyabare Pablo, tsipei tha beta cui yabara tatinaetsi bara beya pontha pon romanomona itorobiya pia pepa peewatsinchi. ²⁷Tsipei inta jopa xanepanaetsipae icha itorobichipan Pablo pon pewaetabinchi icha jopa yabara paebinchipae xua pocotsiwa bapon peexanaexae, jei Festo xua Agripa tsipaebatsi.

Meje yabara poxona Pablo pia coutha cuita paeba, Agripa peitabaratha tatsi, pon peyanacua ewatsin jiwi

26 ¹Bara nexata Agripa Pablo baraichi, jeye:
—Icha jinya paebichi, moya taema, jei.

Barapoxona Pablo namaxũ yoicha xua Agripa jacobatsi. Bapoxona namchi, jeye: ²“Agripa, pon neyanacua ewatsin jiwi, maisa bichocono jũntũ coyene weiweinan, xua anoxuae neitabaratha tana nayabara jume paebixae tsane pocotsiwa bayatha neyabara paeba judiomona

po coyene xua pinae abe exaneiban. ³Poxoru yaitama, xam Agripa, bayatha yaputaneme pata jũntũ coyenein pomonae judiomonae panxaein. Yaputanemeno baxuan xua pana najume matsontsonoban. Daxota cabaraichi xua saya beta nejume taema xua jopa aitaconaeinde”, jei Pablo.

**Meje yabara poxonae Pablo nayabara paeba, poxonae
pinae cataunxuae jopa jume cowũntsiyo Jesús**

⁴Equeicha Pablo namchi, jeye: “Daxita judiomonae barapomonae neyaputane xua poxonae pexuyon, poxonae caena bayatha pia xantha tatsi poponan xua tanacuaxae. Barichino neyaputane poxonae Jerusalén tomaratha poponan. ⁵Icha yainyabatsipame barapomonae, yabara catsipaebichipa pocotsiwa exaneiban xua fariseomonae pocotsi jũntũ coyene cuidubeiba, pocotsiwa judiomonae cuidubeibatsi, tsipei xan fariseomonaepin. Daxita barapomonae yaputane xua caena bayatha jume cowũntan daxita pocotsiwa xua barapomonae itoroba. Fariseomonae itapeta cuita exaneiba pocotsiwa Nacom itoroba beyacaincha ichamonae xua exaneiba. ⁶Judiomonae necapona xote tsipei saya poxoru yabara wũnae ewatan xua bexa Nacom asũ exanaena pomonae xua werapa. Baxua pinae Nacom wamo susato jiwi yabara tsiwũnae muxu dutatsi. ⁷Patamonae pomonae Israel nacuamonaepiwi pomonae xua doce pomonae bicheitobe, baxua yabara jume cui wũnae ewata poxonae petũpaewi equeicha asũ exanaeinchi, xua poxonae Nacom exanaena. Daxota barapomonae Nacom wũnae jainteibatsi. Matautano itapeta exana pocotsiwa Nacom itoroba, merawithano, matabithano. Xam Agripa pon neyanacua ewatsin jiwi catsipaebatsi baxua tayabara jume cowũntsixaerũ, daxota judiomonae nayabara paeba xua pinae abe exanan. ⁸Painya xoba pananta xeiname xua Nacom jopa itacũpaetsi xua equeicha jiwi asũ peexanaewatsi pomonae xua werapa”, jei Pablo.

**Meje yabara poxonae Pablo nayabara paeba xua pinae copiya abe
exana nawita pomonaetha pomonae pejume cowũntsiwichi Jesús**

⁹Equeicha Pablo jeye: “Xan copiya tacoutha nanta xeinan xua bewa bichocono abe exanaein pomonaetha pomonae Jesús pejume cowũntsiwichi pon Nazaret tomarapin. ¹⁰Jerusalén tomaratha baxua exanan. Sacerdotemonae pia pentacaponaeiwa pia peitorobi coyenewa necata xua daxota tana necui jũpaewa xua jiwi tacaponaeiwa jiwi pecũbi botha. Pinmonaeca caponan, pomonae Jesucristo pejume cowũntsiwi. Xan yabara jume jejan xua barapomonae pejutebiwatsi. ¹¹Anaya caenaetan, peraxa exananno poxoru ichipan xua barapomonae pentsina xua Jesús pejume cowũntsiwatsi. Ƴ baxua exanan. Daxita judiomonae pia penacaetutsi bontha tatsi exananno. Bichocono anaepanan. Daxota icha

nacuantha ponan tajeichinexa pomonae pejume cowuntsiwichi Jesús xua barapomonae abe taexanaenexa”, jei Pablo.

**Meje yabara poxonae equeicha Pablo nayabara
paeba poxonae pinae jume cowunta Jesús**

¹²Equeicha Pablo namchi, jeye: “Barichi sacerdotemonae pia pentacaponaeawi tatsi pia peitorobi coyenewa necata xua daxota tana necui jupaewa xua taponaeawa Damasco tomara beya, xua pomonae jume cowunta Jesucristo tacaponaeenexa tsane Jerusalén tomara berena. ¹³Xam pon neyanacua ewatsin jiwi bara xaniwaicha catsipaebatsi poxonae namtotha paenaponan poxonae mateinyaxae tsuxubi pecoicha tan xua peitaboco wejopeica, pin coicha po coicha beyacaincha xua xometo. Barapo coicha pomonae nepuna pona nebaru matawacaicha matatsun uncueica. ¹⁴Nexata daxita iratha paothopan. Jume tan xua pon hebreo jumetha nebarai, jeye: ‘Saulo, Saulo, zeta xua tamonae inta abe exaname? Poxonae tamonae peraxa exaname, apara jinya coutha atene nacana exaname icha be buey ichi poxonae ba pia coutha xua xota sojei nataxu matababa’, nejei. ¹⁵Nexata jume notan janje: ‘Pon jiwi Necanamataxeinaem, zjintam xamda?’ jan. Nejume nota jeye: ‘Apara bara xan, Jesús ponxaein inta abe exaname tamonae pomonae tana nejume cowuntsiwi. ¹⁶Nontaponde. Xua anoxuae necotame catsita naitutatsi. Apara tha tana nejume yopichim. Matautano bexano equeicha ichawa necotsiname tana neyabara paebinxam tsane baxuanno. ¹⁷Cacui itorobatsi xua Nacom Pejume Diwesi necueicueijamnexam. Nexata cacapanepaeinchi poxonae juntucuru caperaxa exana judiomonae iru pomonae jopa judiomonae naexanaeyo. ¹⁸Caitorobatsi judiomonaetha iru pomonaetha pomonae jopa judiomonae naexanaeyo xua jopa equeicha pejinompaenexa poxonae jopa jume cowuntsiyo. Matautano caitorobatsi xua barapomonae jopa peexanaponaenexa pocotsiwa caurimonae pia pentacaponaein tatsi itoroba, pon Satanás, jame meisa peexanaenexa pocotsiwa Nacom itoroba. Matautano caitorobatsi xua barapomonae tana nejume cowuntsinexa. Bapoxonae yabara junteinaein barapomonae abe pia peexanae cuiru coyenein tatsi, matautano xua pexeinaenexa pocotsiwa Nacom yabara tsiwuna mu xu duba’, nejei Jesús”, jei Pablo.

**Meje yabara poxonae Pablo exana pocotsiwa Nacom
itoroba poxonae tsita naitutatsi namtotha**

¹⁹Equeicha Pablo namchi, jeye: “Agripa, xam pon neyanacua ewatsin jiwi, xan jopa jumefebinyo xua Jesús neitoroba poxonae itaboco wenetsita naitutsica xua namtotha netsita naituta poxonae pecoichatha jume tan xua Jesús netsipaeba. ²⁰Copiya matha Damasco tomarapiwi tsiapaeban Nacom Pejume Diwesi. Bapoxonae equeicha barapo

diwesi tsipaeban Jerusalén tomarapiwi. Bapoxonae equeicha daxita Judea nacuamonaepiwi barapo diwesi tsipaebanno. Irũ pomonaetha pomonae jopa judiomonae naexanaeyo tsipaebanno. Barapo diwesi tsipaeban xua barapomonae icha juntũ coyenein pexeinaenexa, yawa Nacom pejume cowũntsinexatsi, matautano xua barapomonae petsita itapeinya xeinaenexa jiwitha xua bara Nacom jume cowũntatsi xua beta peexanaexae. ²¹Daxota judiomonae newaetaba poxonae Nacom pin pia botha patopan yawa bepa nebexubei. ²²Ichitha Nacom neyawena. Daxota awiya Nacom Pejume Diwesi paeban bichocono daxita i dapomonaeintha pomonaetha pomonae pepawi jiwi irũ poponaethano pomonae peainya cui jiwi. Baraxua saya meisa paeban be pocotsi coyeneya matha juinya Moisés yabara wũnae tsiwanaya paeba irũ be pocotsi coyeneya matha juinya Nacom peitorobi jume pepaebiwi yabara wũnae tsiwanaya paeba. ²³Barapomonae tsipaeban po diwesi yabara xua pinae bexa Mesías peraxa exanaeinchi ichamonae. Matautano bapon pinae pon xua copiya pomonae pewerapaewi asũ nanta caexanaeinchi. Matautano xua pinae judiomonae irũ pomonae jopa judiomonae naexanaeyo yabara yaputane exanaeinchi pecapanenebiyae diwesi jume”, jei Pablo xua Agripa tsipaebatsi.

**Meje yabara poxonae Pablo paeba Jesús pejume diwesi
Agripatha xua Agripa pejume cowũntsinexa**

²⁴Poxonae baraxua Pablo najume weta xua nayabara jume paeba, Festo jume daunweya wawai, jeye:

—iPablo, maisa cantsiyaibeca poxorũ saya Ʃ necuidubi daxota cantsiyaiba! jei Festo.

²⁵Pablo jume nota, jeye:

—Festo ponxaem tacabarũ cui itura jinaeinchi, jopa nentsiyaibiyo apara. Xuaunxuae paeban, apara seicayarũ xua xaniwaicha paeban xua bara apara pexainyeiwa. ²⁶Ee taema, Agripa, pon pepa peyanacua ewatsin jiwi pon xote eque. Bapon yaputane xua xaniwaicha paeban. Bapontha jopa junuwinyo xua tsipaeban. Xuaunxuae catsipaebatsi bapon baxua daxita yaputane poxorũ jopa namicha exanaeincho. ²⁷Agripa, xam pon neyanacua ewatsim jiwi. ¿Jume cowũntame pocotsiwa Nacom pia peitorobi jume pepaebiwi paeba? Bara yaputan xua bara jume cowũntame, jei Pablo.

²⁸Agripa jume nota, Pablo jume notatsi, jeye:

—Saya caeto netsipaebame. Saya barapo jumetha nanta xeiname xua xan nainya jume cowũntsinan Jesús, jei Agripa.

²⁹Nexata Pablo namchi, jeye:

—Xua caeto paca tsipaebatsi yawa icha matowa paca tsipaebatsi bara ba Nacomtha pacata wũcatsi xam nexa, irũ pomonae nexa, pomonae nejume tane painya nejume cowũntsinexam tsane Jesús. Ichichipan xua

painya neexanaewa icha ichin xua tajume cowũntsiwa, bara bequein jopa ichipaeinyo xua painya nemaxũtha painya nexeiñawa jiwi pecũbi nainto be pocotsi nainto xuaunxuae tamaxũtha ducua, jei Pablo.

³⁰Poxonae Pablo najume weta baxua, Agripa pon peyanacua ewatsin jiwi irũ Berenice asiya uncuatababe. Irũ Festo pon peyanacua ewatsin jiwi asiya uncuataba. Pomonae irũ ena asiya umenarũcupa. ³¹Aisowa be-iyiia barapomonae natsipaeba, najei:

—Barapon Pablo jopa apara abe exanaeyo po coyeneyatha xua daxota bapon pebexubinexatsi, mataũtano po coyeneyatha xua daxota bapon jiwi pecũbi botha peetsinexatsi, najei barapomonae.

³²Agripa tsipaeba, Festo baraichi, jeye:

—Icha metha jopa naca wũcaetsipae Pablo xua peponaewa tsane pontha pon romanomonae itorobiya pia pepa peewatsinchi xua baxotiya peyabara paebinxatsi penatsicuentsiwa xua abe peexanaexae metha pu copatsipatsi xua bara pepanepaewa tsane yatsicaewa, jei Agripa.

Meje yabara poxonae Pablo Roma tomara beitorobiyatsi

27 ¹Barapomonae najũntũ coyene weta xua pata taneitorobiwa Italia nacua beya. Pablo irũ ichamonaerũ pomonae peteiquebiwichi daxita barapomonae itorobatsi Roma tomara beya. Pon barapomonae matabapoinchi bapon pewũn Julio, pon soldadomonae pia pentacaponaein tatsi. Barapo matabũxũyo soldadomonae bicheito wũn dutatsi “Augusto soldado bicheito”, jei, poxoru barapo soldadomonae Augusto tanacuitatsi, pon romanomonae itorobiya pia pepa peewatsinchi. Barapo soldadomonae Pablo irũ ichamonaecapõnatsi Augusto beya. ²Pepa weranaetha pawarapan, po nae Adramitio tomara werena pona. Barapo nae equeicha Asia nacua beya ponaena. Po tomaraxi pitapatha ena barapo tomaraxi bepa siwa ponaei. Ichũn pana cueyata. Bapon pewũn Aristarco Tesalõnica tomarapin. Barapo tomara Tesalõnica tomara eca Macedonia nacua. ³Icha matababitha Sidõn tomaratha papatan. Baraxota barapon Julio, Pablo barũ jume wũnaetsi. Mataũtano bapon Julio, Pablo copatatsi xua bara Pablo piamonae pesiwa ponaewa tsainchi, xuano xua bara Pablo peyawenaenexatsi xua xoxi nantawenona. ⁴Bara Sidõn tomara wewarapiyan weratha. Bara weratha paenaponan joibo cuiyainwa Chipre tunaeto pantawaqueban, yaitama bichocono pin joibo dena ichaxoyo copiya payiyan. ⁵Bara mar mene iya paenaponan, Cilicia nacua, Panfilia nacuano imoxoyo pacaquita enaponan. Bapoxonae Mira tomaratha papatan, po tomara Licia nacua eca.

⁶Baraxota pon soldadomonae pia pentacaponaein tatsi bapon icha nae taeba baraxota. Barapo nae Alejandría tomara werena pona. Barapo nae irũ seicaya Italia nacua beya ponaena. Barapo naetha equeicha Julio pana barũ iya Italia nacua beya. ⁷Ainya matababin saya bewayo

paenaponeiban, poxoru yaitama joibo jera caewa carena tsaibi. Gnido tomara paxenta enaponan. Salmón tomarano paxenta enaponan. Creta tunaetono pantawaqueban. ⁸Bewayo weratha paenaponan, pitapa pacaquita enaponan. Tomaratha papatan ichaxota pexutoroto. Baxota pajebounan, po tomara pewun Buenos Puertos. Barapo tomara imoxoyo eca ichaxota Lasea tomara.

⁹Baraxota came awiya ainya maticabin paenan. Bayatha yapu caewa barapo maticabin poxonae barapomonaе warapapaeba barapo maticabitha xua pin mene mara mene iya. Tsipei imoxoyo awubo tsurucuae tsoponae, daxota Pablo nanta xeina xua icha metha paponatsipan, panacabetsipan. Daxota barapomonaе Pablo muxuweta. ¹⁰Pablo namchi, jeye:

—Pebiwi pam, pana nejume taema. Ichaunxuae warapaeinchi methaunxuae nacabetinchi. Matautano methaunxuae weranae abe exanaena. Matautano xoxino xua capoinchi methaunxuae napentsina. Matautano jiwi methaunxuae napentsina, jei Pablo.

¹¹Ichitha soldadomonaе pia pentacaponaein tatsi, bapon Julio, jopa jume naitomatsiyo xua Pablo tsipaeba. Ichitha dapo jumetha saya meisa pon jera pecanamataxeinaein iru pon jera pexeinaein, baponbe itapeta jume naitomatatsibe. ¹²Barapomonaе nanta xeina, xua baraxota jopa beenaeyo poxoru barapo tomara jopa cui wunaeyo xua jera peboacaewa poxonaе awubo pin joiboxae. Pinmonae barapomonaе jiwana tsita xanepanatsi xua Buenos Puertos weya pewarapaenexa jeratha Fenice tomara beya, po tomara eca Creta tunaetotha. “Methaunxuae tsiwanaya payaeinchi penacabetsi awubo, joibono”, jei. Barapo tomara cui wunaе xua ichaxota jera jebouneiba. Baxota joibo yayapa poxoru tomara naita cafeteca, poxoru joibo jopa patopaeyo pocotsiwa wetsica yawa pocotsiwa wetsina. Baraxota bepa enaei poxonaе awubo tsuxubi.

Meje yabara poxonaе maratsaca daunwei pepa mar mentha

¹³Nexata bewayo joibo tsuncuae, be pocotsiwa parowa wejopeina. Daxota barapomonaе namchi: “Bu poinchi cataunxuae saya tsiqui joibiyo”, jei. Bapoxonaе totabiya jera. Barapo Creta tunaeto imoxoyo pitapa pacaquita enaponan weratha. ¹⁴Poxonaе saya caeto paenaponan bapoxonaе pin joibo pana epa taepona, Creta nacia tunaeto wejoparena. Jera epa yutaba. ¹⁵Nexata joibo jera muxunenababa. Canta joibo nawita, daxota jopa paponaeinyo joibo beya. Daxota saya pacopatan xua saya bara joibo pana yanacaputabiyaenaba. ¹⁶Cauda tunaetiyo bepana yanacaputabiya. Baraxota ichaxota joibo yayapa, tsica naeyo jeriyo po naeyo paquetoutan, pajontaxuinan pepa naetha. ¹⁷Panacuitontan xua pajonta xuinan. Barapo naeyo pepa jeratha pacutabotan. Nexata jera penacuichiwi pepa bumanantha peuma wemuxuburu

capabina, m̄x̄ub̄ur̄u babataruba xua pewacatabiyainwa joibo. Nexata barapomonae bichocono junuwa poxoru nanta xeina xua mexeya itara jera naxatatabawei taetabotha, po taetabo pew̄n Sirte. Daxota wera jontabota jeratha. Saya jera caputabiya joibotha. ¹⁸Ichā matacabitha came awiya maratsacan bichocono daunwei. Daxota ichawan mentha bebai xua xuan capona. ¹⁹Ichā matacabitha daxota pabeban xua jeratha jeba tsipei ichichipa xua tafafanatsi. ²⁰Ainya matacabin came awiya jopa panecotsinyo xometo. Opiteino jopa panecotsinyono. Pajunuwan. Pananta xeinan: “Metha aparaunxuae jopa nacapanenebiya tsainchi. Bunothropaeinchi aunxuae”, pajan.

²¹Ainya matacabin pana yapu xenaca xua jopa panabanaeinyo. Pablo nontapona. Barapomonae baraichi, jeye:

—Bara bayatha paca tsipaebatsiba: ‘Creta tunaeto beya, jopa pawarapaeinde’, paca baraichiba. Daumetha equeicha pawarapame. Daxota aunxuae jera abe exana. Matautano pananta puxanameno xuaunxuae pabebam xoxi pacaponame. ²²Ichitha saya jopa pajunuwinde. Jopa pajiwana t̄paem tsane, bequein meisa jera naxubina. ²³Merawi matatsunpin netsita naituta. Barapo matatsunpin Nacom itoroba pon Tanacom xuano xua taexanaexae pocotsiwa bapon neitoroba. ²⁴Barapo matatsunpin nebarai: ‘Pablo jopa junuwinde poxoru bexa tsane romanomonae itorobiya pia pepa peewatsinchi pon Augusto, peitabaratha tatsi uncuaename. Daxota pomonae xua naponā cata capanepatsi Nacom’, nejei matatsunpin. ²⁵Daxota, paxam pana naj̄nt̄u coyene tsacabare, poxoru xan nanta xeinan xua pocotsiwa matatsunpin netsipaeba bara baxua exanaena. ²⁶Ichitha petunaetotha naca monapentsina, jei Pablo.

²⁷Poxonae catorce po matacabibe tsuxubi, barapoxonae mar mene pacaxiban. Barapo pepa mar mene pew̄n Adriático mene. Barapo mentha joibo pana yana muxunenababa. Merawi papaetha, pomonae petanacuichiwi barapo naetha, barapomonae nanta xeina xua imoxoyo ira itiya pona. ²⁸Barapomonae mene epa tutu canaubareca. Treinta y seis po m̄ epatiyobe xeina xua iratha deca. Caeto equeicha mene epa tutu canauba, baxota veinte y siete po m̄ epatiyobe xeina xua iratha deca. ²⁹Barapomonae pejunuwixae xua jera tofotabina poxonae ȳtabina ibowantha, daxota barapomonae po nainto arewe, xua jera duntaba exanaduta petafe xoreca. Cuatro po naintobe xoreca peruntaba exanadutsinexa. Matautano barapomonae Nacomtha w̄ca xua xometo pentha tsane, penecotsinexa tsane. ³⁰Pomonae petanacuichiwi barapo naetha barapomonae nanta xeina xua per̄c̄paewa. Daxota barapomonae naemata po nainto arewe dureca peb̄x̄ureca. Ichitha tsiqui naeyo mentha durecano, poxoru pia namicha d̄c̄paetsi barapo naeyotha. ³¹Pablo barai Julio, pon soldadomonae pia pentacaponaein tatsi, xuano baraino soldadomonaetha, jeye:

—Icha pomonae petanacuichiwi barapo naetha icha jopa enae tsane barapo pin naethe, jopa Nacom capanenebiyae tsane, jei Pablo.

³²Daxota soldadomonae jeriyo m̄ ucuiba. Jeriyo mentha jopeica.

³³Poxonae caemumbo, Pablo pijiwimonae jain itoroba. Pablo pijiwimonae barai, jeye:

—Bayatha dos po semanabe painya junuwi jopa bichocono panabanaem poxoru pajunuwame xua pabunothopame. ³⁴Daxota pin jumetha paca jeichichi. Moya matha paxaema tsipei baxua ainya cui xua painya nenacapanenebiyaenexam. Bara caein jopa napuxanae tsane. Matautano jopa caentanatiyo aichurucuae tsane.

³⁵Poxonae Pablo najume weta, pecobetha pan pita, Nacomtha tsipaeba barapomonae peitabaratha tatsi. Barapoxonae pan epa janaxuba. Bapoxonae xane. ³⁶Bapoxonae barapomonae najunt̄ coyene tsacabar̄c̄pa. Matautano barapomonae daxita junt̄ema nabaner̄c̄pa. ³⁷Jerapiwi doscientos setenta y seis po matab̄x̄monaebe pan xua daxita pan. ³⁸Poxonae barapomonae najain wetar̄c̄pa, daxita barapomonae trigo xu bebai pepa mentha poxoru bepa jera tafafanaetsei.

Meje yabara poxonae jera bunareca

³⁹Poxonae xometo baya pentha tsina, pomonae petanacuichiwi barapomonae jopa yaitaeyo ira, po iratha muxu pepatsi. Poxonae barapomonae pexutoroto tane, barapomonae nanta xeina xua juntucuru jebounaena taetabo itapatha. ⁴⁰Daxota barapomonae nayana m̄ ucuiba, xua po nainton arewe mene b̄pana bobendeca. Po catenano pecabobotsi catena, barapo catenano isanaxoreca. Nexata paparuwa duta wera naetotha. Barapo wera peb̄x̄utha duta. Jera nainya cacuita caputabiya ira. ⁴¹Ichitha barapoxonae barapo nae ichaxota tsewa tuw̄utha naxatatabarena. B̄x̄u naxatatabuncua bichocono. Petafe fotaba maratsacatha.

⁴²Soldadomonae bepara jutebei pomonae peteiquebi jiwichi, tsipei poxonae mentha othopaena mexeya itara d̄cupaenawei. ⁴³Ichitha soldadomonae pia pentacaponaein tatsi, bapon Julio, ichipa xua Pablo asu popona. Daxota Julio jopa yabara jume copatsiyo xua jutebinchi pomonae peteiquebi jiwichi. Bapoxonae Julio itoroba pomonae yaputane xueiba, copiya pepatsinexa tsane pepa iratha. ⁴⁴Pomonae xua jopa xueibiyo napaewan cobena xueibiya. Matautano barapo jera pepan cobena xueibiya. Daxota daxita panenebiya pepa iratha.

Meje yabara poxonae Pablo Malta tunaetotha patopa

28 ¹Poxonae po tunaetotha papanenebiyan ichamonae pana tsipaeba: “Apara Malta tunaeto”, jei. ²Malta tunaetopiwi beta pana matenta weiweinaya waba. Bichocono ema duna. Ema pana atsana.

Aqueno. Daxota barapomonae pin isoto itutaeta. Bapoxonae barapomonae pana waba: “Antha panonopenare”, jei. ³Pablo isoton nota po isoton tsewa. Poxonae barapo isoton pepa isototha bebebeya, barapo isotontha jomo athabe jopeina poxoru bichocono atou. Pablo cobe sinaducuatsi barapo jomo. ⁴Malta tunaetomonaepiwi, Pablo cui tainchi xua jomo cobe sinaducuatsi. Barapomonae nantiya natsipaeba, najei: “Barapo pebin apara pon jiwi pejutebin. Bequein panepa pepa mar mentha ichitha barapo nacom, po nacom pewun Justicia, bapon itoroba jomo pesinarucuaenexa tsainchi, xua bapon jopa pepoponaenexa tsane”, jei barapomonae.

⁵Ichitha Pablo nacobe nunutaba jomo isototha. Saya axaibi tsuncuae Pablo. ⁶Daxita barapomonae Pablo cui necotumeinchi xua cobe putsunanaya yawa icha iratha jopiyaena petupaein. Bayatha cui wenaewatumena. Poxonae baxua jopa daichiyo, daxota equeicha ichawa nanta xeinarucupa: “Metha moya bara Pablo nacom tsecae”, jei bapomonae.

⁷Ichaxota isoto, baxota ainya iran bobena Malta tunaeto peewatsin, bapon pia iran tatsi. Bapon, acoibi po matabibibe beta pexaewa pana apata. Baxota yawa pamaitenan. Bapon pewun Publico pon iran pata tan. ⁸Publico paxa tatsi camatha boca. Domaebatsi. Suibatsino. Pablo barapo tutu bejoniya ichaxota bapon boca. Bapoxonae Pablo cobe jayabiya tsipaeba Nacomtha. Bara bapon axaibi tsanaya. ⁹Poxonae baraxua exana Pablo, daxita Malta tunaetomonae, pomonae peatenewi, baxota pata. Iru Pablo axaibi exanaru daxita barapomonae. ¹⁰Malta tunaetomonae pana baru cui itura jina nawita. Bapoxonae poxonae equeicha pawaraparusupan jeratha, pana nepu catsiba xua xoxi pata nantawenonaenexa poxonae weratha pawarapan.

Meje yabara poxonae Pablo Roma tomaratha patopa

¹¹Poxonae acoibi po xometiyobe payapucaewan barapo Malta tunaetotha, barapoxonae pawarapan. Pawarapan weratha po naetha po nae barapo Malta tunaetotha ayawubo tsuncuae. Barapo nae Alejandría tomara werena peponae nae. Barapomonae barapo naetha petafetha cuareta naewiyo be jitonyobe. Saya canaxoba pia nacombe. Icha nacom pewun Cástor. Icha nacom pewun Pólux. ¹²Siracusa tomaratha pajebounan. Barapo tomaratha acoibi po matabibibetha paenan. ¹³Barapo tomara wepawarapiyan, Siracusa tomara weya. Bapoxonae Regio tomaratha papatan. Icha matabibitha joibo wexubiye Puteoli tomara bepana yanacaicha ainya merawibe. Baxota papatan Puteoli tomaratha. ¹⁴Baraxota pacaxiban pomonae iru pejume cowuntsiwichi Jesús. Barapomonae pana waba: “Cae semanatha pana baru enare”, jei. Bapoxonae equeicha Roma tomara bewarapiyan. Pecaey payiyan.

¹⁵Pomonaē irū pejume cowũntsiwichi Jesús, Roma tomaramonaepiwi, cou pana yabara jume tane xua imoxoyo papatan. Daxota cou ichamonaē pana siwa dendena pecaerena. Foro de Apio tomara beparena. Ichamonaē Tres Tabernas tomara beparena pia pana taetsi. Poxonaē Pablo barapomonaē tane, Nacomtha tsipaeba. Pablo juntū coyene sadujei xua juntema pepoponaewa poxonaē tane pomonaē pejume cowũntsiwichi Jesús. ¹⁶Poxonaē Roma tomaratha papatan, soldadomonaē pia pentacaponaein tatsi, copata xua Pablo bara saya pepoponaenexa icha botha, xuano xua saya caein Pablo peyapu eenaenexatsi soldadomonaēpin.

**Meje yabara poxonaē Pablo Nacom pexeinya
jume diwesi paeba Roma tomaratha**

¹⁷Poxonaē acoibi po matacabibe yapucaewa, Pablo najume caruta ichamonaetha petawabinexa tsainchi Roma tomarapiwi, pomonaē judiomonaē pia pentacaponaei tatsi. Poxonaē barapomonaē pata, Pablo barai barapomonaē, jeye:

—Tamonae, jopa abe exanaeinyo wamonaetha pomonaē judiomonaexae. Matautano bequein jopa abe exanaeinyo wamo susato jiwi piamonaē pia coyene cuiitha tatsi, ichitha barapomonaē newaetaba. Matautano jiwi pecubi botha necapona Jerusalén tomaratha xua romanomonaē pia pentacaponaei tatsi pia xantha tatsi. ¹⁸Barapomonaē, romanomonaē, neyabara yainyaba nawita xua icha abe exanan. Ichitha barapomonaē neyaputane xua jopa abe exanaeinyo. Daxota barapomonaē ichipa xua saya tana necopatabiwa tsane. Romanomonaē aichaxaibi xua jemeicha saya nenacui cayantomata xua tana nebexubiwa tsane tsipei pinae jopa abe exanaeinyo. ¹⁹Ichitha judiomonaē neapusiwa xua jopa taponaeiwa tsane. Daxota bewa wūcaein xua taponaeiwa tsane romanomonaē itorobiya pia pepa peewatsinchi beya, xua tana neyabara paebinexa tsane icha metha abe exanan. Baxota ponan bequein jopa xeinaeinyo xua po coyene tayabara paebiwa tamonaē xua abe exana. ²⁰Daxota paca wabatsi tha paca cataetsi xuano xua tha panejume taicham. Waxainchi israelmonaexaetsi wūnae ewatatsi pon Nacom itorobicapaeba. Tajume cowũntsixae baxua daxota anoxuae penainto tamaxūtha ducua, jei Pablo barapo pentacaponaeiwa.

²¹Barapoxonaē romanomonaē Pablo baraichi, jeichichi:

—Jopa painta patopaeyo carta Judea nacia werena xua xam necayabara tinaewa. Po judiomonaē, Judea nacia werena pata pomonaē patamonaē, barapomonaē jopa abe cayabara paebiyo. ²²Paichichipan paca jume tainchi xua jinya coutha nanta xeiname. Poxoru daxita nacuan pajume tan, xua Jesús pia pena pecuidubi coyenewan tatsi abe yabara paeba, jei barapo judiomonaē pia pentacaponaei tatsi xua Pablo tsipaebatsi.

²³Pablo muxu tsipaebatsi po mataqueitha xua patsina. Barapo mataqueitha Pablo pia botha tapatatsi pin bicheito. Pablo baya tamropata pitaba xua tsipaeba barapomonaetha, beya yapentha. Pablo jume daunweya yabara cueicueijei barapomonaetha po diwesi po coyene xua Nacom waba jiwi petanaexanaenexatsi piamonae tatsi poxonae Jesús jume cowuntatsi. Matautano tsipaeba barapomonaetha Jesús yabara xua Jesús apara pon Moisés yabara paeba pia peitorobi coyenewatha. Matautano Jesús apara pon Nacom pia peitorobi jume pepaebiwi yabara tina pia petinae diwesintha. ²⁴Xua Pablo po jume diwesi paeba, ichamonae jume cowanta poxonae cataunxuaeru ichamonae jopa jume cowantsiyo. ²⁵Barapomonaebé be ainya bicheitobe natsicotane. Daxota bapomonaebé tamropata notarucupa xua peponaewa. Pablo namchi, jeye: —Po diwesi Nacom pia Pejumo pe tunaxu tatsi cata xua Isaías catatsi xua bapon petsipaebinexa xua wamo susato jiwi petsipaebinexatsi, barapo diwesi po diwesi pexeinya diwesi, xua jeye:

²⁶ ‘Ponde, barapomonaethano jande:

Pajume taneme ichitha jopa xapain payabara jume yaputaem pocotsiwa pajume taneme.
Pataneme painya itacueretontha ichitha jopa xapain payaputaem pocotsiwa panecotame.

²⁷ Barapomonaebé najuntu coyene ararana exana, jopa peichichipaexae xua pejume taewa. Matautano antafaetabiya jume tane. Barapomonaebé baraxuan exana, poxoru jopa betaeyo peitacueretontha, poxoru jopa bejume taeyono pemuxutontha, yawa poxoru pejuntu coyeneintha jopa beyaputaeyo. Barapomonaebé jopa ichipaeyo xua tana netsita xeinaewa icha juntu coyene xua daxota jopa neitacupaeyo xua tayabara junteinaewa abe pia peexanae cuiru coyenein tatsi’, jeyei Nacom pia Pejumo pe tunaxu tatsi xua Isaías cueicueijei exanatsi pinae, jei Pablo.

²⁸ Pablo cataunxuae cueicueijei, jeye:

—Anoxuae xuano bexa tsaneno payaputaename xua pomonaebé jopa judiomonaebé naexanaeyo jume taena Nacom pia pecapanenebiyae diwesi. Bara barapomonaebé beta jume naitaewatsina.

²⁹ Poxonae Pablo najume weta natsixibarucupa judiomonaebé. Poxonae pona barapomonaebé yabara najume matsontsonoba xua Pablo paeba.

³⁰ Pablo Roma tomaratha popona ainya weibe. Pia botha eca xua saya tanacowaeicha eca. Barapo botha daxita matenta weiweinaya wabeiba

pomonae pesiwa poneibixaetsi Pablo. ³¹Pablo tayapu xanepanatsi xua pepoponaewa. Barapoxonae Pablo barapomonaetha yabara tsipaeba po diwesi po coyene Nacom waba jiwi petanaexanaenexatsi pijimonae tatsi pomonae itorobiya peewatsixae. Matautano yabara cuidubano xua Jesucristo yabara, pon Pecanamataxeinaein jiwi. Romanomonae pia pentacaponaein tatsi Pablo jopa cui matawentichi.

Baja Lucas.